

言以白其心術業基乎行而文載乎
道不徒取震讜一時之譽而進越前
軌微先生將孰與歸哉先生少席家
學起進士編摩史館以司業佐南雍
教再典翰林入侍

講幄奉職始終居敬明誼務竭誠款時所
獻納必緣古訓以格

上心敷陳治道纚纚有規緒至冒忌諱罔

暇顧避尤悼士習近靡所至祛剪浮
薄崇上惇厚期以挽回淳風故立朝
幾四十年所區內學士大夫尚論今
天子舊事之臣無弗謂郭先生賢先生文
章有

經筵南雍二藁蓋其大者又時有贈送
登覽碑志等作間爲歌詩體裁悉具
剷去雕鏤不見其芒焰突兀之狀然

天采炳若有識者未始不知其爲世寶也汝楠蓋先生所舉士自嘉靖甲申從先君游雍即涵服其教後爲先生識拔趨函丈彌勤屬奉

璽書拊視茲方獲履先生之桑梓墓草已陳俯仰興慨旣爲銘其隧復即其家求二藁觀之不可得止得遺文若干卷誦之汝楠於是仰而歎曰烏虜

文不在茲哉自昔先民紀傳道化文章寓焉故肇于六經渾噩龐厚醇而弗漓其氣若將與造化摩盪故其文歷世而永存以後諸文章家閎肆縱逸押闔變幻非不能膾炙人代求之於道罔克幾矣矧夫迂儒曲士蒐奇獵異徒以靡麗相夸尚者詎惟不幾於道且或戾焉惡乎取文哉儒林固

文藪也凡爲儒者於斯視準則焉烏可不辯其原也乃今誦先生之文其間奏對者愛而諷紀載者簡而覈贈送者婉而貞登臨者激而達吟咏之篇皆優柔溫厚典則風雅真若殷彝周鼎不炫飾而自美江波峽濤不搏激而自奔者繇其所養所蘊優與道俱文章事業本末畢備而奇節醇行

又足以將之寧不使百世之下誦其言思其人益雋永而不能置哉昔夏侯湛之文溫潤潘令知其孝弟許景先之文豐美燕公徵其中和今而後當有知先生如二子者稽於先進之意豈獨汝楠輩門下士也集惜非完書由先生存日殆無意乎傳其詞章益可以窺先生顧鉅儒緒言亟於傳

之有不容已者方伯趙君希夔得汝楠手授命工雕刻僅匝月工已竟

嘉靖壬戌孟夏之吉

賜進士第嘉議大夫都察院右副都御史

奉

勅巡撫河南等處地方德清門人蔡汝楠

撰

明故中憲大夫太常寺少卿兼翰林院侍讀學士杏東郭先生暨配胡宜人合葬墓誌銘

嘉議大夫巡撫河南都察院右副都御史門人德清蔡汝楠著

汝楠不佞以今

皇帝之十一年舉進士則學士杏東郭先生實收之今先生即世且二紀餘其初所舉三百人先後淪落多去仕版惟是少傅大學士李公本大司空雷公禮大司空盧公勲少司徒林公應亮少司空朱公衡呂公光洵太僕卿周公復俊及方伯唐公寬等暨汝楠凡十四人在位頃汝楠受

命來拊中州踐先生之故土而誦其遺風既已潛然久之
乃少司空朱公叙少傅以下諸公意移之書曰吾屬
得階先生一日之鑑以至於今未有以報先生也且
先生以鉅儒起

先朝歷事今

皇帝侍從啓沃重繫世望死之日上下莫不哀之顧其墓
猶未銘何以志不朽吾屬將無負先生幽冥乎子其
圖之汝楠憮然曰稽之古籍公明儀識子張之墓而
侯芭亦負土爲楊冢吾屬師事先生而使斯禮闕
焉寧不媿古人哉汝楠雖不敏謹附古誼而代諸公執

筆之役於是取其鄉故給事張漢卿所爲狀次而銘
之按狀先生姓郭名維藩字价夫大梁之儀封人卜
居杏岡之陽人稱杏東先生其先虹人元季有祖名
德者避地儀封因家焉德生二公二公生蕭縣公岩
起掾吏爲蕭縣典史有惠政於蕭蕭人戴之生承德
公慶初以布衣好陰行義鄉閭稱長者嬪歐陽氏而
生五子長即中憲公廷珪蓋先生父云中憲公起家
進士授南京戶部郎以

馳恩得封承德公與歐陽安人郭遂爲儀封著姓矣後中
憲公又調刑部郎坐執法忤權貴人權貴人銜之竟

調膠州稍遷至程番太守程番去中州萬里公遂無
行意與其配太恭人賈氏偕隱里中課三子治博士
業怡然終其身三子皆恭人出而先生最長先生自
少丰神慧朗十餘歲即強記善屬文弱冠從中憲公
于南京時南陽王文莊公爲他曹郎先生慕而師之
自是問學長裕而文詞日蔚翛然絕群比還中州則
中州諸生未有不下先生者弘治戊午先生舉於鄉
高第正德辛未舉進士推擇爲庶吉士先生在史館
讀中秘書雅有公輔之度會大學士靳公蔣公受
命教諸吉士獨器重先生署爲諸館長甲戌授翰林檢討

丁丑春

命同會試所取多海內名人是年四月考績

上嘉之 誥封其父中憲大夫毋太恭人已即請告啣

命馳里中奉

上所賜金緋爲中憲公太恭人壽里中父老榮之相告曰
往中憲公棄一太守如敝屣今厚發其嗣而席有餘
榮迺知中憲公信哲士哉辛巳擢南京國子司業先
生毅然修復師氏之教日端坐帷中與六館諸博士
弟子講授經業語載南雍講藁中蓋居國子三年士
習翕然釐於正矣嘉靖乙酉擢侍講學士視南院事

先是院署蕪圯官屬多不備即視院者又多傳舍目
之已遂鞠爲場礫先生曰茲豈非昔人所比於登瀛
地乎柰何以留館故令其若此乃括院中所儲公貲
得數百金又稍稍捐月俸佐之未數月葺治一新觀
者竊嘆曰郭先生來吾曹復覩翰林矣先生居院中
清逸寡營行坐手一書誦讀不輟一時公卿臺省遇
有

朝謁遷代輒束幣詣先生購贈言先生掇管應之各極
情致得先生一言者即士林傳布以爲榮丁亥奔中
憲公喪歸己丑又喪太恭人相繼哀瘁終禮辛卯起

復故官尋改侍讀學士典

內制壬辰春

命主會試掄品殆無遺俊先生以史臣嫻於辭令又數爲
朝廷得士稱任使以故受知

今皇帝有 詔進講 經筵又輒從講畢開陳化理啓沃
上心語載 經筵講藁中勿叙叙其大者嘗講尚書天惟
純佑命章末獻言有曰去操急之習而務惇大之風

上諭輔臣曰維藩言有所指其使寃言之於是先生草疏
不下數千言防民邪正士風辯賢才闢僞學罷選貢
復吉士崇師儒廣言路則其大槩也疏入

上多采納行之後又講尚書古之人猶胥訓告章末獻言
曰古人非止殷三宗周三王也聖如帝舜其臣猶以
逸樂戒之而舜不以爲忤此正胥訓告保惠教誨之
意也惟

陛下裁擇臣言

陛下德益光治益至矣未幾坐失頌白兔免官歸里中乙
未

上思舊臣及用薦者言召還先生官如故先生又進講大
學衍義

上甚嘉悅 賜金幣寶纒丁酉四月擢太常少卿兼侍讀

學士視院事是時朝士大夫見

上簡遇正人謂先生且入相當不負海內跂望又先生矯
健無異少壯時即平居未嘗輕餌一藥乃一夕忽忽
痰作竟不起嗚呼悲哉訃聞

上悼之 賜諭祭勅有司營葬事先生其可謂以榮名始
終矣配宜人胡氏蓋從先生官累封至宜人父貢士
名拱辰母張氏出宜人幼即沉靜動合禮範貢士重
憐之初貢士負時名視諸少年無當意者及得先生
所屬文一過即異之曰子豈非郭氏鳳雛耶遂與中
憲公約爲婚姻宜人既歸先生益竭孝謹佐太恭人

庀其家政歲時供賓祭曲極誠款已從先生宦兩京
邸中則時時束澤衣絢履使人起居二尊人即二尊
人安乃脫有不憚則布衣蔬食夜不帖席寢也暨二
尊人下世宜人毀瘠襄大事且終其身不食醢醢曰
吾舅姑弗食之矣其遇娣姒督臧獲嚴而弗苛至見
宗黨貧乏不能舉婚喪者又數以先生意周之此不
足稱先生良匹哉先生生成化乙未八月二十八日
卒嘉靖丁酉八月十九日享年六十有三宜人後先
生五年生而卒先一年享年五十有八子男一人國
子生名留側室陳氏出娶李氏女二人宜人出一適

岳舜俞一適李紹祖孫男二人仰山近山皆邑學生
以先生卒之明年四月十七日合葬於邑北原從中
憲公兆也嗟乎先生博極群書明習當世務持論慷
慨守正不渝立言根諸六經命意爲詩文詞采颯發
即尺牘人爭傳之居家孝友敦至羽儀中州在朝獻
納敷陳忠敬謹直不激不阿即董仲舒劉向無以過
也國學範士期於挽回頽俗斥絕標榜今先生已不
可作而海內學士家猶能誦說嚮慕雖無老成人尚
有典刑又曰天不憖遺老俾屏我后然則先生豈遂
泯乎昔先中郎嘗曰吾爲銘多矣唯郭有道銘無媿

色汝楠才不逮邕廼先生則洵乎有道家法也復何媿於銘銘曰

於皇季穆實始有號爰氏厥菜載命之郭奕世毓靈于彼中嵩篤生先生矯矯儒宗偕此哲儷福祚維基黼藻天室

帝曰予毗濟濟及門範之以樸庶幾古道先民有作維年盍求不弔彼蒼豈伊片石可述來芳瞻彼北原孔樹既蕃嗚呼先生綿綿若存

墓誌銘終

杏東先生文集目錄

卷之一

賦一篇

恭和

御製初夏西遊奉

聖母舟行賦

歌三首

觀河漲歌呈理河劉都憲

李翁迎

恩圖歌

剝樹皮行

樂章六首

仁廟樂章

迎神終獻

初獻徹饌

亞獻還宮

長短句一篇

椿桂鹿鶴圖壽王侍御父

四言古詩二首

隋魯篇為邊廷實題壽母鄭善果事

友桂卷為劉鴻臚父封君題

五言古詩一十五首

贈王子衡四首

別友篇
長松篇

佳人篇
蘭蕙篇

贈何子元工侍二首和陶韻

世壽堂為同年周御史作

喜雨篇

書見

會玉峰太宰宅得革字

會甘泉司成宅得夏字

琴溪少司成招會於雞鳴山閣得綱字

酬甘泉見贈

酬函谷見贈

酬琴溪見贈

擬古

七言古詩一十三首

題中丞東阜瓊林醉歸圖

題徙舍圖即孟母事挽邊廷實母

挽光祿少卿孫先生詩

題芙蓉精舍為司成王思獻先生

畫魚圖為魏國公題

會栢齋奉常宅得淮水曉煙

會函谷銀臺宅得齊字

鐵柯

石齋詩

薰風亭詩

壽陽谷先生

題愛菊卷

望雪

卷之二

五言絕句八首

正月五日往來西莊四首

今日吟二首

來日吟二首

七言絕句七十首

恭和

御製前次魚入舟追作

沙河候 駕

駕駐沙河 勅諭昌平官及耆老生儒

金山候 駕和涇野韻

金山候 駕冷泉所次涇野韻

晚坐至公堂二首 黃葵二首

再吟二首 惜菊二首

東阜中丞送菜 寄徐員外二首

七月七日題織女二首

和中川宮諭見寄韻因奉酬四首

田貞菴先生瑩上作二首

種竹二首

送張學諭之靈化

次湯陰飲李述之第有歌子曰暹雲曰裁雪者歌聲甚清壯述請留題席間書二絕付之

書時卿扇贈別

西莊賞蓮四首

苦熱二首

郊外書見二首

郊行二首

西齋對菊二首

書李醫士杏林春意卷二首

徐申之東園賞海棠四首

書金相士卷二首

春遊雜興六首

對雪六首

元夕對月

觀九龍池二首

送東阜中丞箋二首

鄴城別田廷友僉憲三首

庭中牡丹未開以詩催之

張孟復勘事回憇城外僧寺因戒酒肴相訪已而

大雨不果遂令人致之侑以此詩

僧房蘆鴈圖二首

五言律詩一百二首

扈駕宿

景陵果園舍中二首

扈從

陵祀畢先赴金山口候

駕有作和姚

明山韻

景陵果園舍中偶成二首

登玉泉山臨光洞二首 晴用少陵韻三首

喜谷菴太史過寺

秋日懷仲承子和二太史

遊城西蕭氏莊二首 泛舟二首和薛君采

送李子中進士赴蘇郡推官二首

送薛君采主事謝病歸亳三首

春丁 文廟分獻二首 送陸生分教鄒縣

五月二十日送華父出北郭因避暑慈恩寺有作
爲楊用修題扇面小景

送葛先生赴 汝府長史

偶成

貞甫遷居西城下喜而有作二首

存上人房和何仲默韻 存上人房作

送吳丞 送許思仁省覲東歸

僧房聞笛 送余生

觀出師三首 史館即事二首

石溪我山二君子夜過 都下寒食用子和韻

春日同館中諸子郊遊二首

除歲二首

送柳生

送徐生

昌平道中一首和北川韻

上陵

獻陵候祀

題劉元隆小畫二首

春日寄王子衡二首

寄劉遠夫二首

送李可大還縣

送楊天臣還縣

送高公次進士宰長洲

周伯明遷南京大理丞兼便道送毋

送魏典史

送童通判

寄張仲修

詔旌月橋義門

秋日閒居二首

爲人題畫扇

九日閒居

暑夜

聞聖駕還闕二首

戊寅除夕

送包生

送王宜學之潮陽四首

客思

送楊中舍還滇南

地偏

除夕二首

神樂觀禱雨

送傅希準憲副赴浙省巡海

送大理卿王公考績北上

會類菴宗伯宅

送李監正赴京考績

遊豐樂亭二首

後遊復作

登壯懷亭有懷道徵少卿亭道徵構也

會亭驛阻雨

見槐二首

行經寧陵飲喬太卿園亭二首

憂盜

再宿天界寺

挽泉河處士

客懷二首

卷之三

五言律詩一百四十六首

皇上 陵祀畢由西湖御舟還京二首

暑夜獨坐二首

冬野書事四首

苦雨

淮陰祠用韻

漂母祠用韻

冬暖

早春陌上柳二首

春郊二首

夜坐四首

同東阜中丞東郊尋杜處士

大雨二首

病起別業中作二首

夏日別業中作六首

堤上觀河漲四首

田居中作十首

中秋無月

即事和楊用修韻

送少叅進 表回廣東

送何仲升還巢縣

候朝即事

哭子二首

田封君歸葬蘭州

留還卷陳通判致仕也 送賈學士赴南署

送范以載赴南臺 送施聘之巡南畿

送李德周西巡便道省親

挽半隱處士 送崔生還榆林

送衛正夫進士赴武昌推官

送姚生還潮陽

蓮塘書屋為魏秉濟太守題

送劉華甫使 周府 挽王叅將

住上人房齋居有作 有感三首

送傅希準守太平 病起晚坐二首

病中聞垣弟訃乃大哭之二首

壽陸知府母 除夕偶成

愁

內丘縣南野寺小憇二首

東郊登岳君翰樓二首

北莊訪傅濟川表叔晚歸二首

田茂德田居

同震光震之遊菊莊別業二首

楊老先生坐作 喜晴

早發和韻 奉和道中即事韻

杏東別業三首

飲六叔西莊二首

別業間居二首

同明山院長登臨光洞二首

題盆栽花

和東阜韻二首

扈從 陵祀 行宮朝回登西山二首

得張東之副憲書有懷 和大齡來縣喜而有作

壽竇給事母

題乾寧世引 恩榮錄

洞庭春燕圖壽徐太史母

和浚川司馬九日韻 初冬經坡山

挽張大經都憲

使人新河訊彭給事

正月十五日二首

和韻兼贈燕泉少司空

送陳德英少卿謝病還閩

濠梁道中書感二首

次池河驛偶成用壁間韻

大柳道中

再過關山

晚過黃岳嶺

得劉希尹書因有寄

郊霽

郊行書見

金陵官舍四首

張德珎叅議便道省母

正月十六日二首

長坦早發

鄴城早發

不寐

望涿郡

次故城訪王伯圻亞卿乃兄

良鄉除夕四首

暫止良鄉有懷浚川司馬

良鄉有懷方山中丞

挽劉毅齋光祿二首

卷之四

五言排律一十八首

慶成宴上作十四韻

綸褒晉錫卷爲大司馬晉溪先生題二十韻

送劉遠夫赴鳳陽十六韻

壽少師厚齋先生二十韻

壽萬少卿父母七十韻

壽向御史父太守公七十韻

壽涯翁少師七十二韻

白崇之錦衣夫婦雙壽圖十韻

送張常甫先生督學湖廣十二韻

送孫貞甫使安南告即位也

送何勳伯御史巡浙江送立齋宗伯考績之京

送陳侍郎考績北上八韻

奉挽少師鵝湖費公十二韻

正月六日登鏡光閣和用修韻

送魯千戶寧以功授指揮僉事還南陽

送廖指揮涇守備歸德

送熊時振少叅赴廣湖十二韻

七言律詩八十五首

今上 登極朝賀有作

恭和 聖製丙申秋露既降祭 陵奉 聖

毋觀途中景作三首

扈 駕春祀喜晴 沙河 行宮候 駕

和松臯太宰喜晴韻 和託齋少宰韻

和韻三首

登龍池山

登玉泉山臨光洞 送楊都督領南京大營

送郭汝賢還江西舜弼太史內兄也

送唐守之使朝鮮告 即位也

送嚴維中侍讀掌南院

送吳瞻之叅政赴四川兼便道省其父司寇先生

世耕亭為用修題

張崇象有新樓登覽詩因和韻

送劉養和副使提學山西

晚秋出郊偶興 京

送高穎之少卿赴南都 新年

送鵝湖老先生還江西 承恩山房訪我山太史

寄岳周翰 送伍思謹正郎赴湖廣

元夕 聞邊警有感

秋鴈 送李舜卿宰南和

暑夜

邊何二奉常供事 孝陵用前韻見懷因疊韻

荅之

送吳應韶掌教亳州 過何仲默舊居有懷

和張崇象同邊汝明劉華父王舜卿宅上飲咂麻

酒

送翁知縣赴永新 介軒

蓉溪書屋為少蓉溪書屋為少司寇金先生題

三叔祖八旬代父作

和菊莊韻二首兼贈官諭溫先生父也

和陳魯南至日感賦韻 正陽門外候 駕二首

遺堂堂 送王庸之還縣

送張孟復副使兵備重慶

除夕用類菴韻二首

齋居柬王峰太宰蒲汀少宰類菴少宗伯

齋居和類菴宗伯韻二首

和華泉奉常郊齋韻二首

正月十六夜書懷

和蒲汀少宰郊齋憶僚之韻

春日同諸公登觀音閣 梅花水

神樂觀禱雨

九日二首

送張司寇之京

六月廿一日苦熱

丙戌

萬壽節習儀朝天宮和邊奉常韻

大行皇帝挽詩

正德十六年作

送少宰汪公赴

召北上

送寇子惇都憲赴大寧

送都憲邊公赴

召北上

送太宰楊公赴

召北上

送高都憲督漕之淮上

秋懷八首

和邊廷實登鳳凰臺次太白韻二首

會蒲汀少宰宅得離字

會栢齋奉常宅得題淮水曉煙

渡江

送嚴惟中侍讀考績如京

高肅政亞卿大宗祠堂

送顧封君還吳

封君給事父也

雪中

梧山司馬治水功成碑

濠梁驛圮甚亭屋半摧傾矣是夜不敢睡秉燭至

旦因作此留壁間以告後至者

瀛洲會中作

和許廷倫登觀音閣韻

太常寺南軒賞牡丹二首

雨不止

同諸君子遊靈谷寺

送陳君賜赴袁州府

送刑侍王載卿考績之京

暇日檢院中舊卷有作 送桑二守之開封府

殷文濟僉憲六十

送兵侍王汝溫赴徵

卷之五

七言律詩一百一十五首

恭和 御製謁 陵紀述

從 駕謁 陵三首 迎駕

觀 壽宮役作和韻

送周伯明中丞進 表之京

和紫山少司徒大同班師韻

和蒲汀吏侍除夕韻二首

再和蒲汀元日二首

陪祀歷代帝王廟和陳都憲韻

陳魯南殿講以使事至留都舊翰僚自玉峰太宰
以下凡九人共觴于天界寺魯南即席賦一詩
見謝少宰蒲汀李子首和予繼和之凡坐客咸

和焉

暑夜獨坐有感用韻

送靳大尹

宮柳

送呼生

懷親時家父仕
荊州府

送汪器之先生赴南雍

元夜客思

齋居和健翁韻呈子和

七夕和何仲默韻

內苑舟戲聞樂聲有作二首

送陳一卿督儲大同

西帥

送王德輝按甘肅

會所對酌

八月六日會所作

頒曆

至日侍班 奉天殿二首

齋居院中用少陵曲江韻簡同館諸君子

承天門候 駕聞大禮成即幸南海子

送張副使世祥之湖廣 即事二首

初歸杏東別業

西城新居兼簡翁張二君子

送李生還縣

中秋十五夜對月三首

送 駕南征二首和許思仁韻

對雪

九日買菊

萬壽節賀朝 奉天門書事

題王拱之首山書屋

烹鵝會中次東阜韻二首

雙嶼爲余君錫給事題

和吳仁甫除夜書懷之韻

元夜二首

送秋執中還溫郡

送馬伯循考功送母夫人還三原

京師端午有感

王子衡自松江還感舊叙懷悵然有作

得劉遠夫書因寄以此詩

春日遊岳君翰延翠亭 秋夜聞鴈

九月十一日同震光王氏莊賞菊二首

寄許思仁學士

寄吳仁甫張崇象二學士

壽傅君容母七十 中秋無月和東阜韻

九日菊不花二首

九日邀東阜中丞別業小集

和東阜韻

別業偶成

訊菊

別業牡丹盛開邀東阜中丞同賞

和東阜韻兼懷東岡二首

奉和師相序翁老先生詠閣中盆荷初開韻

再用韻奉贈

送貞甫太史南還

送王拱之大叅赴陝西 僉憲忍菴先生壽詩

良鄉元日於公館中設香案遙望拜 闕

良鄉有懷元日再題 送倫彥式祭酒赴南雍

奉壽少保閣老序菴李公

偶作二首

和劉遠夫七夕韻

七夕作

大社齋居詞林二首

夏日京邸懷杏東別業二首

送王宗周侍御按河南 送唐掌教歸楚

九日別業登高

荅王承恩大叅時有詩見寄

送周教諭赴陝西 送周司訓還蜀

代張尹送周司訓 至日

白鳩二首

送甘生還蜀生公望亞卿兄也

送張憲副回豫省

送丘主靜太守之撫州

送曹仲禮大叅還晉省

西莊晚歸

晚趨趙州城

途中漫興

次內丘遇風

入大梁尋和大齡不見用東阜韻

哭亡弟建夫四首

和東阜喜雪韻

送王德輝還郡

送胡邦忠如京師

子淵方伯自吳中道吾儀封歛然來顧見之甚喜

再茶即辭去別後却有作因寄上二首

和東阜對菊韻

和中川韻奉荅

送段時卿赴無錫

送邊汝明赴南光祿

和汝明留別韻二首

雨中飲杜處士草亭

水退口號呈東阜中丞

疊前韻再呈東阜

入山和韻

苦熱用少陵韻

和東阜中丞題杜氏亭子韻

勤夫哀詩

飲重陽二首

和貢院對月亭韻

和至公堂閱卷之作

詞調三首

晚秋感懷臨江仙

水調歌頭曲和桂洲韻

無俗念和馬泉韻

卷之六

記五篇

韓侯修廟記

祈門縣創建環谷書院記

南京翰林院重修記

柳溪書屋記

劉壽州修橋記

序一十四篇

贈大司徒黃山鄒公考績序

贈孟溪鄭先生擢南京太僕寺少卿序

送侍御朱大武三載考績序

送僉憲李天章之湖廣按察司序

送吳靜之副山東憲司序

送張孟復副四川憲司序

送僉憲盛大化序
贈浚川子序

送楊仲衡先生之興化序

送少叅王遠吉之河南序

送葉時舉之廣南序

送朱廷輝之貴州藩司序

送顧梁卿之廣東序

贈中丞南川陶公赴鎮序

卷之七

序二十二篇

贈侍御趙仲熙三年考績序

送太守游器重之登州序

贈楊推府序

贈劉杭州序

送馮汝霖令贛榆序

送王天則令東明序

贈王衛夫序

贈趙載道制酒序

送運判李先生赴河東序

贈陳嘉信序

送李載之丞日曉序

贈張僉憲序

送呂公兆指揮序

贈陰陽典術姚國和還信陽序

贈陳散官序

壽封監察御史霜筠劉公八十序

壽封君東村翁八十序 壽銅峰陳士元六十序

壽東溪封君六袞序

壽趙侍御母夫人七十序

壽畢孺人六袞序

壽東蒙封君暨配邵安人序

卷之八

序一十七篇

綱目前編序

壬辰會試錄後序

壬辰進士序齒錄序

序張氏世譜後

便道寧親詩序

高司諫出使詩序

送蕭汝蕭還汝南詩序

洛陽路自立先生挽詩後序

贈京兆唐應韶送母還楚詩序

送中丞申臺張公之遼陽詩序

讀白沙先生詩教小序 劉伯儒御史壽母詩序

李司空老先生壽序 送太學劉生歸省詩序

贈行詩序

送灤江王先生赴京詩序

守難

卷之九

墓志一十四篇

大明宗室奉國將軍一清墓志銘

明故四川布政司右叅政進階嘉議大夫李公墓

志銘

明封文林郎翰林院編修王公配封孺人宋氏合

葬墓志銘

明故工部司務楊公墓志銘

勅封監察御史胡君配孺人李氏墓碑銘

叅政傅公配安人郭氏合葬墓志銘

鳳翔府通判賈公夫人孟氏合葬墓志銘

明故襄陽縣知縣葛峰李君墓志銘

明故驛丞張公配安氏合葬墓志銘

泉石處士武君墓志銘

明故彭母陳孺人墓志銘

明故武母杭氏墓志銘 勅贈安人余氏墓志銘

勅封太孺人趙氏墓志銘

卷之十

墓志四篇

先子程番府君壙志 先妣恭人合葬壙志

故季父處士府君季母張氏合葬墓志銘

故叔父處士府君叔母朱氏合葬墓志銘

行狀二篇

南京戶部尚書謚文莊王公行狀

贈徵仕郎兵科給事中田公行狀

祭文一十八篇

南京翰林院土地祠躬建成遷主告文

祭南京戶部尚書文莊王公文

祭金員外治卿文

祭通判賈公文代父作

祭俞朝相評事文

祭北潭傅先生文

祭顧舟卿給事中文

祭大父贈刑部員外郎府君墓文

祭外舅胡公墓文

祭菊莊先生文代父作

祭解繼美文

祭五第文代父作

祭三第夫婦文代父作

祭外祖母趙氏文

祭崔母李淑人文

祭李恭人文

祭侯氏弟婦文

祭邊廷實母文

雜文一十二篇

渥恩晚福解

會約

書聯句卷首

書范文正公墨跡後

雜言

別言

策問

杏東先生文集目錄終

杏東先生文集卷之一



明太常寺少卿兼翰林院學士儀封郭維藩 著

都察院右副都御史門人德清蔡汝楠校刻

賦一篇

恭和

御製初夏西遊奉

聖母舟行賦

維

后皇之撫運兮荷

天命之靈長續

列聖

之不備兮

御天道以乘乎六陽沛

湛恩而陶斯世

兮朔南暨聲教之汪洋制作監於千聖兮禮明備而樂

嗶四靈爲之畢出兮海波爲之不揚方首夏之淑和兮湖

溷萬動即閩風與蓬島兮亦不可方

天子樂太平之

有象兮奉

聖母歷覽乎風光

龍舟遡波兮蘭棹翻

藻湖山增勝兮地景惟良

帝進霞觴以上壽兮矧百

具之允臧瞻

慈顏之悅豫兮

王心載寧仰壽齡之

無極兮亶

皇情愛日之未忘百寮欣欣有喜色兮合

萬民之志知人心之永戴兮而九圍已就乎一匡諄曰孝

為化原皇極敷兮虞舜武周與同趨兮張弛無端握道樞

兮戒無盤遊為燕翼之謨兮

歌三首

觀河漲歌呈理河劉都憲

崑崙西畔蛇龍居百泉匯成星宿海

河名也

少皞就燥金帝

沉大禹疏來幾千載怒氣凌風薄天門日月東西任吐吞

橫奔朔漠盪北極

河流入鞑靼地內二千餘里復折回

轉經秦晉入中原中

原土性踈更弱孟津東下恣噴薄角亢之野四十城十城

九城遭其虐

開封府境屬角亢分野河自孟津入府境始為大患

儀封為邑當下流

三河包絡如小洲

邑境內大河併二挑河在焉

南北東西接水涯村落

時時集鸛鷗頂來河漲疑海勢樹杪懸流注平地沒禾殺

木未須言决墓浮棺苦作崇須臾四野即江湖村墟飄蕩

人號呼浮尸隨浪委叢樹恠蛟爭食切長齒數日懷城來

往絕民無食薪憂惛惛城中萬命懸一堤人家咫尺鄰魚

鼈軍儲漕輓須運河無令此水北騰波千謀百慮驅南向

數城不惜隨漩渦 皇仁如天重物命匹夫匹婦安常
性 九重萬里應未知忍使無辜墮深穽治水今得虞司
空握符開府山之東早晚乘舟事疏導坐令萬口歌元功

李翁迎 恩圖歌

華渚流虹一萬丈真人應期五百年金屋椒房誕元子惟
皇錫福彌八埏我 明開國本至人 湛恩先及高
年客名器不假許冠袍公廩旋分更給帛吾邑李翁大耋
年鄉人愛之競稱賢中丞閱閱風流遠翁祖爲僉
都御史 處士聲
華林壑妍縣官拜 詔事肅將授粲承筐下白屋武夫夾
路辟行人彩旆迴雲耀群目翁兮翁兮樂何極烏帽醜顏

相應紅邑侯爲壽自行羊都諫當筵亦待筇翁甥張君爲
都給事中
賓客滿堂嘆不休乃知積善有餘慶酬 恩還須教子孫

努力讀書事 元聖

剝樹皮行

朝剝樹上皮暮剝樹上皮剝來且救眼前饑東鄰舉室皆
餓死乳下無人收小兒往年苦兵今苦旱南北東西俱愁
嘆死亡流離城半空縣主催科猶拘喚萬樹如雪皮不存
葉落枝摧下及根樹死吾生亦已矣於乎賑恤何日沾
皇恩

樂章六首

仁廟樂章

迎神

廟庭既潔籩豆具將有嚴工祝肅侯于祊雲衢漠漠鸞旂
央央 聖神來格顧此忝嘗

初獻

雲韶初奏神保伊臨載陳金爵薦此孝忱儉乎容息攸介
攸歆如天之德被覆斯今

亞獻

穆穆 仁皇斤斤其德旁燭無疆徧於四國奸懾政清
端旒淵默垂裕後昆享報無極

終獻

陶器如玉白虹氣揚有馨秬鬯我亨我將皇尸載喜降福
孔穰敬瞻英爽於赫有光

徹饌

制統如雪珍饌惟馨宰夫廢徹則莫敢寧羽干輟隊鐘鼓
告停僮僮而立共仰 聖靈

還宮

禮成樂戒 神馭莫留鸞隨仙旆龍挽雲輶無聲無臭
莫可求於昭在上與 帝同游

長短句一篇

椿桂鹿鶴圖壽王侍御父

靈椿千尺聳雲霧丹桂含香裊秋露玉鹿戀清芬白鶴遠
相赴玄圃閱風仙路遙物類相感如相招人說此圖竒我
解此圖意丹青運筆至理存却信金陵有人瑞椿高參天
翁兮永年有燁桂粟翁子如玉鹿可比椿之齡鶴可比桂
之清洵彼三槐家翁壽子更榮芳聲令望垂石城

四言古詩二篇

隋魯篇為邊庭寶題壽母鄭善果事

隋氏鄭果忠臣之子幼承茅土先公是似惟貴易驕惟富
易侈非有賢母曷臻厥美

賢母如何愛而有教察于有政欬先公是肖否兮斯怒若
兮斯笑小子順之厥聲孔耀

穆穆魯彥允矣有文溫溫令母教亦孔勤母邁于崔子邁
于果繪斯圖斯其傳自我

令母樂只 恩封祿食令子聞只詩則世式祿厭母心聞
彰母賢胡不壽考千百斯年

隋魯四章章八句

友桂卷為劉鴻臚父封君題

維庭有桂蔭厥軒止既培既深豐厥根止其枝猗猗葉翻
翻止君子友之有攸存止

桂之茂兮苾苾其香載遠載聞空彼衆芳有德維馨萬夫
之望君子友之云何不臧
桂之茂兮香毓其子依彼青雲載揚載起用誨爾後式相
猶矣君子友之適觀厥燬

庭桂三章章八句

五言古詩一十五首

贈王子衡四首

別友篇

季冬氣慘慄北風無時休雪霰被中野狐狸嗥路周舉頭
西北望浮雲正悠悠感時氣不舒慨焉別我儔孤蘭無遠

芳孤蓬無直抽同心而遠隔踽踽吾焉求君如千里鶴
翅隨雲浮我如失侶鴈延頸傍鶴鴝鴝不可隨失侶良
可惜明義苟相敦於焉慰晨夕

佳人篇

梁國有佳人容華如穠李淡妝謝鉛朱被服羅與綺雜佩
綴瑤琳芬芬間蘅芷長嘯步重闈香風正迤邐良人慕高
義玉帛聘於此合婚兩相投膠漆未足擬中道成乖違棄
置空房裏朱顏常自澤機杼常自理中饋既不缺錦段亦
充委良人不見蒼終歲勤曷已

長松篇

亭亭千尺松鬱鬱生高岡歲暮霜雪厲柯幹益昂藏群鴉不敢巢飛飛集鸞鳳貞心苟不摧終焉置明堂

蘭蕙篇

蘭蕙產中澤異體而同芳枝葉發華滋猗猗含瑤光美人愛芳草移植向中堂移蘭動蕙根移蕙分蘭香香分不足傷但傷道路長

贈何子元工侍二首和陶韻

何公豪傑士經濟術不踈伊昔弱冠年已登承明廬許身比夔契藻政還詩書宦履經四方川航陸走車列曹躋卿佐素志甘布蔬犯顏正大禮忠義古人俱官高寵亦極剛

主此其圖吁嗟富貴者齷齪將焉如

降衷乃恒性於我豈云踈學問固在茲如行赴其廬魯尼欲無言義畫非著書至理苟冥契千轍合一車嗟今媚學子耻食糗與蔬稽古取青紫志與俗儒俱哲人有卓見讀書有遠圖夙心欽聖軌深造誰能如

世壽堂爲同年周御史作

昔聞壽誼翁百有十六歲見宋歷有元及我 大明世聖祖尊高年 召見示慈惠珎羞荷 勅陳 龍光獲切睇力役蠲子孫 恩澤何汪濇積善慶有餘眉壽故相繼三傳皆期頤海內疇與儷茲事未前聞休風在後裔世壽

揭堂端翠榜輝雲際肯構重古人有來引無替

喜雨篇

丁丑夏四月余歸自京燕于時苦多雨簷溜日涓涓親友
慰我至泥濘妨周旋徂秋少見日平地皆成川涇麥化爲
蛾腐稷蕩爲煙十室九艱食有命皆苟延既冬不見雪入
春旱及泉夏來雲氣高赤日耀中天黃塵起南畝枯草迷
東阡百穀無綠色于何望有年我歸停俸給甘旨需原田
願雨意彌切廢食亦忘眠五月十三日密雲忽盤旋冥冥
龍駕度燁燁雷帶牽庭槐延暝色雨聲枝上傳初來如散
絲庭草漸舒卷須臾似傾盆階下水潺潺乃知帝德大膏

乳彌八埏豈田尚可種黍苗亦可全黍以爲酒粢豈以具
粥饘飲食隨所給聊以樂目前因之念庶徵感應理則玄
今 上皇極主雨暘胡爲然恐多狂僭臣天戒故昭宣
百爾有位者敬哉消其愆

會玉峰太宰宅得革字

温温太宰公翩翩塵外客妙齡揚 帝庭高步升鸞掖

大道陳 講筵虚心奉 明辟伊昔貳南銓有 詔佐宗

伯出入廊廟間一一資籌畫別來幾星霜再喜睹章鳥問

字願及門考德欣奉席乃茲開寵宴暮樽秩有核道言發

蘭臭聒耳謝絲革余本蓬心人何幸同今夕狂態不復存

困蒙亦已割而况醉以酒飽德殊無射

書見

朝出宿西門

宿州西門

周道正如矢旁有餓死人一父與一子

問何知其然相去僅尺咫小大雖不同宛宛貌相似身無一縷蔽掩埋將誰委獐犬窺其側饑烏翔亦適須臾肉不存白骨蔓草裏念之我心惻潜然面有泚吁嗟井田廢于今千五祀民產遂無恒貧者日轉徙所以穀不登死者如亂蟻况今牧民吏十人政九批刑罰及催科視民等犬豕罪歲豈爲達委數絕非理從此減稅斂從此均田里庶哉民可活殷富乃伊始

會其泉司成宅得夏字

嘉辰諧良晤華筵張廣舍鮮鱸行素鱗其盤薦紫蔗椰肉

傳粵城

其泉廣人筵有此物

異味輕吳炙其泉子主人邀賓及閒暇

卿相雍雍來儼如群仙下道術比臯夔文學見游夏高懷薄層雲至論闡元化予也鄙人流而何敢方駕清宴數追陪腐儒蒙獎借令德飽已多周行更深藉爾汝情相忘不欣亦不訝歡娛未竟日留連戒長夜弛張各有時大道本無罅醉出俱受福主賓拜以謝

琴溪少司成招會于鷄鳴山閣得綱字

辟雍師表地見說太丘良禁館移賢史經幃下

帝旁

諸生望山斗吾道在門墻鵬路雖殊運蘭叢本共芳瀛洲
八舉席蓮界一傳觴虛表開華閣簷前掛太陽松濤送餘
響山翠淨浮光勝地還宜賞良招豈效狂主人迎倒屣穉
子候焚香雪餌筵驚見所薦糖餌甚白酥花客愛嘗以糖和酥為梅花形甚美
寧辭深斝酌相勸舊鷓行擁坐雲飄練娛人鳥弄簧情欣
文字契興極主賓忘臨檻因懷古登高或納涼消沉悲晉
代指點問吳疆詎敢從耽樂翻疑已太康應慚葭倚玉真
似網隨網賤子交游忝諸公德業揚忠貞竊自許感激願
相將莫負祗今約他時一考祥

酬甘泉見贈

湛公生南紀矯矯鸞鶴姿雅志聖賢匹服事白沙師公受學陳
白數言啓其鑰斯文知在茲隨事輒體認天理恒由之白
教公隨事體認天理故公之成德由此德成氣亦和宛若謝人為幸予友君
子屈指多歲時鸞掖奉周旋虎幃更追隨翰林國學予與公俱為同僚
猶草傍蘭叢故臭亦潛移勝會訂新盟高朋本舊知聊發
肝膈言報此瑤琳詞

酬函谷見贈

許公生吾鄉而實天下士諫垣及詞林公由給事中改檢討名實動
人耳闢尹排忠賢播棄連父子公父太宰東厓公甚剛直劉瑾嫌之時公為檢討公
弟嵩臯為編修並放於家屏跡函谷間結廬桃林裏尚友論諸儒虛心

探元理卓見真寡儔註經兼補史

公於諸經皆有說春秋終周敬王三十九年通

鑑及綱目皆始威烈王二十年中間七十餘年之事皆缺公考群書爲綱目前編三卷

高臥名益揚

累薦

詔方起南來佐銀臺得朋胡不喜相期以崇德慎

言及正履新盟合諸賢嘉會慚授几如彼麻中蓬亭亭賴不倚狂歌布腹心聊繼德音矢

酬琴溪見贈

昔予與陳公載筆供史職及予出辟雍舊任公來即褒貶聞大義直溫蓋群慝出入先後間一一蒙引翼尚憶公歸吳予亦覲親側一別歲十更撫膺嘆茅塞留都幸合簪官閒况餘力登覽吊六朝講習求一德如眇相與明知跛杖

斯植所以離索人感此慰心臆昨枉瀛洲篇直與國風逼短吟報珎投默默發慚色

擬古

美玉處重璞至寶含光精深山一拳石誰知價連城偉哉卞氏子神識天生成得之驚且喜持獻楚王庭世主重魚目兩遭刖足刑所惜嘉瑞隱三獻靡有生一朝割其璞虹氣通天明因之以傳國運祚係重輕刖足亦蟲噬封侯一蹄涔雖執小人諒聊以明吾心

七言古詩一十三首

題中丞東阜瓊林醉歸圖

先帝龍飛三載春禮闈貢士當戊辰

天子臨軒賜

清問登對藹藹皆吉人就中英俊稱劉子六籍精研及群
史筆驅風雨薄青冥手弄虹蜺光旖旎嘉論嘉猷世所關
直詞正氣真犯顏謾誇三策有董子無復至言數賈山

御賜狀頭呂涇野

仲木別號也

行誼文章動天下先生遜居第

八人公論嘖嘖猶未舍上方有宴設省堂

聖主禮賢

覃恩光上公元宰俱陪席威儀禮樂從虞唐羅袍稱身

淨如拭宮花照眼成五色獻酬冉冉集群仙塵世瀛洲真

可即歸來駿馬紫絲鞭酡顏烏帽色相鮮紛紛九陌觀如

堵此是男兒得志年男兒得志須報

主溫飽由來非

所取高官大爵亦等閒要使勲名照今古先生宴罷三十
秋向日壯年今白頭叅藩總憲恩威地三晉全蜀處處謳
歸臥煙霞已三載在在蒼生望風采九重有詔來傳巖
霖雨終須遍瀛海老夫蹤跡謾相如半世奔走今巖居一
落塵網違心性感事看圖悔讀書

題徙舍圖即孟母事挽邊庭寶母

孟母昔居近墳墓孟子築埋學所作市傍携子遷在茲街
賣又學賈人爲再遷乃居學宮側嬉遊揖讓真可即母心
欣然遂定居芹風絃韻滿屋廬眼中不見小人事戶外長
曳君子裾養蒙已得作聖意古稱義方將焉如戰國之時

稱有道七篇之書照穹昊德尊千古已爲師才高一代行
卒老試問當時徒舍人俛仰應自慰懷抱吁嗟賢母流風
長衣被來世昭回光鄒嶧華渚本連秀晚有邊母傳其芳
邊母傳芳能成子有詞直造風雅場詞場獨步官亦起憲
府崇銜已金紫北堂戲綵養方隆萱圃飛霜花早萎曉牕
臺鏡自熒熒夜月機絲空纏纏夫人已矣即泉途魂招不
來空號呼高風長留在宇宙於乎二母真齊驅於乎二母
真齊驅但看人間徒舍圖

挽光祿少卿孫先生詩

嘉陵江水深更清滔滔經帶略陽城驚浪排雲蔽樓櫓洪

濤簸岸迴日星時危江山自失險一葦徑渡綠林兵殺氣
連野煙火斷戰聲殷地旌旗橫花縣之宰百夫特感時撫
膺心悽惻城下賊騎周數迴城上嚴兵俯相逼力屈城破
身被創手刃數人口罵賊鋒刃紛紜贖可誰黯黯魂傷江
水黑江水無情日夜流遊魂無定空悠悠蛟龍驚避移穴
窟馮夷呵護隨沉浮鴈門萬里骨不返漢地孤忠名久留
天地茫茫恨何極江草江花長自愁

題芙蓉精舍爲司成王思獻先生

芙蓉誰種開元寺故使幽標占幽地有花只待秋時開不
學桃李當春醉幽人讀書借禪房離紛謝囂比羲皇十年

心定色相界萬卷胸涵星斗光五月芙蓉吐麗藻花開無
數映晴昊蜀主城頭錦色鮮衡岳峰前秋信早造化無心
花有神鏡中消息報幽人凌虛已擢月窟桂謁 帝仍
看杏苑春花神人事如相卜志喜還以花名屋屋前想像
拒霜枝處處猶堪媚幽獨

畫魚圖為魏國公題

天孫剪練風吹落落向蒙門闔珠箔太傅得之重於金却
付丹青恣揮擢丹青運筆如有神寫作海波濶無垠十洲
縹緲不可見三山何處求嶙峋海底巨鱗激水溢聲如千
雷萬雷疾高浪排空三曜迴驚濤動地群靈出群靈百恠

紛翱翔中有神鯉橫飛揚噴沫天地忽昏黑振鬣島嶼揮
毫芒旁挾諸子駕雲霧直上龍門跨天路浮沉常與鼉鼉
辭奮迅時帶風雷驚忽從雲際灑銀河須臾下土俾滂沱
萬物含潤盡生成歸路虛無渺滄波太傅圖此真有取分
鑰留都鎮南土眼中不忍見饑民惠澤時時哺膏乳我作
此歌頌有成他時準擬向承明吁嗟普天半枯槁幸畢此
志澤群生

會栢齋奉常宅得淮水曉煙

秦帝當年鑿此河運槌負畚丹衣多方山破碎石委地江
水奔來成逝波逝波東下到扶桑王氣依然在建康帝圖

轉盼已陳跡二三萬世何荒唐事去人非餘千載水不停
流河不改水氣結成兩岸煙時與雲霞闔光彩滔滔常伴
兩儀浮漠漠輕籠六代丘石城虎向鏡中臥鍾阜龍疑霧
裏遊煙消沙白水如練水光曾照昔人面昔人已逐東逝
波水光還許今人見吾曹遊宦俱在茲况是同心遊舉卮
何公東道真賢主八客忘形不復疑酒酣侃侃道言出致
君堯舜各有術劣予最在諸公下高義欣承免尤失人生
聚散如水煙忽來忽去隨風旋得歡莫厭頻傳酒已看白
髮催流年

會函谷銀臺宅得齊字

銀臺邸第 鳳城西暇日邀賓喜到齊地望卿陪俱俊傑
文章造化各端倪午停飛蓋簪初合暑坐層軒氣自凄禁
鳥鳴簷輕呂動宮雲垂戶瑞陰迷衣冠肅肅儀何重僚案
師師道可稽會入瀛洲欣舊侶飲徵文字出詩題人間盡
史休圖像天上星躔已聚奎在案巒壘列聖賢象生食餌
具麟蹠席間所供麪食皆象魚獸之形歡留竟日非絲竹笑引同心破町

畦八客向時苦難滿百年此地幸相携桃林元是詞林望

函谷一號桃林洛下聊從白下棲一見交情忘爾汝屢驚才力敵

鯨鯢間曹自信官猶隱浮世由來聚復睽館閣追陪容我
在伊周事業讓公躋江山佳麗依 王造松菊荒蕪想故

蹊宴罷東行開醉眼鍾陵斜擁玉亭低

南京翰林院鍾山之麓院後有玉亭

鐵柯

君不見澗邊長松枝拂雲又不見山頭古栢根穿石材大
自占乾坤秀幹老驚看龍虎眷團陰鬱鬱疑擁蓋鐵柯森
森似布戟十月朔風霜更繁群木搖落衆芳殘天地黯慘
忽閉塞此物昂藏當歲寒稜稜那容附女蘿飛飛時見棲
雙鸞先生之操過鐵石先生之才真棟梁直道昔避御史
馬勇退今謝尚書章高名長留在宇宙松栢之柯安敢望

石齋詩

西蜀之山天下奇岷峨連亘插坤維翠色遙映錦城曉青

障高臨漢主祠迴谷風煙互瀆洞中峰靈氣生華滋相國
愛山兼愛石移石作齋謝丹碧坐裏誤疑峰到眼靜中如
見雲生壁風雷日奮臥龍岡江漢文明草玄宅憶昔相國
居齋中四聖之學傳涪翁大才已懸公輔望擢桂還爲總
角童十九射策中 天子載筆出入蓬萊宮出入蓬萊
百僚式幹旋造化無聲色爲霖已化石上雲柱國還自齋
中力大節立 朝示巨防巖巖萬仞誰能逼 廊廟祇今
須重臣高齋劍外益嶙峋交加徑路多松菊呵護門墻有
鬼神功成會向齋中去却恐安車更問津

薰風亭詩

東屏活水何瀾瀾東屏西偏鑿成池滾滾源泉自不竭滔
滔晝夜只如斯石甃波澄明素練竹欄影落翻蛟螭雪嶺
高標入吞吐錦城佳氣接淪漪池內種蓮幾千朵水面迎
風自嬾娜花開疑競紅粉妝房滿都填碧玉顆為峰飛向
太華巔華山有蓮花峯名社標在長江左慧遠結白蓮社月下飄搖露葉
翻時有鮫人咤珠墮池邊新構薰風亭蘭楣桂棟雲為屏
水光映戶雙扉動花味浮簾滿座馨道人獨坐揮白羽高
啓瑤牕誦六經已見儒宗重錦里又從雲路上青真身依
青真踐台斗君子由來當大受為霖已試導泉功補袞還
自種花手 帝庭左右須羽翼邦政紛紜賴析剖薰風

吹蓮香滿亭道人天涯重回首

壽陽谷先生

陽谷先生隱陽山早歲讀書山之下柴門已取繩為樞覆
棟還將茅代瓦山靈守戶少來客世念塵紛那到心窮年
不廢手中帙暇日還彈膝上琴腹中詩書羅萬卷筆下文
章成五色聲名耿耿屈流輩文戰棘闈人莫識先生拂袖
歸山中齷齪耻與世爭名研精盡得軒岐術手握造化全
群生 武皇徵醫選倉俞先生應 詔為第一御藥房

裏真獨步醫院僚中更高出綰綬垂牌幾十年承 恩賜
衣還賜錢祇今謝事居京邑乞藥門巷人相堪矜寡顛連

疾分死先生濟之心獨喜十百千萬不論金走獺出虵身
便起高手鴻術世誦功人心潛與天心通神明扶持身強
健七十年來顏如童初秋華堂氣森爽壽域歌聲連雲上
令子稱觴陪諫僚雅調雄詞在高傍吾知先生樂未休高
風逸韻道者流服食藥餌半仙裏功成直上崑崙丘

題愛菊卷

黃菊本是秋圃花獨向霜前占年華孤高自與俗眼忤隱
逸惟有高人誇金錢爲花翠羽葉真白那許容蜂蝶幽人
情性故相便悠然對此心神愜芍藥近侍牡丹王桃李爭
春出短牆嬌姿艷色時所好誰向空園采寒芳

望雪

夏月苦雨雨不休冬來望雪望轉愁燕京臘月如春暖黃
塵滾滾風颼颼高天無雲淨如拭田父農夫空歎息宿麥
難將救饑餓遺蝗終見成螽蟴九重有詔事精禱鬼
祠神壇遍灑掃京尹率屬走無停香幣肅將間蘋藻安得
上天回哀眷天孫乘雲削冰片青袍朝士貧更癡官舍蕭
蕭忍寒顫陰陽消息本難知月令之理亦可推天子
玄堂順冬令從今喜見雪霜時

杏東先生文集卷之二

明太常寺少卿兼翰林院學士儀封郭維藩 著
都察院右副都御史門人德清蔡汝楠校刻

五言絕句八首

正月五日往來西莊四首

新正喜雪霽四野絕氛埃時見歸寧女雙雙陌上來
日暮荒垣靜雪深野徑迷賀年村叟醉扶曳過前溪
積雪連墟白巖風振樹鳴冒寒歸騎晚村路罷人行
荒戍隱新月空林棲暮鴉醉歸不辯路犬吠過村家

今日吟二首

今日忽已過明日却還來今日復今日白髮催提孩
今日非今日古人亦今日今古升沉裏今日一何疾
來日吟二首

來日來何多來多在日少在日化來日人安得不老
不愁來日多只愁今日速總髮學古賢無成髮已禿
七言絕句七十首

恭和 御製前次魚入舟追作

入舟魚自有靈通信史相傳事不空今日 聖明邁周

武波心躍出觀 飛龍

沙河候 駕

君王致孝 陵園轉輦路娛人花樹紅雲蓋當空隨玉輅
山靈扈 聖馭祥風

駕駐沙河 勅諭昌平官及耆老生儒

吏治民憂 聖主先董官訓俗有臚傳 行宮一道

天書下父老歡呼祝 萬年

金山候 駕和涇野韻

玉輦來臨草木榮從臣金紫耀花明雲韶只在 行宮裏

天上時聞彩鳳鳴

金山候 駕冷泉所次涇野韻

烹茶稚子汲山泉有客來遊不用延坐對青春發高興石

欄點筆和瑤篇

晚坐至公堂二首

棘圍落日柝聲催
簾外青衿取次回
突兀高堂明月裏
文光交映轉崔嵬

近來學子務新奇
背理違經茫不知
今日堂中坐監主
力扶文運翊昌時

黃葵二首

葉葉翻風龍爪動
枝枝垂蓋越羅裁
朱明至日炎威裏
一點丹心耿不灰

洛園富貴說姚黃
太萼踈枝此可當
誰遣仙姝臨小圃
隔

欄擁出五雲裳

再吟二首

手種此花剛兩月
黃雲朵朵滿枝頭
由來物色皆從土
異種還應出雍州

堦下種葵十餘品
尋常紅紫滿闌干
叢中此種元殊衆
碧葉細花正耐看

惜菊二首

風急雲寒向晚陰
中園一望正蕭森
霜前惟有黃花在
叢棘深蕪且莫侵

小圃秋深連夜霜
菊花朵朵盡垂黃
西風莫更驅冬令
留

取東籬一段香

東阜中丞送菜

芥烈芹香屈肉味嘗新先辦煮吳粳中丞高望元無比分
我東園一半清

中丞海內擅名流布素同心到白頭分惠嘉蔬申夙好由
來不厭味相投

寄徐員外二首

嵩陽一臥已三年泡質龍鍾鬢雪鮮聞道故人猶矍鑠杖
藜時上玉山巔

山稠樹密路難尋浮世風波不到心海內蒼生望安石徵

書早晚下雲林

七月七日題織女

常時天上垂玄象此夕人間架綵樓莫以巧心牖兒女願
將妙手挽河流時河水大漲為邑人患

年年乞巧嗔人巧我亦今年乞巧人願試神功拯民患可
能降水即生塵

和中川宮諭見寄韻因奉酬四首

東阜莊前記別時中川行時予送至東阜莊相別干旌南向已相思春來
剩有臨池夢雲裏翻嫌過鴈遲

尺素驚看剖鯉時藏來懷袖不勝思滄洲釣慣臨書懶莫

恠狂夫問訊遲

聖主求賢側席時傳巖形貌入宸思玉亭遺事編須早

南翰國初事蹟最多予徃在院時欲編成一帙以存典故屬奔喪不果為中川行予曾以是屬之黃閣調

元 詔不遲

溪友樵翁共語時紛紛世味澹無思老來一種惱人事懶整衣冠見客遲

田貞菴先生瑩上作二首

東軒舊是論詩地正德二三年予讀書東軒先生屢過論詩樽酒相留去每遲

今日城東拜高塚秋風原上草離離

傷心欲作招魂賦倚樹還多掛劍情惆悵不堪追往事晚

風斜日淚縱橫

種竹二首

西村移竹到東村淇上清風入小園雨裏栽培易生長春

來應自有兒孫

雨餘移竹侵晨至露葉泥根種即生他日琅玕拂雲上堂

前還有鳳來鳴

送張學諭之霑化

文體儒風異昔時可憐流弊日相滋憑君力挽還淳古佇

聽東人誦得師

次湯陰飲李述之第有歌子曰遏雲曰栽雪者歌

聲甚清壯述請留題席間書二絕付之

三載相違苦憶君
今宵秉燭共論文
樽前不惜如泥醉
况復清歌有遏雲

曾聞白雪郢中歌
此子能傳却更過
一曲滿堂寒颺飈
香風飛絮變陽和

書時卿扇贈別

西亭餞罷千山暮
南浦帆開六月中
好去闔閭慰群望

無錫

之闔閭也須教百里滿仁風

西莊賞蓮四首

栽蓮三歲惟舒葉
此日西莊却見花
疑是宓妃臨洛浦
仙

裾飄縹爛雲霞

山莊花木幽於洞
處士高風勝似仙
鉢裏何須勞呪語
池中爭看擁青蓮

池裏荷開十丈花
不須方外訪仙家
雨來翠蓋連珠轉
波動紅妝帶影斜

處士清修動慕賢
開池插藕比青蓮
捲荷行酒客爭飲

時捲荷葉貯酒勸飲之隨手香浮瑋瑁筵

苦熱二首

老夫氣弱不禁暑
每到炎天愁殺人
安得層冰生脚底
森毛髮聳精神

散髮披襟半似狂，漫膚流汗甚於漿。閭風弱水應無暑，我欲從之道阻長。

郊外書見二首

秋禾遍野無餘地，秋後人人盡苦饑。祇爲公家征索重，閭閻赤子但存皮。

麥後農人已告饑，忍饑耘耔汗交頤。禾成但了公家稅，誰念炎蒸作苦時。

郊行二首

黍禾亂颺風前穗，徑路全無雨後沙。碧樹重重一聲犬，始知深處有人家。

森森高樹聳前林，片片浮雲出遠岑。忽憶往年行路日，却教雲樹惱鄉心。

西齋對菊二首

佳菊移來西郭陬，冷香踈蕤若相求。癖予愛坐常扃戶，獨爾幽齋共晚秋。

高菊亭亭共我齊，踈枝經雨淨無泥。尋芳不到幽香歇，空傍園蕪向日西。

書李醫士杏林春意卷二首

名山遊遍復金臺，仙老携壺何處來。靈藥活人不知數，滿園紅杏拂雲開。

紅杏如霞萬樹齊垂垂金果壓枝低仙翁睡起巡園笑春
鳥迎人作意啼

徐申之東園賞海棠四首

徐家園裏海棠開照眼紅妝對酒盃倚檻搖風春睡足却
疑妃子返魂來

嬌容艷質妬紅霞縱是無香亦可誇除却牡丹真富貴不
知近侍讓何花

異態天孫剪不成若教解語便傾城何如多種梧桐樹留
取清陰待鳳鳴

十分春色占無餘穠艷天成妃子如縱使一朝飄散去便

應落水也沉魚

書金相士卷二首

我愛金生談相術枯榮修短只由心時人不識天無意苦
向區區骨格尋

金生傳得麻衣術談相來過共啜茶老子行藏久無意玉
亭一笑對梅花

春遊雜興六首

朝陽橋下水東流水上輕輕花絮浮莫恠春光容易去由
來身世亦蜉蝣

玄明宮裏假山高官劉瑾所建山後山前遍種桃地主如今不

知處桃花亦自委蓬蒿

美人邀我出城東

同年王舜卿也

東海西山一望通宇宙金湯那

有此浮光虛翠接

皇宮

柳外奴牽白鼻騮花前行酒坐團沙東林道士不知姓遠引童來送茶

野人汲井灌春畦汲盡重泉畦不泥近日城中無菜買陌頭婦女遍挑藜

煙花一望接齊梁却憶前年鬪虎狼汎掃從知勞

聖

主普天今日見春光

對雪六首

夜來已覺風驅雪曉起忽看雪趁風最是城西好光景玉
山一帶映 金宮

雪集空庭白更深即看天外失遙岑江淮恐滯南巡 駕
欲上重霄掃太陰

回風急雪迷昏曉天畔雲微日忽斜可是 帝京春色
早垂垂 宮樹盡開花

春來已苦連朝雪嫩柳天桃氣不舒非是玄冥專節候天

妝 宮殿待 龍輿

春庭曉起看春雪已逐風流旋作堆纔見遙天微有日浮
雲無奈去還來

朔風吹海雪紛紛日暮猶飛北浦雲
旅舍蕭條還自遣最無衣食是邊軍

元夕對月

三更已盡月西傾古塞迢迢月半明
可是遊人不知夜猶將絃管闋新聲

觀九龍池二首

文皇疏鑿龍池水池裏飛龍已向天
物物如今蒙沛澤萬年功德在斯泉
萬壽山根泉水清九龍噴出似天成
方池靈乳常流潤一到人間物便生

送東阜中丞箋二首

新詩妙墨重璠璣詞苑如今誰更如
我有楚箋常媿負送君聊備換鵝書

荆南舊出小羅箋在篋珍藏已有年
奉贈墨臺待清興他時一紙幾千錢

鄴城別田廷友愈憲三首

君辭諫省赴臺臣我乞君恩暫省親
今日相逢途路裏飄蓬俱是宦遊身

邯鄲忽漫逢旌節兩日同行慰所思
咫尺鄴城更分首青山斜日共悽其

相逢漫說三生幸

廷友有今日相逢三生有幸之言

却憶蓬瀛舊日遊廷友

與子同為吉士

君向西川我東去青山不解管人愁

庭中牡丹未開以詩催之

重苞如襲護嬌姿紅紫伊誰可豫知安得東風齊着力吹開翠幙見西施

張子鼎復勘事回憇城外僧寺因戒酒肴相訪已而大雨不果遂令人致之侑以此詩

小寺荒涼駐使旌驚雲飛雨暗高城勞君準擬携樽去野徑泥深不可行

僧房蘆鴈圖二首

霜冷蘆花雪映波飛飛鴻鴈晚來多全身須傍雲霄上菰米叢深有網羅

冥冥萬里志難馴群向江湖濯羽新胡地楚天隨去住炎涼無自到渠身

五言律詩一百二首

扈駕宿景陵果園舍中二首

勝地今重到塵勞得暫蘇性將流水湛

舍前有九龍池水經過

跡與

片雲孤黃鳥如娛客青山似識吾不才叨近列扈

聖

媿文儒

石壁垂蘿蔓苔堦錯錦紋松陰驀院入松籟隔巖聞樹老

常巢鶴墻低不礙雲起居應自適况復絕塵紛

扈從 陵祀畢先赴金山口候 駕有作和姚

明山韻

望望金山口蒼蒼樹色分可人求友鳥適意出巖雲嚴衛
張千幕連營列六軍祀 陵雖舊典但恐 聖躬勤

景陵果園舍中偶成二首

屋靜當崖下庭虛接水涯門前有九龍池水經過出門逢鹿友拂帽

落松花簪紱羈常苦山林興未賒吾衰思採藥何處是仙

家

帳殿候朝退栖栖虛對春雲來山有雨鳥下院無人勛業

嗟垂老行藏媿此身已懷飛動志歸去臥河濱

登玉泉山臨光洞二首

捫蘿上雲洞舉手引霞觴神斧開山骨吾人坐石堂豪華

隨變盡文字獨留長洞內刻耶律楚材詞二首俯仰應多感憑軒對夕

陽

巖際開仙洞洞口刻七真洞數字浮生始一臨日來更虛白雲起轉

幽深勝跡留天地豪遊自古今石牀森爽極坐覺豁煩心

晴用少陵韻三首

冥冥彌月雨忽忽滿庭風天畔開晴景陌頭望老農對門

宮樹碧映日海雲紅饑鳥噴泥去啾啾向晚空

西山好晴景石樹錯生文岸舞將傾柳天浮不盡雲水禽
爭晒羽巖獸出求群郊外知清絕何當解俗紛
四郊雲氣盡斜日在平林積潦明城郭遙天散晚陰湖光
浮闕迥虹影落山深猶幸存農事真堪慰此心

喜谷菴太史過寺

太史過文會禪門起自開庭花拂衣動簷雀喜人來念我
能相就評詩得屢陪擊蒙方有待况是不群才

秋日懷仲承子和二太史

費子今江右張郎亦衛濱天涯少知己秋日正懷人雲色
虛蓬閣鷓鴣行侍紫宸相望千萬里言笑迥難親

遊城西蕭氏莊二首

綠水明華館芳林繞翠微魚馴聞柝出

池中有魚擊柝
即出因餞之鳥

狎近人飛花塢留斜日風潭起斷霏幽探殊未已既醉不
知歸

城外名遊地蕭莊占水頭花浮循岸入林斷出亭幽雲洞
留宿榻芳津載酒舟徑須拋冕紱常此坐消愁

泛舟二首和薛君采

散步臨池脚移尊上小舟綺羅明繡岸簫鼓媚芳洲鷺起

群驚棹林空響應謳桃源幽絕地今日一來遊

斜日耶溪上蘭舟鼓吹行導川懷地主對酒聽波聲浪轉

鷗灘響風牽荇帶輕塵纓聊暫濯因見古人情

送李子中進士赴蘇州郡推官二首

姑蘇今大郡錦綺擅茲鄉時論人多避官清自不妨放衙
知訟絕閉閣檢書忙愛爾雄才力佳聲會遠揚

遠別從今日躊躇憶昔時聰明非素見文字與相知子丑

科予所取士也試文甚佳官自才名重刑隨喜怒私訟堂應有暇為寄

早秋詩

送薛君采主事謝病歸亳三首

謝病譙城去移家盡省違望隨雲共遠心與鳥同飛江海
朋難得風塵爾獨歸星園堪習靜到日掩郊扉

世難須朋友吾賢今復行臨岐一分手落日不勝情才力

時皆好榮華爾最輕會當尋大隱君采號大隱山人潁水濯塵纓

毫郡連儀邑河流本帶襟儀封去毫甚近旋因送歸客忽

自動鄉心岸拆深藏樹帆輕倏過林離亭一悵望斜日起

層陰

春丁 文廟分獻二首

齋堂坐無寐承祀夜方中獻禮分東哲台儀接上公時少

齋奉命行禮升壇穿栢霽出殿引春風對越神如在精誠竭寸

衷

孔廟當春祀儒紳仰德時生民誰與聖萬世獨為師廣殿

鑪煙合遙天曙色遲薄躬叨獻爵奔走媿攸宜

送陸生分教鄒縣

陸生文學彥還喜領儒紳絳帳春長滿青氊官自貧絃歌
多士習鄒魯故疆鄰桃李經時雨門墻次第新

五月二十日送華父出北郭因避暑慈恩寺有作

避暑招提境雲壇坐轉清老僧供茗椀穉子具棋枰荷雨
明珠墮松風爽籟生便須咨慧遠聊與訂新盟

為楊用修題扇面小景

拄杖穿微徑携琴向小亭便須為地主不必問山靈風起
松鳴籟雲來座擁屏卓哉忘世士羨爾賁巖扃

送葛先生赴汝府長史

路向方頭去舟從潞水開藩僚左史貴朝命宿儒來晚
漲侵潮岸秋雲出海隈懸知王國待賈傳况高才

偶成

榴庭長夏靜幽事坐來增雀趨花間蝶蛙捎草際蠅風櫺
書自掩香篆案常凝望裏分山色城西翠萬層

貞甫遷居西城下喜而有作二首

客裏得心知芝蘭臭味宜甘貧同宦况養拙共襟期接近
依仁里過從仰令儀茶瓜應可辦相待坐論詩

伊昔同年友今遷吾舊居堂虛堪坐客齋小尚容書砌草

憐承展庭花憶荷鋤論文或不拒猶得過前除

存上人房和仲默韻

禪林堪避暑露坐貝宮傍上界聞齋磬諸天散佛香簷雲
旋結暝竹雨欲生涼從此便幽寂頻過慧遠房

存上人房作

官閒類小隱鎮日坐招提對竹心兼爽逢僧話不辭殿高
雲接近壇古樹參差向晚涼風發鈎簾看奕棋

送吳丞

捧檄瀏陽去三湘是勝遊雲開衡岳暮水落洞庭秋政試
千家邑官連百里侯勿云丞尉小俱是有民憂

送許思仁省覲東歸

落日離筵罷青山首獨回啼鶯任觸忤飛絮與徘徊津樹
連雲遠春帆帶雨開庭闈歸到日獻壽撥金醅

僧房聞笛

僧房聞弄笛清怨起商音况是思鄉客兼聞折柳吟壇雲
留塔際天果落松陰曲盡聲如掃桓伊不可尋

送余生

君歸我猶客對酒惜離群相送野橋外那知岐路分水城
明遠練山閣澹斜曛錦里秋光近佳聲幸早聞

觀出師三首

將軍生塞上人說曉戎機繫肘明金印披身炫鱗衣邊人
困狼虎守帥望旌麾寵極須酬 主無忘累骨歸

吉日王師出貔貅左右分 天威嚴北伐將令肅中軍

鐵騎翻胡幕調戈指塞雲定知清絕漠會待奏華勛

中貴承 明詔親提二萬師牙邊明節斧麾下擁偏裨齋

賞內帑錦叅隨紈袴兒酬 恩須滅虜撫士慎無私

史館即事二首

華館金門左雕欄玉水邊池連雙 鳳闕身近 九重天

傳 旨中官出投封閣吏旋瑤牕春日靜獨對石渠編

文檻通瑤陛朱門向玉池陰陽分殿閣日月繞梁恩 朝

放聞鐘近宮深覺漏遲編摩五豎敢竊祿媿 明時

石溪我山二君子夜過

長安門巷靜永夜漏聲遲二妙能相過一尊坐不辭燈前
金粟落天上玉繩移喜對同心友幽懷得暫披

都下寒食用子和韻

客裏逢寒食飄飄任此身鄉園違處遠歲月數來真聽鳥
心多恨看花影自親所嗟羈絆跡空負物華新

春日同館中諸子郊遊二首

春光滿郊甸樂事亦幽遐野寺過聞梵芳林住爲花天邊
淹宦跡客裏易年華好景朋簪合追陪到日斜

孤寺春橋外荒村野漲潯煙花迷近塢雲樹護遙岑勝地
陪新賞閒官稱遠心興來不知倦聽鳥過東林

除歲二首

京華復餞歲栢酒共椒盤人事愁中盡年華鏡裏看樗才
叨直館 聖代媿空餐搖落天涯客羈懷強自寬
除歲除難去年年見歲除漸看雙鬢改祇覺此生虛守夜
頻添火思鄉更撥書踈燈與濁酒相對慰躊躇

送柳生

早別燕臺下夕臨潞水隈山河百戰定舟楫九秋開野迥
孤雲細天高旅鴈哀送君無限意且復盡餘杯

送徐生

亂定客途穩涼生木葉稀天涯有遊子此日獨南歸津閣
明秋水山樓帶夕暉送君空悵望自覺願多違

昌平道中一首和北川韻

百里昌平道相將是友生祇緣謁 陵寢暫與出承明路
外群山遶花前數騎迎春光斯在眼聊復逐間行

上陵

上陵日將午整步入紅門陵門也玉殿春長在金燈夜不
昏山行嫌石角雲臥就松根咫尺臨朝次齋明待獻尊

獻陵候祀

陪祀 陵園上昭昭夜景清巖風疑掃葉松籟若傳更久
坐山精避長吟谷鳥驚天高浮玉氣轉覺萬山明

題劉元隆小畫二首

天畔茅亭小扶筇自徑還山中心迹遠隱者性情閒獨抱
琴爲友無勞客扣關濯纓隨孺子長日水潺潺
幽人耽閒寂步履入林臯野服荷堪製山蔬蕨可挑草亭
團樹色石壁亂雲濤自愛隨群狙原非與世逃

春日寄王子衡二首

故人違日遠渺渺望南徐海上殊風土春來慎起居鳥啼
衙吏散花滿訟堂虛南北俱萍泛何時共結廬

言念同心友三年別

帝京官知屈縣佐天與起詩名

江海何連斥

子衡凡三謫皆在江淮之間

乾坤此不平相思多夢寐春

草滿池生

寄劉遠夫二首

舊日中臺彥如今百里郎相看渺雲樹不見屢星霜細被
春宵冷瑤琴白日張同心俱遠隔行思坐茫茫

海上霜威凜蒲中惠政多

遠夫先按遼東謫蒲城故云

賢豪每難遇天

地獨如何感此時相憶臨風一放歌温温令君子悵望阻

山阿

送李可大還縣

君來未兩月匹馬又南歸稍稍聞鄉話匆匆捲客衣天長
關樹渺春盡野花稀前路風塵滿逢人慎所依

送楊天臣還縣

鄉心千里外歸興二年餘相送同杯酒何時有鴈書江村
船繫柳津市饌烹魚慰我長相憶征途慎起居

送高公次進士宰長洲

宰邑吳中去相看別恨牽離筵依浦樹送客上江船星座
宜人政琴堂解慍絃他時循吏傳應是使君先

周伯明遷南京大理丞兼便道送母

拜 恩南國去渺渺問江城家便仍將母官遷且列卿晚

帆隨月轉秋月併潮生况是尊鱸候還鄉慰遠情

送魏典史

運朝抱病坐今日送君行天地開秋雨山河信客旌離筵
冠蓋擁到邑吏人迎去去勤官守因風問政聲

送童通判

曉日一樽酒秋風萬里槎掛帆向江路宿棹倚灘花別駕
官階貴行天驥足賒民貧急衣食勤與課桑麻

寄張仲修

驄馬南巡久停雲積思深山川杳難越夢寐轉相尋自漉
秋分酒誰同月下琴向來惠詩句多謝啓予心

詔旌月橋義門

月橋隱君子尚義衆皆知簪紱違時好雲山與性宜家聲
傳夙昔 天語表門楣范老真先達鄉中自得師

秋日閒居二首

東軒日無事啓處任朝曛午幌看書靜秋庭晒藥熏形容
驚白髮事業媿青雲性懶逢迎少從人說離群

省覲承 朝旨田園得暫還未能拋冕紱祇合媿雲山書
亂隨童帙詩成擬自刪秋來况多病盡日掩柴關

爲人題畫扇

孤舟去何極漭漭水連空野渡鷗灘浪江村酒幔風波光

遊宦女澤唱起漁翁恐是悲麟者乘槎向海東

九日閒居

黃花九日節白酒晚秋成盈把同誰嗅高歌且自傾歸鴻
急暮影落葉闌風聲懶漫真予癖登高無復情

暑夜

暑夜披衣坐槐邊懶動身樓高星傍戶院靜月隨人未覺
纖絺薄寧辭短篔親更深頭上濕應是露華新

聞 聖駕還 闕二首

近有榆林信 天王轉節旄應知塞垣靜但恐 聖

躬勞衛士爭迎 輦都人喜獻醪千官朝禮罷佳氣與雲

高

雪裏黃麾轉雲間 紫闕開千官迎 駕入 九廟喜鑾
回中貴還拋甲親軍罷結枚無由陳羽獵空羨子雲才

戊寅除夕

孤燈照長坐對影若相陪此夕除無盡浮生老易催庭煙

暫檀火俗以此夕焚火樽添已春醅七日立春 明日年

華改霜莖入鬢來

送包生

送子燕臺下相看對夕暉酒從別處罷人在望中違寒水
潮聲細遙天鴈影微應知歸去樂彩服拜庭闈

送王宜學之潮陽四首

侍從金闈彥南荒放逐臣驛亭留瘴海候卒雜賓人感激
匡時論飄零泛梗身去留同是客相對益沾巾

遠送秋林外相看白日西懷人猶駐馬導吏已前蹊炎海
雖遷所閒官即隱栖最憐膠漆地無計止分携

逐客深秋去天南萬里遙雲山兼百粵邑里接諸苗桂發
愁春瘴雷喧懼海潮心安餘道氣那復計飄蕭

謫宦南荒去飄飄一葉舟清時見直道滄海是名遊筵外
青山暮行邊碧樹秋願言慎行止庶以慰離憂

客思

京華復歲暮宮跡與年深搖落悲生事羈栖見客心愁長
隨白日用苦盡黃金載筆空無補清朝媿列簪

送楊中舍還滇南

丘壠昆明外仙郎展祭歸松楸餘氣色昭穆有光輝直日
違春殿花時虛省蔽天南與薊北萍跡兩依依

地偏

張君讀書處幽事獨堪尋隱几花當面窺簾鳥對吟客稀
沙徑淺地僻草堂深坐裏塵囂斷悠然稱道心

除夕二首

庭前蕪松火綠酒暫須親除夕常爲客流年老逼人江關

嘆世子天地腐儒身醉裏題詩坐燈花落故頻

除夕聊杯酒更深坐不休年侵歡盡減歲去客還留行止
應吾道羈棲豈食謀世情難入眼心緒萬端愁

神樂觀禱雨

乞雨來神觀齋明對上玄心從傷稼碎眼爲望雲穿江淺
龍移窟山焦樹有煙安能泛銀漢挹水洒平田

送傅希準憲副赴浙省巡海

長民多善政副憲屬新恩載斧驚山嶽分臺鎮海門鯨
波番楫遠瘴渚島夷奔澤國應安堵觀潮坐水軒

送大理卿王公考績北土

江南與薊北相望是康衢舟楫通諸道雲山帶兩都奏功
此行邁取別亦須更謁帝應垂問安邊好獻謀時大同軍亂

會類菴宗伯宅

宗伯南來日瀛洲舊侶多論詩常見及奉席得相過飲愛
登仙會吟成伐木歌古人崇令德應戒舞僂僂

送李監正赴京考績

乘春發彩鷁報政向承明宦業兼三氏今之欽天寔古之義和氏保章氏之

職聲名重兩京岸容催放柳林意欲啼鶯最是年勞著殊

遷定列鄉

遊豐樂亭二首

往來二十載茲亭始一登舊構逢初煥亭自六一公後即廢今陳知州則清

乃重名遊喜得朋太僕楊實夫溪流常宛轉山勢互憑陵

塵鞅明朝發重過恐未能

我到當初夏斯亭恰及成林泉還勝跡豐樂舊知名無復

人呼應六一記中所述滁人遊覽之猶餘鳥弄聲悲歡真

異感因見古人情

遊後復作

茲亭方丈地風物四時清泉自松根出雲於石上生山靈

應久寂今日更多榮從此繁遊覽瑯琊未可尋瑯琊在此山之南有

醉翁亭因此亭廢人皆遊瑯琊題詠甚多今此亭成瑯琊當不得獨勝矣

登壯懷亭有懷道徵少卿亭道徵構也

牛君懷自壯新作壯懷亭澗水浮堦淨巒煙落檻青風流
餘藻構文字賁山靈道徵自亭記到此嗟予晚相思醉復醒

會亭驛阻雨

山驛終朝雨淹留故國東未知天地意妄擬歲時豐隴麥

丹如掃先是麥葉有黃埽如塗附謂之黃丹麥皆不秀至是盡濯去之林花隨欲空親闈

望不遠安得馭長風

見槐時南都歸槐下展席為老親上壽

庭槐今不見屈指已三年直榦平樓出槐在樓前清陰並蓋懸

雙槐也引風飄舞袖留月照開筵虬影如相憶依依近我前

予往年詠槐詩有院翻虬影坐來疑之句

昔去瑤樓下今看已及樓繁陰不辯日爽氣欲生秋煙裊
晴雲結風徐午籟幽南來初展席樂事更相求

行經寧陵飲喬太卿園亭二首

喬子幽棲處郊扉帶晚霞園林方十畝錦繡爛千花地遠

神仙宅名高御史家太卿先為御史論文許重過百往不辭賒

勝地欣初賞高賢荷共陪柳邊聊駐馬竹裏漫行杯花徑

風來掃雲亭客到開幽探殊未已落日苦相催

憂盜

賊盜當今日縱橫未可言聚群潛近莽薄暮犯重門毀室

人奔命焚關火徹村獨憐千萬姓愁絕向黃昏

再宿天界寺

蕭寺今重到幽懷誰共論僧間風掃院客臥月窺門身世
憐虛度山川厭屢奔上方清磬發深省欲何言

挽泉河處士

泉河翁已沒空自見泉河落日生悲浪長風響逝波園陰
思種樹磯雨憶披簑月旦鄉中事公羽女南人遺題應更多

客懷二首

客舍鈎簾坐春庭過雨昏起遲忘盥櫛午轉問饔飧簪紱
羈身世鶯花忤意繁誰尤自貽感寤寐念丘園

白日深庭靜新晴晝景長病居勞客問藥至許兒嘗夙夜
懷朝謁時已蒙旨復學天恩切對揚士臥病尚未朝見青袍淹侍從
鬢髮已蒼浪

杏東先生文集卷之二

愚叔肇祺頓首拜

愚叔肇祺頓首拜

愚弟肇祺頓首拜

愚肇肇祺

肇祺 卷卷

愚弟肇祺頓首拜

一() 二() 三() 四() 五() 六() 七() 八() 九() 十()

愚弟肇祺頓首拜

眷生()

肇祺肇祺愚弟肇祺頓首拜

一()

二()

三()

肇祺肇

肇祺

一()

一()

二()

三()

肇眷眷肇

肇

一()

祺肇祺

一()

二()

肇祺肇祺

一()

二()

一()

祺祺祺

一()

二()

小弟弟肇祺頓首拜

一()

一()

一()

祺肇祺

眷生張達頓首拜

一()

眷生薛肇祺頓首拜

愚弟

愚弟肇祺頓首拜



杏東先生文集

杏東先生文集卷之三



明太常寺少卿兼翰林院學士儀封郭維藩 著
都察院右副都御史門人德清蔡汝楠校刻

五言律詩一百四十六首

皇上 陵祀畢由西湖御舟還 京二首

玉水靈源近

即玉泉水也

仙舟錦纜長橫汾羞漢武在沼憶周

王魚見開圖瑞龜游報壽昌湖邊雲爛熳萬衆睹

龍翔

仙源接瓊島桂楫引

天遊紫氣低籠幔黃龍起翼舟

巒鳥旂拂碧樹鳳吹遶芳洲在藻同周樂 恩波浩蕩流

暑夜獨坐二首

默默垂頭坐濛濛露濕襟苦炎多病體去酷切時心鼓角
凌風過星河帶月沉吟詩解煩促忽忽已更深
假寐何曾着虛庭坐起中火陰雲易雨毒熱夜無風解慍
煩輕笑聽詩任小童安能泛槎去一憇廣寒宮

冬夜書事四首

長郊望何極漠漠欲迷津野水浸村徑雲堤擁縣闈負暄
投樹鳥驅犢趁墟人靜久倦行路厭看衣上塵

閉戶幾經月出城若勝遊中丞三盜徑司馬百尋樓路經

莊荒戍連雲木寒塘起鶴鷗更憐河漲後廢屋鳥群投
路斷嫌溪阻林昏知樹稠寒瀉帶龜坼暮靄逐雲浮敗堵

委叢草初秋經濟流歲饑仍患盜舉目轉生愁

漲退輿梁圯人逃屋宇空村居寒近水林路晚多風握粟
歸春婦無衣拾麥童褰帷聊注目在在見民窮

苦雨

旬日苦霖潦農人空怨嗟奔雲色似海飛雨點如麻石起
俱爲燕庭喧已產蛙何當補天漏吾欲問神媧

淮陰祠用韻

矯矯登壇將明明報主恩山河誓難保淮海廟空存爵里
舊題主君蒿如在魂誰知殲楚烈曾不庇兒孫

漂母祠用韻

飯信與追信論功孰可祠請看興漢業奚帝救人饑毋感
酬金日吾憐遭罵時宗臣流澤久漂媪竟何為

冬暖

冬日暖如春春寒凍殺人兩儀俱失職二氣遂乖陳星鳥
觀難准羲和測未真運時惟北斗何事不平均

早春陌上柳二首

早春陌上柳樹樹弄柔條近暖爭舒眼迎風慣折腰傍松
輒無色伴杏却增嬌焉比忠臣節不隨板蕩消

春光何處見弱柳發南枝嫋嫋微含綠搖搖欲躡絲風樊
揚故性晴圃長柔姿二月應憐汝長亭有別離

春郊二首

春郊新雨霽異竅鼓微和雲彩明於練溪流碧似羅鶯花
繁二月風壤帶三河邑境內大河一挑河二望望西莊近經年始一

過

出門晴日麗風物漸多加歷歷鶯啼樹茸草覆沙旋車
避低柳捲幔看開花望裏春駘蕩長吟酬歲華

夜坐四首

獨坐虛簷敞時將白羽揮風前花有味雨後暑無威鼓角
聲催夜星河潤到衣舊諳鸞鶴調誰向理瑤徽

苦暑坐來久徘徊夜欲分月餘半牕照雲細滿天文行止

身無累衰迷意自欣仰空待遼鶴一問廣寧軍遼陽廣寧卒拘巡撫
坐久侍童去悠然獨倚楹夢兼身共穩心與夜俱清鶴狎
依堦臥烏栖繞樹鳴茫茫群動裏眇爾託吾生
暑中苦煩鬱坐裏謝紛拏小榻支當月輕衫掛在花驅蚊
不用婢止渴但留茶銀漢仙踪舊何時一泛槎

同東阜中丞東郊尋杜處士

中丞出遊日春野淨無沙細柳微沾雨狂風不惜花麥深
迷小徑樹密隔征車灼灼桃林裏知爲隱士家

大雨二首

風驅鳴雨至雲氣暗雙扉掣電驚虵影奔雷喪七威平堦

水沒草侵戶潤沾衣恐是群龍戲相携海若飛
傾盆雨何急簷溜瀉鳴泉忽訝龍翻海虛疑水在天落魚
泳堦際歸燕墮樓前爲問巫山女能無濕翠鈿

病起別業中作二首

茅齋久不至今日一開門冉冉榴花落纍纍桃實蕃野鴉
欺鶴子蔓草上松根物理自消長相看何用言

一病幾彌月起行溪水濱青山不負我綠水有閒人蛛網
封棋局鷗沙委釣綸竹林理荒穢那惜汗沾巾

夏日別業中作六首

長夏園林好宜人綠樹陰山當榻擁面雲共我無心白髮

經旬櫛清尊竟日斟南風時解愠不用理瑤琴
繞合千章木濃陰共碧滋鶴迎杖藜客鴉引出巢兒寡過
頻看易陶情自味詩登場麥在眼且得樂清時
時清足閒暇吾老愛林泉野性惟踈放樗材合棄捐榮華
違俗好耕稼與心便日掩郊扉坐無人索酒錢
流水空人性閒雲在我前寓懷豈多物會意即欣然今古
俱爲夢豪華亦可憐青林任偃仰省慮勝參禪
園裏分群動含生各自娛龜游曳荇帶蝶困抱花鬚遷木
鶯求友捎蟲燕捕雛由來正性命物物總同吾
白雲覆茅棟紫蔓引晴沙戶有山人屨門無俗士車澆花

憐蟻穴釀蜜看蜂衙行倦松陰歇童來問煮茶

堤上觀河漲四首

秋漲如知候奔流匯作淵津喧爭渡客堤泊捕魚船禾黍
滄波裏人家白浪邊何時脫此厄我欲問蒼天

河漲立秋日水來真有期河漲四時皆有今年立秋日即漲憂心繁似縷

散步一行堤岸帶揭根柳波潛迷窟螭畝禾俱爛死何計

拯民饑

上堤一長望渺渺失平原萬里從經紀河自崑崙行萬里始入中原孤

城任吐吞幾時趨大陸禹時河故道猶自出龍門夏后神如在

相迎止橫去聲奔

萬落沮洳裏人人泥滿衫村邊集群鷺樹外轉孤帆下里
懷胥溺中鄉阻載芟馮夷頻作虐何日見民誠

田居中作十首

郊扉少車馬尋訪半門生問字窮幽眇吟風樂性情園瓜
連蒂摘河鯉帶鱗烹况是同心者衰翁省送迎

前場觀打麥後畝更催耕私計雖糊口明農合用情柴荆
臨夕掩鵝鴨趁群鳴俛仰衡茅下悠悠任此生

一別雲霄侶常從畎居看花不扶杖淨竹每携鋤雪餅
淤田麥絲羹灌圃蔬老懷無外累猶自愛觀書

南浦鄰漁叟東家得老農笑談如有舊朴野喜相從鮮鯽

臨溪買香杭取穗春飯餘尋鶴去坪上自扶筇

潔掃無時廢空堂似府居壁間不懸畫牀上賸攤書地僻
衣裳懶形忘盥櫛踈漁樵近知已日日款吾廬

吾老安田里村居獨愜情食雞待賓客種黍給粢盛酒熟
樽常滿畚登食不營林間無一事自喜老昇平

林下居三載寧辭木石親客猶呼學士我自逐農人鑿井
因澆藥開池爲畜鱗閉門謝道者性不喜燒銀

予豈東方朔沉浮金馬門回天慙辯給得罪守田園捲幔
煙霞歛投竿鷗鷺喧回思奔走地北望欲消魂

垣竹生涼細庭蘿引蔓深薄田多負郭幽樹久成林世態

難開眼榮名耻掛心時時招野叟爛醉拓桑陰
卜築雲山裏都無市井喧聞雞不見路隨鶴乃知門犬獲
中原兔童收近牧豚此間少塵事何必在桃源

中秋無月

不見中秋月開軒只獨吟有懷成浩嘆何計撥重陰
斜侵幔簷風暗動琴南飛憶烏鵲激切故鄉心

即事和楊用修韻

胡騎高秋動風塵紫塞陰羽書傳報急內地被圍深
主寧論命憂時自切心單于誰可斬懸賞萬黃金

送少叅進表回廣東

高呼謁帝罷解纜復言旋叅伯諸侯長南藩嶺海邊
歸雲依浦樹飛鳥赴江船百粵瞻旌節無令待隔年

送何仲升還巢縣

日暮離筵罷青山對寂寥人從燕地別路入斗城遙
墟火昏催騎河水曉渡橋雙鳥雲際遠還此識王喬

候朝即事

朝帝隨群彥棕棚坐接聯午門仙仗動西內近臣旋
苑樹鴉聲集宮樓暮景懸闕開免陳奏先已聽傳宣

中官先傳旨云
犯綸音的免奏

哭子二首

恨極將誰訴愁多只晝眠哀傷真薄命荏苒及衰年後事
今如此殘生祇可憐空將萬行淚洒向晚風前
嬉笑無由見倉悽淚亂垂不仁吾自咎天命汝何知痛極
憐心折愁來劇鬢絲苦懷那可遣欲作問天詞

田封君歸葬蘭州

旅櫬西歸遠賢郎挽紼行山禽隨素幔野老看銘旌 恩
已承 龍誥魂猶識塞城無由掛徐劍落日淚縱橫

留還卷陳通判致仕也

西川有佳士從宦早歸來自喜還餘祿人憐未盡才採苓
雪嶺下垂釣錦江隈狎狙兼馴鶴相看兩不猜

送賈學士赴南署

玉署分 新命仙舟向舊京藻添龍虎地名滿鳳凰城春
渚花迎棹芳津柳拂旌江山待詞賦登眺有餘情

送范以載赴南臺

故人南國去芳草滿汀洲落日同傾酒春風獨放舟雲中
孤樹渺天際大江流到日乘驄馬寧無感舊遊

以載昔卒業南雍

送施聘之巡南畿

細草晴沙路輕風動使旌林花迎騎出谷鳥向人鳴憶昨
同趨漏舍悽獨送行觀風時有暇擬賦石頭城

送李德周西巡便道省覲

問俗臨三晉寧親過魯中山川驚載斧鄉里羨乘驄酒獻
春杯綠袍將豸錦紅百年人子意此樂正無窮

挽半隱處士

嘆惜高人沒獨留半隱名江山失寵色猿鶴有哀聲漫擬
招魂賦空餘掛劍情春風吹宿草又見壠頭生

送崔生還榆林

公子榆關去銀鞍稱遠行天隅勸別酒雲際望歸旌野迥
邊烽細山昏戍角鳴更聞追虜騎行止慎前程

送衛正夫進士赴武昌推官

名郡南湖上之官即勝遊風塵雙客鬢江漢二行舟日落

川原暝雲涼草樹秋兩鄉千萬里相望倍離憂

送姚生還潮陽

北極揚歸旆南暝接故鄉風塵行嶺表桑梓憶潮陽海味
迎秋美椰樽待客香會當拜家慶彩服舞高堂

蓮塘書屋爲魏秉濟太守題

魏子讀書處蓮塘幽更深晴光浮翠榜潤色上瑤琴鷗鷺
時窺席龜魚慣聽吟由來清絕地何處着塵襟

送劉華甫使周府

紫闕承王命黃河問去津建親知漢典睦族識堯仁鄴

國瞻雲近

華甫父仕此因便省親

梁園作賦新民風關史事咨訪莫

辭類

挽王叅將

將軍今不見大樹獨依依
匣吼失龍劍血斑餘戰衣
叅戎勞已久昨土志多違
聞說榆林外羌戎喜馬肥

住上人房齋居有作

齋居假僧院三日謝相尋
聊與叩禪理還能清俗心
諸天魔避呪三界磬生音
神爽不能寐孤燈明夜深

有感三首

幽薊奔豺虎乾坤動甲兵
如何當泰運坐見失承平
縣破惟流水村空但列營
朝廷仗馮許急爲掃撻搶

承平廢戎事盜起即橫行
草木淒兵氣山河闕戰聲
家書長不至羽報近多驚
感激慙無補私心願請纓
盜賊交梁兗東南殺氣平
營張宋祖廟箭入魯玉城
郡邑日流血轅門時請兵
將軍已金紫誰復肯捐生

送傅希準守太平

出守辭青瑣分符視列侯
掛帆江路未宿棹暮潮收
郡劇無云苦民勞亦可休
由來二千石天子賴分憂

病起晚坐二首

獨坐秋堂上新晴病起時
風螢明亂照露草暗生滋
心倦甘書廢身羸與藥宜
無言愁正絕排悶一題詩

雨過階除爽西堂坐轉清盆榴秋帶實簷雀暮多聲官散
聊容拙才踈敢用名度簾明月色病起不勝情

病中聞垣弟訃乃大哭之

思劇翻增苦愁多祇損神病來吾憶弟書報汝非人老父以書來示云垣已不為人矣蓋不忍死之也腸斷燕臺下魂飄濁水濱風前萬行淚點點血沾巾

憶昨送行處河邊各自醺那知離別後即有死生分泉湧
淚無盡天高聲亦聞羈懷重悽楚何日視孤墳

壽陸知府母

仲秋開廣宴賀客舉芳樽高會瞻金母名家重柳村知府父御

史別號也簫聲新壽曲豸錦舊封恩令子天邊下筵前樂事

繁

除夕偶成

城闕逢除夕羈人祇自嗟未能逃世網空此送年華壯志
時看劍閒情欲泛槎無言轉愁坐長嘯落燈花

愁

晝日惟便臥愁心耿未除有身還似贅無地可圖居戀
主仍叨祿思家祇望書達人委時命嘆息復何如

內丘縣南野寺小憇二首

招提深樹裏小徑草叢遮地僻常無客僧貧不具茶空壇

立野鶴廢院長閒花延佇青山近
虛疑處士家
野寺臨周道開門對遠峰
空堂無肖像老樹有懸鐘
騎吏沽村酒厨人具午供坐餘頗
踈快林際翠煙重

東郊登岳君翰樓二首

秋野登樓爽高天逐望傾川原
隨斷路雲樹抱孤城
簾捲微風入牕懸夕照明凭欄
看沙鳥萬事已忘情
縹緲重樓上迢迢俯百尋
飛雲簷外影高樹棟前陰
邂逅成幽賞登臨稱夙心
癖予耽野趣移坐向東林

北莊訪傅濟川表叔晚歸二首

處士家河上延賓有草堂
膾魚行美咲秔稻屬新嘗
林表

牽風色籬西薄日光興闌携手出
相送過前莊
落日催歸騎飛鴉集成樓
臨河村徑斷抱樹晚雲稠
樂事諳鄉曲羈棲感宦遊
從來山野性今日遂幽求

田茂德田居

城南田子宅河外獨家村
林有煙霞色門無車馬喧
園春栽藥草沙暖散雞豚
不識鄰翁面吟詩獨閉軒

同震光震之遊菊莊別業二首

不見菊莊叟含悽遊菊莊
琴樽猶在列榆柳自成行
草覆經行處塵盈舊坐牀
層軒存結構對酒祗堪傷
別館春城外留賓錦席開
青林延住馬黃鳥勸行杯
樂事

隨雲散愁心傍暮來所欣君子德終宴得相陪

楊老先生瑩上作

大老承 恩葬佳城實在茲孕靈多異草紀德有豐碑祠
屋雲依棟松楸鳥護枝未能忘接引再拜起深思

喜晴

漸覺簷聲斷徐看雨脚收遠虹垂海樹微日上城樓樽酒
傾誰共書籤晒自抽有秋如可望庶慰杞人憂

早發和韻

欲曙星猶在初春氣尚寒幃帷行遠道烹割戒晨餐霞彩
舒山綺松陰結翠團嚴程催導騎飛埽集朝冠

和道中即事韻

輦路今時別風光舊日同金沙駐仙蹕河水繞離宮時作行宮

於沙河之巖花發林容麗雪衣山勢崇 園陵斯祐在 皇

運正無窮

杏東別業三首

棄置歸鄉里林居亦自如予心無係者物理有盈虛晒藥
問餘畧看題整舊書閒門容老懶敢謂故人踈

偃仰空齋裏鑪香竟日焚雲林依舊隱猿鶴免移文決水
通畦潤看花隔坐熏應慙荷篠者四體未能勤

起處誰能辯柴荆户不開藥欄茂草罷溪脚荷鋤回掃徑

從花落鈎簾聽燕來郊居寡迎送締服掛條枚

飲六叔西莊二首

邀賓際殘雨展席向秋堂隔樹鳥聲細垂簷雲意涼
醉開新黍熟果摘早梨香言笑諧家慶那知小阮狂

萬柳深籠院雙槐低蔭堂遠林收宿雨薄暮散新涼
饌出河魚美蒞登架的香噀噀古人戒不敢效清狂

別業閒居二首

白日茅齋靜深林獨掩扉摘花香在手倚竹翠生衣
野外無拘束人間有是非亦知歸不早丘壑尚含譏

僻地經過少翻宜退老身臥看雲近榻吟愛鳥陪人
就樹

開樽酒當風岸葛巾升沉那足道投轄信吾真

同明山院長登臨光洞二首

巖際開山洞浮生始一臨日來更虛白雲起轉幽深
勝跡留天地豪遊自古今石牀森爽極內有二石牀坐覺豁煩心

捫蘿上雲洞舉手到霞觴時明山携酒共酌神斧開山骨吾人坐

石堂市朝經變幾文字獨留長俯仰應多感憑軒對夕陽

題盆栽花

盆裏忘憂物平章屬目時寒花明素艷秋露裛疎枝
不怕群陰剥祗憐百草萎愛君同苦節相對一題詩

和東阜韻二首

昨暮猶含夢今朝忽已開非關待日至應是苦詩催紫暈
輝金蕊繁枝本夙栽花中如有此合比出群才
此花真異品一見便怡情金紫色相映杯盃形自成移時
誰辯種開日我題名小院迴廊裏風光似洛城

扈從 陵祀 行宮朝回登西山二首

朝退登山好凌風步履輕恠人林鳥噪拂面晚雲生象界
天如近邦畿掌似平蒲川花爛熳作意報春明

群峰連紫塞望望起重陰滅虜誰能事尊 王切素心萬
邦俱北拱 宸極儼南臨為寄諸胡語來王歲効琛
得張東之副憲書有懷

伊昔張臺史京華為故知三年巡海上一望渺天涯文雅
存吾道風流重臬司邇來承惠問皎皎見襟期

和大齡來縣喜而有作

君來喜重見已是十年期今日同杯酒相看各鬢絲山城
暫容與賓館數追隨笑接山公醉風流憶習池

壽竇給事母

綉纓鳳笙起瑤池華宴開新 恩雲錦誥上壽菊花杯白
髮欣長健丹心耿不摧令名徵教子給舍出群才

題乾寧世引 恩榮錄

聖后今文母乾寧即洽陽元侯連甲第喬木壯名鄉鐵券

山河重 丹書日月光持盈慎修德茅土正彌長

洞庭春燕圖壽徐太史母

慈母逢初度仙郎奉使回洞庭春色好壽宴此時開送酒
汀花舞聽歌渚燕來斯圖存盛事流布滿蘇臺

和浚川司馬九日韻

東籬隱逸品 上國應時開蒞摘尚書省香浮內法醅薄
榮想高志濟世賴竒才得句遺林叟光輝貴草萊

初冬經坡山

霜重江流細煙橫樹色微林鴉驚客噪風葉趁人飛斜日
留山閣荒村帶草扉峰巒青不了宛轉護 王畿

挽張大經都憲

茲日聞公訃臨風又自吁如何梁木壞無奈哲人徂名世
三朝業傳經二鳳雛公二子俱薦于鄉佳城榮 勅使泉下亦心

蘇

使人新河訊彭給事

維舟倚雪岸解纜定何時足病淹予臥心勞百爾思江門
春水動津閣晚雲垂咫尺天涯隔誰能忍別離

正月十五日二首

茲日吳人尚朝遊達夜深繁華開自昔風俗到如今歌沸
三山市香飄十廟陰雲中安穩未愁絕此時心

佳辰正月望此日遂閒居閉戶常無客思鄉久待書風光
醉眼裏世態笑談餘時序催遲暮顛毛雪上梳

和韻兼贈燕泉少司空

議禮惟遵古臨危不愛生抗章期悟主伏闕豈貪名

道自移官重心從詔獄明諸賢同得罪冷段獨何情

送陳德英少卿謝病還閩

賜告皇恩重言歸客路長道江過楚甸望海到閩鄉

點易山房靜研硃桂露香塵囂應濯盡終日對滄浪

濠梁道中書感二首

鍾離本大郡舉目只堪哀草遠連天去狐繁傍馬來有時

驚戍鼓盡日見虞罟賦稅須農事荒田何日開

旱甚仍遭疫愁將往事論連村無屋在萬命幾人存豺虎

依餘堵蒹葭帶古墩流民猶未復何日見于垣

次池河驛偶成用壁間韻

百年半行役能得幾時安客路關山遍吾廬宇宙寬天高

望雲切鄉遠附書難每憶承歡處浮名悔作官

大柳道中

大柳東南去懸崖接斷岡雪消溪漲綠日暖嶺雲黃宿草
深藏兔平坡早放羊塵埃全不見如在水雲鄉

再過關山

昔過纔春盡今來見雪飛風蓬隨地轉谷鳥笑人飛履石
苔沾屐穿雲濕上衣回頭一長望能不念庭闈

晚過黃岳嶺

石嶺斜臨路迂途轉折迷日從峰外落天向樹邊低山鬼
窺人笑仙雞喚子啼馬前見燈火縣吏候巖西

得劉希尹書因有寄

美人在涯郡日日播清芬錦字傳來鴈仙標望隔雲移官
非 聖意觀閔出讒群聞說收凶孽 天書會召君

郊霽

旭日孤岑外芳林綠水濱野花交映日幽鳥獨窺人天迥

雲來細江清鷺浴新金陵况佳麗何處有氛塵

郊行書見

遲日明芳甸煙花護遠墟驅除繁難隊結束炫春裾
帝造開江左民風侈晉餘古人慎爲樂有待至休車

金陵官舍四首

邸第連山麓

對門即雞鳴山

幽深愜素情安居思太宰

南司業罷後凡六十

年復設今太宰整菴首踐其任因創是居

仁里接司成

舍東三家即祭酒汪器之宅

猿掛臨

窓見雲容切戶生自公時有暇心跡得雙清

官閒身似隱况復近山居峰影斜侵幔雲根暗到除蔭簷

繁竹樹連屋足牀書小徑從荒草時過長者車

栢庭變明晦坐起足相娛
夙植從天老餘氛到腐儒
齊前栢一
株整菴所植
竿聲傳戶外黛色擁墻隅
午困能消得清陰時一

趨

簾垂白日靜獨坐放衙時
門掩吏人出書聲山鳥知倚墻
花蓋在遠舍竹爲籬
自喜逢迎少還於野性宜

張德珙參議便道省母

慈母康寧日仙郎拜慶年
錦衣娛膝下駟馬駐江邊
秋釀秔初熟霜羨蠡正鮮
庭闈稱壽罷能不念旬宣

正月十六日二首

羲馭超奔馬佳辰挽不回
年光催老至客病帶愁來
多歲

空叨祿明時合避才無言憶親舍
悵望白雲隈
王正望已過感慨逐懷生
塵事爭如劇時人苦競名官閒
成懶漫地僻少逢迎
無奈思歸客那禁此日情

長垣早發

脉脉寒原上驅車正未停
風柯動虬影山路帶虵形
川陸自知苦險夷還飽經
宦途尚奔走真是促衰齡

鄴城早發

孤舟濟寒水導騎入霜林
宥罪乾坤德趨朝江漢心風
霾暗車騎關名巖路轉崎嶇
已被浮名誤勞勞只到今

不寐

燈火公堂靜風鐘縣漏遲客愁同夜永志慮逐年衰有媿
猶懷祿無才却負時曠言念親故容易別河湄

望涿郡

濃塵翻陸海叢樹擁荒郵煙盡遠山出冰開澌水流歲窮
尚為客節換轉生愁垂首悄無語年衰寔倦遊

次故城訪王伯圻亞卿乃兄

晚停都憲里

門有牌坊榜曰都憲里

為訪故人兄邂逅問家事淹留

呼酒行主情嫌寸晷客意念脩程不怕深林黑沿村列炬
明

良鄉除夕四首

客邊逼除歲且復具盤餐山市聚人少家童買物難傾壺
兒勸飲吟句我增歡遙憶黃金闕明朝賀履端

孤燈搖長燄將兒坐小堂看尊聊餞歲風物是他鄉鼓角
殘宵盡雲山旅夢長飲餘翻不樂垂老昧行藏

他鄉亦守歲隨俗且歡娛詩就教兒誅尊空入市沽形容
那免老歲月不私吾行止惟安命升沉何所虞

浮名驅我苦改歲值山城縣宰供蔬果官厨有割烹豈無
一笑樂難免百憂情長坐送殘臘寒燈深夜明

暫止良鄉有懷浚川司馬

王公天下傑司馬攝中臺學道期匡世虛心能愛才雙魚

傳札至千里速予來予被起廢之命司馬數以書催予行暫滯山城裏誰同
元日杯

良鄉有懷方山中丞

張公講殿侶今總內臺官記室無私刺群僚有具觀文章
留禁署風采重 朝端咫尺阻言笑停雲不忍看

挽劉毅齋光祿二首

君柔忽棄世

先生字克柔

卿月澹無光海內交游少天涯涕淚

長朝悲三署長人惜百夫防

恤眷還稠疊

恩輝照白

楊

問訊知君健如何更哭君題詩比吳劍含淚送江雲有恨

鶻啼樹無情草上墳九原那可作悽惻誦銘文

杏東先生文集卷之三

杏東先生文集卷之四

明太常寺少卿兼翰林院學士儀封郭維藩 著

都察院右副都御史門人德清蔡汝楠校刻

五言排律一十八首

慶成宴上作十四韻

郊壇禮已罷 鳳闕宴初行 聖主親陪御 隆慈示慶

成序官分殿 陞 賜坐各恩榮 錦服明春雪 宮花照晚晴

霞杯黃粟酒 雕椀紫駝羹 寶鼎浮香味 鈞天散樂聲 徹餘

優 寵渥 舊例與宴者自徹卓 勸飲荷 皇情穆穆瞻

堯彩欣欣在 鎬京恩知歌 醉飽會喜際 良明私意圖 芹獻

嘉賓媿鹿鳴長懷杜子爵竊笑楚臣纓感激慙無效蹉跎
已半生庭燎光亂月宮漏暗催更稽首瞻天謝蹒跚出
禁城

綸褒晉錫卷爲大司馬晉溪先生題二十韻

聖主當嘉運興功倚大臣異才驚晉產清望重儒紳意度
歸前輩文章絕等倫昔聞霖比說今喜嶽生申兵省當樞
軸尚書據要津翊天作喉舌曳履侍星辰睿想謀能
契皇情日見親攬搶經兩廣戮貽亂諸閩殺氣連南
極軍情奏紫宸感時公自任報國志能伸將閩運籌
密天門獻捷頻師徒俱卷甲嶺海早生春敵愾功連上

褒嘉命荐臻重光彌闕闕有美下
絲綸寶重傳孫子

函藏護鬼神靡盈天所尚不伐德無鄰
寵渥方辭退階

崇已亮寅百僚瞻表式萬類賴陶鈞已艷
恩榮極常看

事業新漢庭重賢佐早晚畫麒麟

送劉遠夫赴鳳陽十六韻

暫佐濠梁郡言辭濁水湄離筵惜暮景行客喜秋時急雨
鳴沙浦高風落柳枝候人開道路野老看旌旗自惜歌來
暮如君恨到遲地雄先郡國龍起舊京師豐沛崇根本
朝廷慎撫綏吾賢公選擢才術衆多推徃賦頻年急徵科
萬姓疲勿令生反側應合問瘡痍妙譽終旁達高勳亦素

期把杯申繾綣揮袂隔追隨去去傷重別悠悠動遠思雲
山何邈絕身世亦支離願子無相棄緘書得早披相將林
樾外回首即天涯

壽少師厚齋先生二十韻

相國生南服登庸自妙年異才驚代出高望與星懸道屬
民先覺文從世共編禮闈升大首先生戊戌會元也翰苑得名賢
遭際誠如此明良未許先至公存史筆陳善在 經筵
帝念多嘉績 恩殊與大權班登黃閣峻職補 袞衣行
萬類生成叙三朝翊戴全入秋逢壽旦扈 聖駐江堦
社稷須耆德年庚屬老傳龍門隔禮數綺席想周旋頌嶽

詞還拙稱觴意最專留都多宴會

時扈

駕

台候即神仙

應客蒙

恩假供厨有

賜錢轅門已奏凱壽域合調絃

共望乘秋爽深期捧日還城南應候旆道左必擎鞭操几
門墻下聽經丈席前永言介眉壽佇看畫凌煙

壽萬少卿父母七十韻

秋月連開宴椿萱逼壽辰宦歸名郡守號錫太恭人政憶
歌棠樹賢知采澗蘋揚芬在臺寺

公長郎為御史五郎為太常少卿

昭美

有 絲綸共喜臨初度相將踰七旬秋尊開稻酒江菜煮

絲蓴膝下羅孫子筵前互主賓袍金輝彩帔冠翠映綸巾

甲子休標歲乾坤不老身併將稱頌意歌寄大江濱

壽向御史父太守公七十韻

金紫亨衢客乾坤未老身清時辭印綬白首出風塵龍臥
巴江曲棠陰漢水濱公為漢陽守山林心迹遠瀟洒性情真仲
月臨初度行年喜七旬樽開迎臘酒坐擁獻桃賓膝下賢
郎舞筵前豸錦新衣冠瞻大老歲月假閒人盛事歸圖畫
狂歌媿縉紳通家予最稔獻壽徃無因

壽涯翁少師七十二韻

自古論賢相如公復幾人由來崧嶽降爰作 廟廊珎墨
徑鍾王敵詞場李杜親擬人非近代翊 帝及昌辰職
典絲綸閣班崇鼎鼐臣兩 朝弘翼亮萬類入陶鈞疏上

頻辭

主功成勇退身買山開藥圃調鶴待仙賓夢遠
黃扉外吟使綠水濱行年今七十壽旦月初旬長夏開賢
宴華堂起洞春玉杯傳酒滿冰椀薦桃頻上客金朱列詞
人雅頌陳 朝廷仗耆舊政事賴咨詢憂在江湖切霜歸
鬢髮新蠻夷傳制作社稷著經綸吾道尊先覺高山仰後
塵在門操几杖望海渺涯津桃李芳菲異乾坤雨露均願
言錫難老龍臥慰斯民

白崇之錦衣夫婦雙壽圖十韻

淑人封號貴近侍錦衣雄劍履扶 雕輦冠袍謁 禁宮
榮光依日月 恩眷荷帡幪閎閣尚書子閨門樛木風相

將及六十曾是兆虺熊壽宴開冬月萊衣列錦叢筵前姑
飲婦膝下子酬翁珠玉歌詩滿丹青繪畫工高風擅都下
盛事動吳中樂境人逾健南山實與同

送張常甫先生督學湖廣十二韻

翰苑聲名舊豐文宗拔擢新由來作人地暫借講筵臣任重
司風紀官清領縉紳 朝廷須俊傑 簡命假陶鈞仙客
排雲下文星動漢濱人才應有造士習即還淳絳帳朝談
道青衿日坐春才長存史筆去遠惜儒珎瀛海思聯步湘
潭阻問津秬盤迎楚叟萍實獻江神羽翮圖南極雲霄望
北辰迢迢鄂渚外玉樹迥難親

送孫貞甫使安南告

即位也

中朝元有

聖天上仰

龍飛玄德徵三望承謨式

九圍 綸音宣海國仙吏下彤闈旌旆王程遠雲霄講殿
違金函當日閃玉節映山輝南斗文星逼東津瘴霧晞獠
人迎漢使夷主拜 天威即使 朝廷重那招意苴譏
觀風銅柱界吊古雒王畿浪泊增瓊藻蠻雲避錦衣明明
揚 國命隱隱息兵機異域炎蒸苦輶車望早歸

送何助伯御史巡浙江

問俗臨南服乘驄下北辰臺威看載斧行色壯埋輪風壤
千山帶鶯花二月新登車輕旅泊操簡重方巡吏治堪憂

甚民勞待息頻須君植綱紀湖海早生春

送立齋宗伯考績之京

宗伯崇周代分曹重舊京 廟陵群祀在典禮百年行神
秩咸無怨人和靡有爭淑儀瞻豈弟令德仰寅清奏績春
言邁開筵曉正晴鶯花含別意絃管動離聲宇宙堯封遠
雲天漢闕平共期裨 衮職一見慰 皇情接引垂深
眷風流被後生江臯望舟楫渺渺泝空明

送陳侍郎考績北上八韻

吳江春色早二月渚花生少宰乘仙鷁輕帆下石城候人
開道路祖席集公卿浦樹參差擁山雲斷續行淮揚分海

甸幽薊奠

神京宦履兼臺省功成報

聖明稽謀諒

前席選德必持衡好副寰區望中朝贊太平

奉挽少師鵝湖費公十二韻

中台星忽隕上相竟云亡未及施霖雨如何壞棟梁纔臨

百揆席遽動

九重傷

公再至內閣
月餘而卒

新業華夷望前勲鼎

尊光代言失喉舌貴世想文章師保丹旌重風雲素旒張

縉紳心怛怛旄稚走皇皇少女爭飛挽馮夷護不祥渚禽

聲吐咽汀草色淒涼列郡迎蘭楫群黎首種漿護行勤

勅使穩路到江鄉白首門墻士扶輶淚數行

正月六日登鏡光閣和用修韻

華閣延清眺朋遊及假辰舊制元日放假十日暫登酬節序又坐
絕巖塵山海雄 王會乾坤遠 帝宸韶華正月媚風
物九衢新湖影初浮檻嵐光遠映人醉乘微月下歸騎御
河濱

送魯千戶寧以功授指揮僉事還南陽

京華纔識面鄉國久知名為將須英邁如君更老成時危
惟一劍部曲只千兵憶昔防山縣無端列寇營愴惶出見
敵感激誓忘生志略堪開武軍功在守城酬勛已非薄典
衛有餘榮繡虎袍應貴懸金帶不輕檄函山鳥看騎隊野
意驀馬驛路風煙滿川原花樹明離筵人暫對落日酒同傾

贈子無長語酬時須請纒

送廖指揮涇守備歸德

作鎮啣 綸命移家向宋城武場驚穎出戎部重才名
簡授專方任權提八衛兵逆宗方翦削草寇復縱橫軍旅
宜時戒煙塵指日清春郊齊綠草芳樹亂啼鶯旗鼓燕南
發偏裨河上迎閭閻苦攘劫急為掃攬搶

送熊時振少參赴湖廣十二韻

青瑣黃門客腰金曳紫身幾年稱補 袞今日暫臨民地
領周方岳秩雄漢守臣由來藩翰任喜得 廟廊珍專事
啣 綸命監司據要津風塵念行邁江漢望來旬兵久瘡

夷滿征繁府庫貧與時開利澤吾子有經綸莫避催科拙
長令貢賦均荆人怨來暮衡嶽早生春北極星辰遠南溟
羽翮新遭時須報 主會待畫麒麟

七言律詩八十五首

今上 登極朝賀有作

行殿中宵喜上箋

今上以十六年三月二十一日子時至

行殿 慈壽有旨令百官即時三

上箋遂於是日登極紫宸向午待鳴鞭

與邨入京師

聖作還應五百年玉几隔簾瞻日表金函捧

詔 龍飛不遠三千里

聽臚宣禮成况復甘霖霽一德如今已格天

恭和

聖製丙申秋露既降祭

陵奉

聖母觀途中景作三首

祀典

淵衷定厥章朝

陵

鳳輦度中鄉

七宗

聖澤垂休遠萬葉祥源發慶長

玉殿裳衣

神自在

秋山霜露感難忘吾

皇對越稱新禮况率千官列鷺

行

御幄周圍建鳥章銀山鐵壁是仙鄉從官共仰

陵園

勝 王會爭看宇宙長雲護松楸常不老殿留弓劍耿難

忘感時追遠

皇情切大孝真同虞舜行

石芝巖樹錯成章王氣祥氛護此鄉伊嘏

英靈

七

聖在太平景運萬年長地當

陵路形逾勝

駕奉

慈宮愛莫忘尊

祖敬

親欽

至德仰瞻幸在

近班行

扈 駕春祀喜晴

彌旬宿暄消今日

聖孝回天轉覺誠本為清途先施

雨不妨載酷更開晴花容山色還爭麗燕語鶯歌太恣情

陵殿禮成旋

鳳輦九霄瑞氣遶霓旌

沙河 行宮候 駕

雲裏飄飄颺鳳旗芳原繡陌自逶迤鐵衣遍繞青山口黃

幄高張綠水涯

輦過即看花競舞

龍行恰有雨相隨

候朝

帳殿歸村遠

時寓行宮之東村家

宛轉風林馬去遲

和松臯太宰喜晴韻

連朝雨濕漢官儀今日人騰喜霽詞萬樹和煙籠 御幕

千峰翠色映鸞旗

天行正及省耕候

宸賞還乘修

祀期中使忽傳旋

闕詔往來七日未為遲

時中官傳旨明日回京

和託齋少宰韻

儒臣扈

聖喜茲辰風物

陵園屬仲春泉響溪流

纔過雨桃紅李白不沾塵地張

黃幄晴沙淨山應朱旗

曙色新

鳳輦頻來豈遊豫祇緣裡祀展親親

和韻三首

玉帳軍麾颯早風

鳳城瑞靄滿高空威靈遙制華夷外

形勝全當山海中 天子絲綸專 簡命尚書居守竭

丹衷文章籌策俱能事已試 明時將相功

跨馬巡師邁將風劍橫龍氣肅寒宮虎臣鐵騎旌麾下

玉闕金城鎖鑰中宗伯才猷當妙選簡書付托出 宸衷

軍門共仰祇今重麟閣還期異日功

天書滿紙訓重重付守周京衛漢宮日向九門戒軍旅官

從八座識英雄即看方叔居 朝內歛見單于遁虜中時宣

大有虜警日夕都城絃管沸笑談却自有奇功

登龍池山

龍池之側山如畫絕頂纔餘尺五天 宮闕九重開

帝造華夷萬里接風煙盪胸雲起沾衣潤隔岫花垂滿目
鮮徙倚青峰瞻望又欲招鶴馭訪飛仙

登玉泉山臨光洞

玉泉山畔臨光洞仙跡分明紫翠間蘿壁石牀容易到瑤
壇鶴馭杳難攀市朝幾變水長在車馬無停雲自間一望
煙花滿陵谷登臨聊且破愁顏

送楊都督領南京大營

將軍啣 命向留都二月官河放舳艫岸帶平沙千樹直
天連極浦片帆孤偏裨江上瞻旌節貔虎營中待指呼即
喜按軍時躍馬更看開館夜談儒

送郭汝賢還江西舜弼太史內兄也

楚客燕臺望故鄉便從潞水買新航山河積雨征帆濕雲
樹連天去路長江口潮來喧極浦津頭月上照空梁行囊
珍重詩篇在不用燃犀水恠藏

送唐守之使朝鮮告

即位也

聖人御極承昌運法從乘輅使遠夷

龍詔輝光頒上

國

天威咫尺在東陲度山旌旆迷秋色近海雲霞媚

晚姿最是句麗解文字便從大狀乞新詩

守之甲戌狀元也

送嚴惟中侍讀掌南院

文章地望推詞苑佳麗東南重舊京遷轉暫須違館閣

寵光應不減公卿

皇宮接近天臨戶鍾阜參差翠擁城

南京翰林院前面
皇宮東瞰鍾阜

獨喜蓬瀛寡塵事新詩賦就作金聲

送吳瞻之叅政赴四川兼便道省其父司寇先生

十年諫省垂清望萬里叅藩屬重臣家在東吳仍便道嶽
生司寇是茲辰樽前壽曲緣雲上花下斑衣照眼新莫向
顧山耽樂事西川終日望來旬

世耕亭爲用修題

溪上華亭新築成遠分勝槩有餘清錦江練色浮簾淨玉
壘雲容接戶生本愛貯書須棟宇更緣巡畝即經營由來
耕道傳家事肯穫還高太氏名

張崇象有新樓登覽詩因和韻

傍舍買來開邸第高樓更喜接華堂平臨北斗杓懸牖斜
對西山翠映墻門迥何緣留客履簾垂時自近書牀朝回
徙倚危欄望雲裏宸居控八荒

送劉養和副使提學山西

清才直節比南金妙譽如今滿士林尚憶鳳凰來舊郡和養

先守湖州府

即看桃李散新陰文章準擬歸時論水蘂還應識

素心最喜高賢承簡在明明天上領綸音

晚秋出郊偶興

群木霜前落葉深煙墟沙岸正蕭森風連極浦悲寒鴈樹

擁荒村響暮砧病起秋原聊跨馬遊便故里欲投簪韶華
人事催遲暮虛負平生許國心

京

宇宙金湯此最雄王圖不數古岐豐城開東海鴻濛外
闕倚西山紫翠中日月雙臨明王表乾坤交會繞金宮
北來帝業還同鎬曆數如今正未窮

送高穎之少卿赴南都

廣陵別後金陵別舊歲君來今歲歸回首十年猶反掌含
情千里各沾衣江萍逐棹同流轉雲樹連天共渺微卿佐
官閒南國勝湖山清賞莫相違

新年

三年載筆侍 承明萍梗飄飄嘆此身
歲去歲來將白髮 自醒自醉任青春
是非人世那堪問 風俗天涯久亦親
性懶閉齋終日坐 寂寥門巷稱官貧

送鵝湖老先生還江西

曉辭 玉闕下 崇班朝野驚
傳宰相還經世 文章留紫閣
歸田蹤跡近青山 即看江上風塵淨
轉愛湖東歲月閒 最是調元須舊德
豈容垂釣弄潺湲

承恩山房訪我山太史

鳳城西畔承恩寺 一榻蕭然大史居
隱几看山高臥後 閉

門讀易退朝餘 佛香暗度諸天迥
齋磬徐聞午院虛 却媿相尋塵裏客
肯容此地接襟裾

寄岳周翰

美人不見已三年 消息頻從令弟傳
避俗東樓高臥穩 學農南畝獨耕便
况聞主饒趨 藩府即喜題名入仕編
千里相思會何日 天涯回首隔風煙

送伍思謹正郎赴湖廣

漠漠風煙帶草亭 芳辰送客出郊坰
近筵弱柳臨歧折 隔樹啼鶯對酒聽
沙上幾時迎使節 斗南終夜望文星
定知別後相思夢 杳杳隨君過洞庭

元夕

長安五載逢元夕物色流光倍客情
殷地笙歌雲外動伴人燈火夜深明
懶遊虛放金吾禁從宦空慙太史名
獨坐小堂清不寐九霄月滿鳳凰城

聞邊警有感

南郡兵戈猶未息邊城豺虎復相攻
戍樓烽火連千里羽檄軍情到九重
今日安危誰主將高門談笑說勛庸
比年盜賊閭閻困饋餉那堪更遠供

秋鴈

八月榆關滿地霜九秋鴈陣向衡陽
蕭蕭江海菰蒲冷漠

漠雲天道路長樗散自慙迷出處
聰明爾解避炎涼高城落日看飛去
飛到黃河是故鄉

送李舜卿宰南和

朝廷最重京畿地宰邑如今得俊才
盜後瘡痍應未起秋來賦稅豈堪催
握符遠向花封去拜命親從紫極來

宋制守令皆面諭故云

百里安危方有賴經綸一試濟雲雷

暑夜

夜中苦暑披衣起毒熱如蒸鬱不開
獨向月明沾露濕每從花動待風來
望通西嶺青松遠坐對南薰白羽摧
朱鳥火雲俱在眼安能飛上楚蘭臺

邊何二奉常供事

孝陵用前韻見懷因疊韻

谷之

園陵白日肅森森相祀惟應湛此心奔走每依黃幄近

齋明常對翠微深題詩玄館猶同昨習儀二日太常一舞

蹈仙班不共今遙憶直廬休假地唱酬俱是太平音

送吳應韶掌教亳州

束書不走長安道采藻還尋泮水芳已有文章收館閣廷

乞就教職舉人即看桃李在門墻雲汀夜泊潮侵纜津市

晨經饌煮鮐君到應知風化改滿城絃誦聽洋洋

過何仲默舊居有懷

草玄最熟揚雲宅今日經過見舊楹大樹無緣重對酒庭

大椿樹仲默寓此小齋還憶向題詩仲默於廳後曾作一

山形遶屋紆西郭柳色浮簷出禁池仲默之居向室邇

空懷人去遠時仲默提幾時握手倒襟期

和張崇象同邊汝明劉華父王舜卿宅上飲啜麻

酒

小缸釀黍稱殊品方法誰傳隴右春是酒惟秦諸子乘閒

能盡興東君開酌與嘗新樽前更讓寧須盃口角相酬亦

可人飲此酒不用盃惟以為問三溪王太史獨將此味向

予珍舜卿曾許邀嘗此酒

送翁知縣赴永新

尚書闕閣由來重，星座官階亦不卑。已向趨庭傳舊業，便從爲邑見康時。垂垂津樹連雲淨，漠漠江天去棹遲。君到正逢征戰後，閭閻應待起瘡痍。

介軒

翠榜華軒介作名，遠開林麓有餘清。牕含沙樹團陰渺，簾捲溪流潤色生。已見彥方能化俗，還知柳惠是同聲。主人寓號非徇物，似媿和光逐世情。軒在沙溪上，因有沙樹溪流之句。

蓉溪書屋爲少司寇金先生題

結屋蓉溪愜道情，美人幽地故相成。水從䟽鑿來巴徼，花

勝雲霞接錦城。碧草經春迷徑路，青山終日護簷楹。匡時未遂歸閒計，空望峨眉遠思生。

三叔祖八旬代父作

吾叔行年已八旬，童顏鶴髮白綸巾。喜逢懸矢長生日，臥愛看山自在身。正賴衣冠名世族，還從風節重鄉人。壽筵醉舞諧家慶，膝下離披綵袖新。

和菊莊韻二首兼贈宮諭溫先生父也

愛隱辭官大是閒，結廬况避市城間。雲崖已逐高棲志，冰玉爭如有道顏。獨把詩筒巡菊圃，更將藥草種春山。清江白石松門靜，時見幽人問字還。

雲護郊扉盡日閒勝分雪嶺錦江間松筠迷徑無塵鞅猿
鶴娛人有笑顏野服著殘惟製芟俸金費盡尚開山乞詩
送酒多酬接溪友鄰翁任往還

和陳魯南至日感賦韻

千官至日拜 龍墀想像 行宮受賀時駕在通州也 畫角曉

聲開 帳殿轅門軍正肅朝儀傳 宣已喜回鑾近憶

主寧辭見日遲節向陽生欣振旅願從止武頌無為

正陽門外候 駕二首

鸞輿纜報發通州時駕南征回駐通州已一月餘矣 騎使紛紛走未休直

地金光當殿湧從東紫氣接天浮京州在都門向日開 黃

幄正陽橋南馳道東設 黃幄貯酒輦路凌空結綵樓千里

徂征勞 聖主隔年喜見翠雲裘

去年送 駕屬中秋今歲迎 鑾雪映裘祇為強宗干

上國久淹仙仗在南州時江西宸濠反 千官鵠立瞻 龍

袞九陌門開聽凱謳還憶建橐 明主事便從常武頌

王猷

遺善堂詩

遺善先生避市居由來遺善重鄉閭華堂肯構春卿手堂

孫春卿先生所構也 翠榜高題宰相書淮翁書 城堞並樓生氣象樓

城相 湖光入牖切清虛堂在西湖南 賢孫計日登黃閣輔世承

家自此廬

送王庸之還縣

天涯愁緒日紛紛歲暮那堪又送君
人世奔忙還自苦離筵惆悵不成醺
孤城樹色風煙渺遠道山形郡國分
歸去定能頻慰藉音書一月一相聞

送張孟復副使兵備重慶

三秦自古稱天險西蜀由來是後門
要地祇今須重望殊方從此賴于蕃
巴江夜雨潮侵纜巫嶺秋風曉聽猿
見說東川瞻望切故山應不久停軒

除夕用類菴韻二首

南北東西泛梗身有官常是別雙親
可憐除歲當今夕無奈携家作旅人
城闕久諳風俗好霜莖又見鬢毛新
散愁且對尊中物只恐酣餘倒著巾

夕陰今夕見紅霞忽漫窮冬送歲華
江閣雪殘梅破蕊玉亭春洩柳生芽
翰林院後有玉亭菜盤尊酒聊酬節
晉土吳風不似家最是年來多感慨
滿懷愁思正無涯

齋居柬王峰太宰蒲汀少宰類菴少宗伯

月上鑾坡照玉堂禁鐘聲徹滿庭霜
已知塵慮消清夜敢謂齋明助
聖皇燈蕊半開還帶蕾鑪煙徐動旋添

香不眠正憶三君子欲往從之隔省墻
吏禮二部後門斜對翰林院前門

齋居和類菴宗伯韻二首

清夜沉沉一榻眠風中時聽漏聲傳齋依玉署心如水地

拱翰林院在長安左門皇居夢上天長安左門滿樹月明零亂影近簷松

靄有無煙不知身在江城裏猶憶雞鳴朝日邊

熒熒燈火伴齋居永夜繁憂獨有予徒食 聖朝將老矣

久慙吾道欲歸歟坐餘童子來供茗消盡寒更自檢書恠

底小堂清不寐竹邊爽氣到襟裾

和華泉奉常郊齋韻二首

曙光初動亂鳴鴉况復官閒免報衙架滿圖書餘道氣庭

多竹樹類村家舊諳奉引陪 龍袞幾向明禋憶舜華

最是祈天勞 聖主擬將靈嘏對時誇

徙倚東風步廣庭靜中祇覺寸心靈更傳萬戶鐘初定光

轉千巖月不停竹覆闌干龍蜿蜿香飄齋閣霧冥冥北辰

一望連華蓋終夜芒寒繞衆星

正月十六夜書懷

小院迴廊月漸升不堪此夕對殘燈境非吾土歡何在心

切庭闈病轉增俗以此夜遊橋為散百病直道行藏終可據浮雲富貴

故難憑杏岡舊是幽棲地溪鳥煙花好結朋

和蒲汀少宰郊齋憶僚之韻

可憐南署持齋處一榻寥寥誰與同忽憶往時金馬客相

隨受戒

紫微宮

每郊齋之日百官於奉天殿朝畢跪聽誓戒

連宵燈火饒春

夢久住江城熟土風自是不才宜散地敢將踪跡怨西東

春日同諸公登觀音閣

江流山下幾千年禹甸堯封故宛然世有興亡經六代勝
堪登眺待諸賢層層樓閣虛無裏漠漠煙花浦淑邊一望
乾坤渺何際不知身已近雲天

梅花水

冰肌映水十分清倚樹臨流愛濯纓疎影倒涵龍欲臥輕
波不動鑑如平石欄寂寂香魂遠風磴微微潤色生可待
明年花再發重來池上拾瑤英

神樂觀禱雨

仙宮禱雨走祠官祗恐微誠感格難太宰行香登藻殿時

峯太宰為班首上殿姓香群僚陪位集瑤壇纖絺流汗炎威逼銀漢回

光夜色闌四載在南連遇旱向來愁緒日無端

九日二首

韶華物色鎮相催客裏驚看九日來白鴈知歸先我去黃
花依候向人開悠悠歲月雙蓬鬢落落乾坤一冗才靜坐

玉亭成性懶碧山紅樹廢登臺

忽忽江城逢九日甕頭新釀定須開客垂華鬢能禁老兒
把黃花解勸杯南北濫居述作地文章深媿馬班才承

明一別天涯隔五見征鴻塞上來

送張司寇之京

青春彩鷁發江濱聽徹離歌日正曛重望飛騰臺省地高
勲入奏 聖明君吳中煙水連淮浦薊上山城擁塞雲
竹樹陰森仙觀在天涯咫尺惜離群

六月廿一日苦熱

毒熱蒸人夜不休仰看玄武盼清秋風來時送無煙火漢
遠空瞻有象流輕筭落懷難解愠飛蚊接翅故相雙東山
在望千松樹安得凌虛坐上頭

丙戌 萬壽節習儀朝天宮和邊奉常韻

廣庭嚴衛戟森森激切當年近侍心共沐 聖恩同雨
降不妨臣佩委泥深客鄉容鬢憐非舊宦海飄沉直到今
一望 紫宸連北極幾時重聽鳳韶音

大行皇帝挽詩

正德十六年作

輦路銘旌向碧岑鼎湖 龍去正蕭森松楸萬歲團 陵
色日夕千靈拱殿陰杖劍尚思南國戰大行初自遺弓常
痛小臣心官廳督府俱消歇西內初為西官廳及總督府
無復當時鼓吹音大行與諸邊將日操演其中

送少宰汪公赴 召北上

聖旨移賢下紫微高旌裊裊向 王畿生憎離別臨江路

曾奉周旋在虎闈予舊與公同僚貳宰未應留盡自調元久擬入
黃扉十年經濟懸群望勲業祇今願不違

送寇子惇都憲赴大寧

文武威風衆所推北門鎖鑰更應誰山川牙底分夷夏雲
鳥麾前控虎貔今日朝廷須保障他時勲業重邊陲
帷到後消烽火白羽烏臺坐出奇

送都憲邊公赴召北上

纔喜龍門列坐隅又瞻仙旆向雲衢南曹望接先司寇公先為南京刑部侍郎北院官尊上大夫秋樹晚山紛色象吳江瀛海
渺輿圖公河間人河間舊瀛海郡燕臺漠漠堯封裏一望乾坤繞漢都

送太宰楊公赴召北上

太宰承恩歸象闕押班常在五雲邊位應北斗司元化
望重南曹借大賢勲業百年卿相比風流一代祖孫傳公文敏公曾孫也願將啟事甄才傑曳履從容送上天

送高都憲督漕之淮上

新擢中臺上大夫即於淮海遠分符位參兩帥仍專制漕都憲總兵參將號為三堂而都憲專其政粟總三吳任轉輸塞上軍儲頻歲急
江南民力幾時蘇裕農足國君王意漕府均調須大

儒

秋懷八首

墟靄林霏接遠空六朝遺觀莽何窮江山歷劫開今古霜
露催寒度鴈鴻萬里秋風雙短鬢百年身世一飄蓬鳳城
砧杵家家發激切鄉心落木中

客裏驚秋鬢欲皤每臨江上望南河榮華情與青霜冷
岵心隨白鴈過直以踈狂從譽毀不將勲業怨蹉跎天涯
搖落音書斷日暮憑欄發浩歌

覆舟在左右雞鳴曹館中開倚鳳城藻殿近連青嶂合書

樓高並女墻平監居北城下其東西二書樓與城相望谷風交送秋聲切湖

水潜通爽氣生後湖水自城下流入經繞監之東振古賢關非散地腐儒

應媿冒恩榮

憶昔 先皇南伐日征宸濠也分明遺事記當初千官祖帳

辭 龍袞上命百官設祖帳于正陽橋下二傳中軍護

翠輿時梁蔣二少傅扈從朝向午門瞻 御座百官每朝只在午門外行禮奏從

驛使乞天書凡百司章奏皆自齊行在請旨祗今悵望橋山地露下千

巖草樹踈

鼎湖 龍去正蕭森紫極遙迎 聖主臨吟上自承大興

統上疏雲霄三勸切垂衣閭闔 九重深獨慙啓沃初開

講敢忘 恩榮舊 賜金初開經筵凡講官皆有金幣寶鈔之賜今日秋風

增旅思不堪回首一長吟

同館諸公纂述勤清街應自稱竒芬時諸公以修書成皆進春坊官司坊

領局元儲相作 聖匡時總異勛南國棲遲憐臥病北書

斷絕思離群陪 鑿却憶當年事步月中宵望斗文

義子 先皇俱寂寞尋思往事使心摧賣醪貨餅餘

皇店店俱在西督府官廳長碧苔在府廳亦在西內江上牙檣群鷺

集武皇行南京時造黑龍舟三百餘艘今尚集於江口雲中 輦路六龍開武皇北幸宣府

至于大同前星未耀遺弓劍 陵樹西風萬壑哀

聖祖開基宅建康由來 帝作此金湯山當 闕後紆

東郭鍾山也水轉天西帶北疆江也貢合番夷歸使館衙分文

武夾官墻府都東西向朝建置一從遷鼎 神京去殿閣雲棲古木

蒼

和邊庭實登鳳凰臺次太白韻二首

高臺花鳥負閒遊冉冉風光去似流客裏歲華雙短鬢眼

中今古一荒丘天浮紫氣連 龍闕江併春潮漫鷺洲身

在吳鄉家在汴暖雲芳草不勝愁

每擬春遊未得遊鳳臺西憶大江流吳宮晉甸空荒草虎

踞龍蟠自樂丘野迥飛花來几杖天清浴鷺立沙洲雲中

烽火今消未一望茫茫起暮愁

會蒲汀少宰宅得離字

水亭風動弄輕漪夏月開筵此最宜爽氣透簾渾不醉清

光照眼欲成詩敢從卿相論新約曾逐鷓鸞侍故知指日

朝 天須少宰江城無柰又分離時蒲汀應進聖節表也

會栢齋奉常宅得題淮水曉煙

秦主無心也可憐空將此地鑿成川江流浩蕩分淮水王
氣氤氳散曉煙兩岸人家懸鏡裏連檣舟楫宿雲邊六朝
已往還留爾渚草汀花自歲年

渡江

浩浩長江曲抱吳風濤四月足憂虞山當高浪排將轉天
到中流望却無日上龍關蟠水府煙開鍾阜擁仙都三年
兩度憐奔走媿爾飄飄水上鳧

送嚴惟中侍讀考績如京

俱領除書出 紫宸南來三載倍相親文場史館追陪地
尊酒江門話別辰日下寒蕪荒晉苑雲連秋樹帶天津華
勛獻罷 龍顏喜知是當時講幄臣

高肅政亞卿大宗祠堂

高輿傳家四百年高居此已四百年 大宗祠屋與祠田春秋蘋藻
時奔走昭穆班行自接聯太尉華勛前代重肅政宋太尉瓊之後侍
即名世遠孫賢祗今茗嶼成仁里草木山川亦自妍

送顧封君還吳封君給事中父也

畫舫清秋迎養至錦袍烏帽受封歸公卿出郭同開餞諫
議臨岐更挽衣沙鳥趁船還自泛江雲結樹故相依田園

到後真無事日采山芝坐翠微

雪中

海外長風送雪來陰森竹院忽成堆山河漫向虛無辯天地爭如混沌開江冷蛟龍蟠浦淑林深鳥雀失條枚居延寇盜今平未濕重旌旗戰士哀

梧山司馬治水功成碑

普天財賦半吳中稍喜于今水利通禹貢泥塗標舊域尚書疏導擅新功有年準擬歌江左爲壑還應限海東珍重穹碑千古事洞庭名山震澤兩爭雄

濠梁驛圯甚亭屋半摧傾矣是夜不敢睡秉燭至

且因作此留壁間以告後至者

簷墮梁摧勢欲傾挑燈獨坐旅魂驚敢言防險同知命祇恐遺憂到所生明月度簾開鏡色清淮隔枕送濤聲山城譙鼓從長短數盡初更至五更

瀛洲會中作

詞客風流舊在南院梧垣竹又停驂仙從玉案來成八席展瀛洲會已三良晤不妨終日共高賢何幸腐儒參如聞雄辯驚神鬼悟主匡時取亦堪

和許廷倫登觀音閣韻

南國勝遊惟此地春晴騎馬出城來山排石樹連雲起江

拆荆吳肇域開虎闢龍爭憐往事雄圖霸業見奇才莫耽
此日多幽賞今古消沉此日催

太常寺南軒賞牡丹二首

舊歲邀賓花已謝如今對酒花正開休貪顏色看時好祇
恐春光暗裏回影近風簾嬌欲舞朶垂雨檻密相偎黃昏
客散應憐爾深鎖重門伴碧苔

花品之王是此花栽培元自出仙家庭前光寵分芳草檻
上輕盈蔭彩霞正喜移尊乘好雨不妨巡圃立團沙為逢
地主多幽興竟日淹留免報衙

雨不止

白浪高排柳樹灣秋來積潦重愁顏水成雲去翻爲雨江
帶潮流欲漫山竹上纔看沾點洒堦前忽聽響潺湲却嫌
神女何多事濕盡仙衣未肯還

同諸君子遊靈谷寺

鍾陵之麓水潺潺靈谷由來隔世寰十里松陰難辯日千
年王氣獨餘山雲從石竇無心出鳥傍叢林接翅還况是
新晴風物好且隨諸子一開顏

送陳君賜赴袁州府

天闕東西畫省開幾年治賦見高才沙邊共惜朱幡遠斗
下爭談召父來吾老尚留龍虎地君行先上鳳凰臺

郡有此臺

宜春郡此日迎春早即有陽和遍草萊

送刑侍王載卿考績如京

丹楓翠壁媚深秋送客城西半似遊斜日微微低樹影遠
天漠漠接江流路排榮戟群公餞身到朝廷聖主

留最是東西民力困願將封事達宸旒

暇日檢院中舊卷有作

詞苑百年存故典深嚴元自禁中分翰林院舊朝內師臣勸表

猶餘草太祖為吳王時丞相李善長率群臣上表勸進表稿如新聖祖謙光尚有聞祖

謙亦在稿華國文章充藻棟國初凡諸勳舊大臣誌文祭文及諸慶賀表文冊文

併令翰林官作俱有稿在近天屋宇覆彤雲院對皇城腐儒忝竊真難繼東

里潛溪有令芬

送桑二守之任開封府

茲日新遷下大夫十年宦海半憂虞由人毀譽全無定直
道行藏豈是迂任領河防兼水使官連郡守佐銅符如聞
漕路今多梗星海憑君挽北趨時黃河犯運道君領督河之任也

殷文濟僉憲六十

殷子行年今六十豸冠朱服舊臺臣心安不惜歸休早論
定方知素履真對奕人疑赤松子遊山猿試白綸巾華筵
此日須拚醉况有公卿祝壽辰

送兵侍王汝溫赴徵

驕卒西邊壞紀綱大同卒殺六師從此要張皇本兵元是

紆籌地卿佐今登蓋代良預擬驅胡同鼠窟還須論將及

鷹揚祗今 明主興周道九伐從容贊 廟堂

杏東先生文集卷之四

杏東先生文集卷之五

明太常寺少卿兼翰林院學士儀封郭維藩 著

都察院右副都御史門人德清蔡汝楠校刻

七言律詩一百一十五首

恭和 御製謁 陵紀述一首

制作弘猷出肺腸規模經緯仰鋪張禮明郊廟光 前聖

治比唐虞陋小康 陵薦敬脩容穆穆 神靈如在上洋

洋 君王 母后俱歡慶繁祉休禎未有疆

從 駕謁 陵三首

鶯囀花明春未闌 龍輿乘暇出 金鑾為朝 陵寢

來追孝豈愛山川欲比觀翠壁丹崖開萬幕黃麾白鉞擁
千官從班何幸微臣忝願賦卷阿奉 帝歡

群峰擁秀即蓬萊積翠中間 御幄開萬騎風隨千壑振

九霄雲護 六龍來鑪煙時傍麒麟上旂影徐翻日月迴

廣牡大羹肇殷薦 明樓寢殿喜躬陪

陵園勝槩非人境王氣靈光日夕佳花徑往來披錦繡山

房起坐對雲霞堦前細草自承屐戶外流泉堪煮茶不是

從 龍躡霄漢塵蹤那到上清家

迎駕

雲擁風隨 帝輦過侍臣導入殿中間貔貅隊裏瞻仙

仗翡翠簾前拜 聖顏天近星河臨 紫闕夜深燈火

照清班慶成明日開 恩宴擬祝唐堯壽似山

觀 壽宮役作和韻

陽翠坤元開王氣 聖人曠識定 仙宮秀涵天地網

縕裏勝在華夷拱護中樹色拂空濃作黛雲容依岫結爲

龍子來莫謾誇周詠此日歡心萬姓同

送周伯明中丞進表之京 時世廟成也

萬方來賀 冕旒前共仰 新宮世不遷顧我文辭慙四

六 賀表予所撰也 勞君驛路歷三千卿曹拜表瑤爲檢神鬼清途

玉覆田 時雪初霽 覲罷 天顏應有喜西臺風紀屬高賢

和紫山少司徒大同班師韻

矯矯司徒蓋世雄
肅將斧鉞下青空
謀從帷幄知無敵
蹙總貔貅向大同
白草黃雲行塞地
朱綬金鎖定軍功
三旬獻捷天門下
應是渠魁罪已窮

和蒲汀吏侍除夕韻二首

除夕迎春年復年
每逢此夕倍潛然
客身匏繫愁城裏
親舍雲橫望眼前
忍向京華留五載
悔將名字入三銓
無言獨對踈燈坐
細和陽春白雪篇

年華忽忽去除間
除去還來鬢已斑
風外吳歌增旅思
雪邊松火照愁顏
閉門自信官如水
久客兼因住近山
翰林院後

即是錘山半世光陰奔走裏
此身何處是高閒

再和蒲汀元日二首

年光此日是新元
庭院曛曛上曉暉
獻歲杯盤還取醉
撩人風物自消魂
每慙宦海隨萍轉
久待家書恠鵲喧
節序驚心愁正切
欲拋簪紱謝朝恩

鳳曆標元紀歲同
江天此日試和風
杯從酬節開新釀
夢

憶朝天繞舊宮
南京翰林院在長安門少南
浮世榮華泡影外
他鄉

日月鳥籠中也知
老態隨年長何用
旃磨照面銅王宗壽鐵鏡事

陪祀歷代帝王廟和陳都憲韻

群帝駢龍儼在祊
絳幃玄袞肅清清
垂衣異代臨宸極
報

祀千年含頌聲久共斯人沾

聖澤初從陪位竭微誠

禮成如見靈光轉藻殿東頭月正明

陳魯南殿講以使事至留都舊翰僚自玉峰太宰

以下凡九人共觴于天界寺魯南即席賦一詩見

謝少宰蒲汀李子首和予繼和之凡坐客咸和焉

瀛洲仙會此開筵使節來從

御案前法界喜陪金馬客

醉鄉聊聽素絲絃氣干闐闐占星彩藻麗江山起瑞煙見

說石城增紙價傳將詩句鬪春妍

暑夜獨坐有感用韻

立秋毒熱仍相逼鬱鬱那堪坐病中賊盜即今揚烈焰乾

坤忽已失清風自憐身世無歸定何用雲霄有路通却憶
桃源踪跡好落花流水恐難逢

送靳大尹

墨綬銅章百里郎晉陽東畔是封疆地當嶢峩民須念俗
自陶唐儉不妨野戍山昏催暮角塞鴻風急下寒塘亂平
岐路今安穩旌旆悠悠過太行

宮柳

禁城楊柳弄春光嫋嫋隨風半出墻翠抹金宮煙似織條

垂玉檻舞如狂曾經晚幸維

龍棹慣引春愁到近嬙最

是託根真得地常承雨露五雲傍

送呼生

執手河橋對落暉天涯無奈送君歸風生洲渚春帆穩雲
帶青齊海樹微祖席牽愁花艷艷長亭恨別柳依依東行
千里傷兵火舊路人家恐盡非

懷親

時家父仕
荊州府

夜夜庭闈荆楚夢時時京闕肯甘心年華漸上椿萱色
客子長歌屺岵吟竊祿幾年違問寢看雲此日益沾襟安
能身似隨陽鳥來往湘江漢水潯

送汪器之先生赴南雍

十月冰花結潞河錦帆迎日映滄波路連吳楚鄉心近身

遠雲霄客夢多史閣高風存斧袞辟雍新化入絃歌臨岐
不用悲分手計日鷓班聽玉珂

元夜客思

三年從宦侍承明此夜看燈倍客情故國別來憎月色
他鄉愁絕畏歌聲徘徊小院誰同語徙倚前楹自數更何
處笙簫喧笑語王孫公子踏橋行

齋居和健翁韻呈子和

神仙官府玉爲堂三日齋居共一廊身近雲霄非浪跡官
同侍從借餘光麻池自覺青春靜蓬閣誰知白戰忙郊禮
已成催獻賦多才知有少陵長

七夕和何仲默韻

青袍朝士思歸客又見 京燕乞巧針月裏關山終夜夢
庭中風露萬家砧貪趨紫闥忘初服悵望滄洲媿夙心牛
女似應同此意年年雲漢阻秋陰

內苑舟戲聞樂聲有作二首

禁水風光五月分 龍舟蕩漾泛南薰紫雲護 蹕當空
見仙樂從天隔樹聞願擬周人歌在沼漫於漢史羨橫汾
宸遊正是昇平日况復重華接放勳

水殿陰陰五月秋 君王多暇戲 龍舟徐看錦纜牽
宮樹轉覺仙源接漢流繡岸風生 黃蓋動芳津雲起

白龍游笙歌時度南薰曲解慍由來識舜謀

送陳一卿督儲大同

宣武橋西送使君干旌北向紫河濱路連廣野迷沙磧山
接長城擁塞雲郎署幾年推鎮靜儲邊今日借清勤北門
連歲傳烽火願哺元戎討虜軍

西帥

西帥西征已二年羗戎兵馬苦相連 朝廷正待番王復

上魯番入哈密城執忠順王去時朝議欲復之故用師也河隴猶聞羽檄傳本為斷胡
存哈密朝廷以哈密之地為鞞韃往來之衝故封王給之金印資以障蔽即看開釁在居

延將軍堅壁圖全勝捷報何時到日邊

送王德輝按甘肅

驄馬西巡被錦鞍月氏萬里路漫漫
湟中盡歷河山險塞上爭看獬豸冠
師旅尚應多菜色羗戎猶未息兵端
軍情民隱天王急直道無憂舉刺難

會所對酌

庭竹蕭蕭響翠湍老僧竹裏具盤餐
合簪自許同心好對酒翻憐一笑難
塔院聲來齋磬遠佛龕熏細午香殘
遠公戒飲能延客雲裏吹笙為助歡

八月六日會所作

不到禪堂兩月餘竹風簷月久相虛
人從此日尋前約案

有流塵媿古書童掃秋庭迎客際僧敲午磬散齋初官閒
最喜論文會終日相從謝起予

頒曆

聖主仲冬頒鳳曆千官趨漏肅朝衣纔聽紫殿傳恩

制鴻臚傳制云給却向青冥受賜歸正朔紀來遵已

遠歲年看去疾如飛行藏亦在裁成裏出處應慙未見幾

至日侍班 奉天殿二首

至日從容侍聖顏身依仙仗殿中間紀言敢謂同良

史載筆應慙列近班制下鴻臚傳共慶鴻臚傳長至之慶與卿

等同恩隨寶鏹荷先頒先是冬節皆賜宴近乘時欲勸

行陽道咫尺 龍鱗未許攀

聖主迎陽御 奉天儒臣端笏侍簾前班分 紫極瞻

龍袞袍映金函接 寶筵翰林班在寶筵之下豈有才猷供顧問祇

將簡筆濫周旋千官禮罷從容出五鳳樓南月正懸

齋居院中用少陵曲江韻簡同館諸君子

院中籠燭解朝衣纔向 天門受誓歸誓戒郊祀簪合祇知文

字好官閒不厭吏人稀持齋心迹如僧定為客年光似鳥

飛館閣論交真忝竊願承高義敢相違

承天門候 駕聞大禮成即幸南海子

郊壇暫住迎禧 駕海子還馳行狩車火發圍場明夜半

獸驚獵騎亂春初上林風露嘶龍馬別殿星河落綺疏月

下千官延佇久遙從紫氣望 鸞輿

送張副使世祥之湖廣

栢臺舊是乘駟使臬府重遷副憲官漢上豺狼先自伏荆

南川嶽早生寒秋澄浦淑天開雨棹宿蘆花月照灘寂是

經綸須俊傑雲霄萬里看鵬搏

即事二首

江西城裏殺臺臣時巡撫孫都御史被害警報紛紛達 紫宸見說

藩王焚邸第聞宸濠焚其府而出即看宇宙起風塵龍爭虎鬪終何

事玉葉金枝不自珎二伯定邊靖虜二伯也前驅俱北發 六龍

在駕欲南巡

寧邸無知忽弄兵江西湖北少人行漫憑豕突鴟張勢恣
向龍盤虎踞城時聲言欲襲南京也高廟神靈扶大業九重天
子詔親征微臣感憤思捐命幾向金門欲請纓

初歸杏東別業

雲樹深深隔市喧茅齋盡日掩重門浪評白兔微臣罪得
臥青林 聖主恩自喜躬耕能代食猶慙讀易未忘言
從今終老無餘想夏濯清泉冬負暄

西城新居兼簡翁張二君子

客居寄在鳳城隈戶外高城似障開午幌香殘簾不捲秋

庭果熟鳥還來取宜鄰接皆君子獨媿棲遲是冗才習靜
閉門常自在不堪愁病日相催

送李生還縣

戴子携書先北發李生落第復南征他鄉無奈常思去隔
月那堪又送行離思隨雲結遠樹客心先鳥過孤城關河
秋霽消停潦策馬寧辭十日程

中秋十五夜對月三首

獨坐秋庭露氣清即看飛鏡下高城豆瓜今夜聊酬俗簫
鼓誰家太恣情海內兵戈多病在天涯歲月二毛生無端
風物牽鄉思愁聽遙空過鴈聲

風清露冷中秋夜，獨坐槐庭與轉賒。月裏關山聞弄笛，斗邊雲漢憶乘槎。身經多病新開酒，俗似常時喜供瓜。可笑醉來迷出處，虛疑樓閣是京華。

雙槐如蓋延清賞，庭內有雙槐樹况復中秋月滿時。席映金波看不定，院翻虬影坐來疑。病懷對酒難深酌，心緒多愁劇亂絲。寂是荒庭倍蕭瑟，風前徙倚一題詩。

送 駕南征二首和許思仁韻

至尊問罪巡南國，萬里橫戈自總戎。朱杖過橋騰御馬，上

衣御馬以雙杖前導紫雲團蓋護飛龍。師臣酒進聞天語，少師石齋進餞酒鐵騎圍開識。聖容麾下材官金鎖甲，行宮

直繞一千重

藩王作孽延天討，聖主提師出有名。旗閃斗杓迴漢

色，角吹帳殿帶秋聲。非關遊豫乘休運，自愛經營定太平。

江上凱旋應計日，還從橋外候龍旌。

對雪

回風急雪連宵晝，高者如夷下者平。海外有疆俱混合，春

前無物不資生。淵龍窟變還同蟄，岸柳江梅各恣情。忽漫

鈎簾展愁眼，滿天驚絮撲簷楹。

九日買菊

鴻鴈聲中落日斜，重陽忽漫在天涯。門前買菊資酬節，院

內編籬與護花手自我培諧素賞眼從開落送年華比來
戒酒因多病坐嗅寒香一解嗟

萬壽節賀朝 奉天門書事

門下珊珊響珮璫橋前肅肅列鷓行時駕南往只即隨

拜舞 天門曉正憶氤氳 內殿香朝廷每受賀御奉

銅龜鶴各一穴其背貯異香焚之不復 中貴徑須收賀表每萬壽節宣親主表

宣矣 近臣還擬侍 龍牀大明朝例有儒臣四人侍班於殿中 常年此日

天多喜西內高居御壽觴

題王拱之首山書屋

使君下築首山隈高榜遙峰相對開寶氣靈符殷地發浮

煙虛翠逐人來嶺雲團戶隨朝暮巖鬼看書迥往回最是
康時須俊略未應歸去坐蒼苔

烹鵝會中次東臯韻二首

詞垣舊重烹鵝會詞林故事凡為考官者出場以所有鵝殺而烹之邀諸同年謂之云云 華

館今張上客筵迷眼未須談往事開樽且與叙同年幸陪

清話愁仍破敢謂尋盟志亦堅即喜塵襟連玉樹更聞高

唱落瑤篇是會出場即舉以因循之故至已卯乃追舉之故有尋盟云云

交舊相逢多感慨可憐不似看花時浮生萍梗元無定塵

世歡娛未易期即向朋簪換潦倒便從旅語識新奇莫嫌

此會成踈闊乘興還傾月下卮

雙嶼爲余君錫給事題

余子宅臨雙嶼下自稱雙嶼愛幽幽勝分囊麓東西赴影
落華江日夜浮叢桂雲開猿掛見深巖風靜鳥聲求起居
常對青屏色身世還應在十洲

和吳仁甫除夜書懷之韻

客裏年光又已非音書人事轉相違慣愁懷抱增今夕較
老形容歎落暉心苦思家歸計切身緣多病宦情微駟車
自古藏傾覆愛聽高人說見幾仁甫有野人見幾之句

元夜二首

遙天月色淨成陰永夜凭軒只獨吟客裏風光徒亂眼愁

中世故益驚心懸燈且自酬時節沽酒還須問俸金即對
星河成久坐更宜門巷謝相尋

九陌豪遊向夜深星橋燈火恣招尋綺羅香細隨風轉簫
鼓聲高帶月沉令節每蒙恩賜假舊例每遇燈節放假十日追歡無
復少年心天涯物色休相忤客子含愁正不禁

送秋執中還溫郡

春城楊柳弄柔絲二月官河凍解時渚鷺驚馬飛雙棹發川
雲垂帶片帆隨蒼黃不盡臨岐意惆悵還爲後會期酒罷
沙頭瞻望久離亭落日重悽其

送馬伯循考功送毋夫人還三原

省郎承 詔西將毋錦席臨岐暫舉杯
秦中川嶽喜人來從輿驛路春光滿問曉郵亭曙色開
到鄴原早回首功曹清重正須才

京師端午有感

客裏忽驚端午至年華物色苦相催
劇雙眉自不開彩扇每懷常歲 賜涼糕無復此時杯

端午 賜扇并吃涼糕於闕下以 駕南征故俱免 蘭舟戲罷龍江靜準擬 鸞輿

唱凱回 駕西征時駐蹕南京傳聞端午日江中戲舟罷即回京

王子衡自松江還感舊叙懷悵然有作

旌節新從江上來病餘懷抱向君開
三年問信憑書札今

日流連共酒杯歲月空驚催短鬢
名抵合媿高才由來 宦跡俱逢轉潦倒鄉園記此迴

得劉遠夫書因寄以此詩

城南別去秋將晏濠上書來歲復闌
對使不嫌頻問訊開

緘且喜報平安東郊詩好常看竹
予餞遠夫於東郊有聯句詩刻竹上南國

賢勞早據鞍 時遠夫勤事揚州書自揚 仕路風蓬見何日

不勝悵望淚闌干

春日遊岳君翰延翠亭

乘興來遊延翠亭消亭翠色謝丹青
桃花夾路開成錦柳 樹浮雲結作屏
裊裊晴絲牽白日輕輕戲蝶過閒庭
東郊

惟此堪供眼况有鶯歌對酒聽

秋夜聞鴈

坐聞鴻鴈過南樓露冷雲深夜喚儔飛影遠經胡地月歸
鳴長憶楚天秋炎涼自信違時好去就還疑識道謀陣度
雲中應散亂時駕在大同翠華在處擁戈矛

九月十一日同震光王氏莊上賞菊二首

王氏籬中千本菊重陽已過尚多花孤芳合占秋園色貞
白還宜隱士家元亮清高同載酒習池醕酊始迴車川原
叢薄荒村暮笑指東林吐月華

愛菊幽人多種菊千姿萬態闢輕寒叢迷小徑披枝過花

滿疎籬帶露看西圃重陽遊已晚東君二子待追歡

圃主王國

治不在二子以酒食待於圃中甚恭

白沙頰葉柴門靜坐莫寒香與未闌

寄許思仁學士

北樓學士家東魯住近官河海內知坐上乞詩常屢滿門
前問字有舟維風流獨擅詞臣選啓沃應懸 聖主思
一別京華十餘載幾時杯酒共襟期

寄吳仁甫張崇象二學士

張子新從漢沔來吳郎久住 鳳城隈清時勸講仍裁詔
暇日論文更舉杯左順門南隨相下文華殿後對 天回
黃扉金鼎台衡地調燮還須濟世才

壽傅君容母七十

二十年餘稱未亡丹心素節凜秋霜祥龜入夢臨初度青
鳥啣圖慶壽觴已喜諸郎付家學曾餐靈藥駐容光西藩
亞相留清白多母能傳內政芳

中秋無月和東阜韻

人情共愛今宵月可恨嫦娥閉玉樓豈有清輝從玩賞枉
將詩句費賡酬佳時對雨憐虛負浩興凌風欲上遊倚遍
簷楹倍惆悵滿城砧杵不勝秋

九日菊不花二首

籬中栽菊供秋賞九日無花負舉觴不辯紅黃空看品亦

知高潔本同芳枝枝淬露寒香細葉葉迎風翠羽揚應待
金天降青女幽姿相與鬪容光

陶公把菊憐無酒老子持杯繞菊行待汝開花賞九日如
予灌水苦多情霜叢露葉猶含蕾銀杏金錢誤指名分付
兒童莫扳折欲留全節與同盟

九日邀東阜中丞別業小集

重陽風日暖如春掃徑歡迎解豸賓叢菊未開虛節序新
詩長詠頌花神敵勅不厭棋頻對飲少纔行酒數巡深樹
空庭人欲散遙天月色滿城闈

和東阜韻

故園歸臥逼重陽三徑微微菊破黃却恨無花供插帽爭
誇有客與傳觴寒流湛湛連空淨落葉飄飄趁鳥翔對景
不禁情興發籬邊還共嗅輕香

別業偶成

白谷蒼崖絕俗氛荒園草閣淡斜曛天邊鴈陣林邊過城
內砧聲城外聞鹿豕祇應尋舊侶鷓鴣那復惜離群放歸
深感 君王惠剩有餘閒對典墳

訊菊

爾開何事太逡巡數過重陽又一句冷蕤故含凌晚歲貞
心似忍負幽人爲留伴隱先施幕預待餐英淨掃塵明日
重來更携酒好舒佳色對霜辰

別業牡丹盛開邀東阜中丞同賞

林霏野色靜年芳五畝園開獨樂堂時序欲驚三月暮闌
干突出百花王柔枝踈葉輕垂朶淺粉深紅巧競妝忽枉
中丞來對賞一尊聊與送斜陽

和東阜韻兼懷東岡二首

先生踪跡絕城市靜臥東岡兼閱農隔壠村童歸牧笛遠
林野寺向昏鐘牕前讀易時扃戶原上看雲獨倚松欲款
衡門同寤語出郊跨馬意常濃

睠彼東岡幽僻地北牕高臥比羲農閒吟風月詩千首謾

說公卿祿萬鍾編羽翻塔看戲鶴虬枝當徑散繁松思君
賸有同歸志轉厭塵中世味濃

奉和師相序翁老先生詠閣中盆荷初開韻

水芝初放引薰風翠蓋亭亭護粉紅直幹虛中還淨立穠
花細草漫矜工朶垂似墜迎台袞藕長如椽獻 帝宮
兩考中書元化足乾坤何物不沾功

再用韻奉贈

黃扉肅肅仰高風霄漢爭看捧日紅出納六年司 帝
命指揮百辟代天工中書總領紆 皇眷 密旨頻承
出 禁宮整頓乾坤登既濟太常應紀太平功

送貞甫太史南還

潞河新雨水茫茫渚草汀花映去航千里扶行將母氏
九重優命荷 君王夢回北極 天門遠望入東吳海
樹蒼上館編摩方有待未應高臥濯滄浪

送王拱之大叅赴陝西

十年天上翊 飛龍一日 恩光下九重冕綬驚看新岳
牧山川遙領舊秦封即知饋餉雖專事却恐催科亦病農
定有嘉謀贊元化關中從此樂時雍

愈憲忍菴先生壽詩

夫子行年六十四遙聞嶽降是茲辰醜顏白髮長生酒碧

水青山自在身桃李餘陰留楚粵文章高價重甌閩燕臺
獨有門墻士獻壽無因到海濱

良鄉元日於公館中設香案遙望拜 闕

山城切憶朝元會紫極頻瞻 御氣通兩掖門開趁百辟

雙龍簾捲識 重瞳御座前有竹簾上織陛降二龍永昌祝徹嵩呼外履

正 恩傳臚語中百官祝詞有曰奉天永昌制可柰

此時心欲折焚香遙拜 大明宮

良鄉有懷元日再題

翰林學士詞臣長十二年來徒具員 聖主恩深旋起

廢玉堂清切寔妨賢自慙講幄全無補敢謂官階遲未遷

元日客程尚飄泊故鄉回首一潸然

送倫彥式祭酒赴南雍

典樂儒臣借講筵節看雙旆向江邊文章重望懸山斗教

育多端師聖賢鍾阜龍形橫邱北玄湖鑑影送樓前南監在鍾

山之麓後河流波亦經監之東畔祇今士習支離甚經學還須作意傳

奉壽少保閣老序菴李公

玉帶麟袍侍 紫微從容謀議有光輝獨旋北斗調元氣

總攝中堂贊 萬幾篤棗忠勤存睿想太平功業重黃扉

耆年已過身強健難老長爲世所依

偶作二首

芒鞋藜杖白綸巾寤寐山居自愴神
河畔田疇堪種麥杏東鹿豕不嫌人
鷓袍老著慙朝貴黍酒秋成憶社賓
金馬玉堂清切地豈容衰病伴詞臣

白髮青袍侍紫宸曳裾館閣媿儒紳
行藏有命惟從道遲暮由吾不怨人
病體病來常是苦愁魔愁劇轉相親
清朝竊祿真無補欲向滄洲理釣綸

和劉遠夫七夕韻

綵線金針闔早秋乞靈織女共牽牛
向時玄秘真無比此日人情巧更浮
漠漠遙天分布列茫茫塵世說綢繆
排雲欲問從前事安得星橋接近樓

七夕作

允牛震女燦玄辰靈駕冥冥度漢津
玉手輕拋雲錦杼仙蹤高出鵲橋塵
風波不阻今宵會心事那辭隔歲陳
莫向遙空增感慨最難相際是君臣

大社齋居詞林二首

社壇報祀齋明日玉署承恩再到時
扈列久腐儒何敢怨遷遲身衰入夜
惟便睡興減逢人懶話時徙倚風前
悄無語天高地迥不勝思

箴亭翼翼栢森森對此令人萬慮深
地是蓬瀛風月滿心兢淵谷鬼神臨
池邊點點螢流火露下雙雙鶴唳陰
幾度

比郊叨相祀不才久媿濫詞林

夏日京邸懷杏東別業二首

京華南望鄉園隔憶在茅齋野興便輕篋短衫踈雨後小
窓高枕白雲前貪隨鶴子穿林外閒傍鷗群坐水邊風愜
舊遊俱不遂天涯回首意茫然

郊扉閑寂深林裏風牖翻宜夏月開領客乘涼對青竹呼
童汲水浸黃梅山屏雲幕時供給酒侶詩朋自往來今日
炎蒸苦相憶不勝悵望北城隈

別業在北門外

送王宗周侍御按河南

幸從鳴玉趨朝鼓忽送乘驄按豫方即有先聲動山岳已

傳當道靜豺狼民風吏治須參伍師尹藩侯在激揚白簡
歸來報嘉績臺臣準擬屬臺郎

送唐掌教歸楚

君來越歲便投簪薄俗誰應識此心豈爲儒林官不達祇
緣鄉土思難禁山猿溪鳥正相待石窟雲門幽更深聞道
諸郎俱秀發傳經爭似廣遺金

九日別業登高

處處霜楓帶白雲遙天廣野淨無氛冥鴻極浦群何遠踈
菊空巖他自芬老去登高難騁望興來引酌但微醺長歌
不盡臨風意獨立蒼茫落日曛

荅王承恩大叅時有詩見寄

常掩郊扉臥白雲靜中無日不思君詩篇病起還乘興藥
餌秋來大有勲君病藥之遂大愈海內朋從俱遠隔曹東書札每
相聞予放歸故舊多踈惟君書問時至幽探一願行西墅君別業也為報山靈
待檄文

送周教諭赴陝西

送君應自憐離索言笑追陪只暫同祖席三杯別河澣文
旌十日到關中山川迤邐行周道煙草荒涼問漢宮最是
馬融能作士絳紗帳裏足春風

送周司訓還蜀

七年鳴鐸淹儀邑萬里歸舟向錦城桃李滿庭還自耀絃
歌盈耳足餘聲巴山落日猿啼切巫峽寒江水勢平浮世
人人縻好爵急流勇退見先生

代張尹送周司訓

懸帳鳴琴從宦地可憐去住不同情林泉君已耽長往政
教予何賴共成險道山川極西蜀連天風壤帶南荆仙池
道後時垂釣擬有鳧鷗接翅迎

至日

仲冬過半逢長至海畔雲微霽景開岸上柳條含凍色地
中陽氣結春胎閉關尚憶先王事吹管還飛此日灰時序

驚心人易老無端寒暑苦相催

白鳩二首

白鳩不省來何處牧子探巢下紫榆好事山人携竹篋親
從鄰客買拳雛學鳴未解催春種引頸還能識主呼祇爲
羽毛常作苦樊籠側目望平蕪

愛爾鳴鳩白似霜筠籠繭索繫迴廊竒毛映日瓊華炫煙
目懸珠琥珀光即占鵲巢居近野還疑靈種出西方由來
專性非凡鳥早有詩人歌在桑

送甘生還蜀生公望亞卿兄也

積雨山川此日晴都門祖道送君行重關風壤連秦棧三

峽樓臺接錦城棣萼並輝同樹秀鷁群暫隔在原鳴今宵
有夢還京邑共被長牽手足情

送張憲副回豫省

帝里相逢忽仲秋客從汗漫似萍流合歡暫對樽前酒惜
別還登天畔樓郡國遙遙關樹渺風煙漠漠晚山稠臨岐
無限南歸興愁見河橋雙旆悠

送丘主靜太守之撫州

銅符再領向南州共理還分 聖主憂 賜第昔爲名

進士專城今視古諸侯寅清尚憶春曹望豈第長留粵郡

區先爲廣州府見說豫章迎父母先聲早慰十分愁

送曹仲禮大叅還晉省

邂逅京華慰所思一尊聊與話心知
歡娛浮世豈常有聚散流萍難定期
予老踈迂須退處子才經濟合匡時
玉標蘭臭令人愛無計扳留細論詩

西莊晚歸

雨餘更愛秋林靜倒載言歸興不窮
天遠如垂星在樹風長忽送月緣空
樹狃爭吠鳴騶過宿鳥驚翻列炬紅
霜氣淒淒寒事早人家相競滌場功

晚趨趙州城

三冬無雪如春暖趙地雖寒柳欲黃
陌上冥塵深一尺夏

來麩麥絕千箱山啣晚照趨城急籤計郵亭去路長
非是衰人貪進取九重恩命未能忘

途中漫興

忽承恩命又辭家燕衛漫漫道路賒
講讀十年叨學士雲霄三載別文華
爭如劍珮聽朝鼓何似綸竿坐釣沙
客裏將雛聊自慰戲教書字嘆圖鴉

次內丘遇風

發發高風北極來忽聽晴晝起崩雷
沙翻廣野千山失木折空巖萬壑哀
久住林丘隨鹿豕又驅車馬到塵埃
半生奔走成衰老轉覺飛騰志已摧

入大梁尋和大齡不見用東阜韻

尋君不見空惆悵騎吏無端却又催聞道課耕已歸臥戒
門辭客使人猜老懷種種向誰盡秋釀欣欣應自開行出
長堤更延佇雲濤樹杪首重回

哭亡弟建夫四首

命窮汝病竟難起傷極吾生幾不存同父弟兄惟我在老
年心事共誰論愁來形貌無人色淚下衣裳有血痕地闊
天高風淅淅可憐何處泊游魂

五十年來鬢似銀

弟未五十
髮半白

病餘猶不替憂勤田廬南浦

汝何有花竹北園他自芬落葉晚辭唐棣樹在原中斷鵲

鴿群獨憐痛哭老無力惻惻聲微聞不聞

性迷麴蘖身多病轉見沉綿竟不存憶汝形容難在眼使
吾坐臥只銷魂同聲已斷墳笳奏急難常懷手足恩時向
帷堂一洒淚芬芬空薦酒盈尊

昨夜吞聲憐汝困茲晨大哭苦無音家門不幸失才弟造
化無知傷我心竹裏彈棋成往事花間開酒憶同斟息機
加飯丁寧語悽惻那能誦舊吟

弟以多事致疾病尤
不息故曾以此諷之

和東阜喜雪韻

玉龍高戰寂無聲敗甲紛紛委碎瓊譙鼓應難報昏曉居
人不自辯村城良朋得句能相惠賤子揮毫漫一賡早久

歲殘纔見此可勝憂喜滿懷并

送王德輝還郡

駢駢五馬辭城 闕望望東人待福星不解銅符還郡閣
更緣貝錦重 朝廷即愁井邑民多徙轉見催科日未停
濟難康時須俊略早看功業上青冥

送胡邦忠如京師

曉辭親舍履征途僕馬依依等棄繻幽薊遠探山海勝金
湯一覽 帝王都時清正際朝元會 主聖仍聞咨
岳謨二月爲期應不遠杏桃花下共傾壺

子淵方伯自吳中道吾儀封歛然來顧見之甚喜

再茶即辭去別後却有作因寄上二首

共出 承明十二春平安惟訊往來人向時獻納期匡

主子淵以進講
忤旨外補此日馳驅不愛身黑水華陽新岳牧玉堂

金馬舊詞臣相逢無柰仍相別引起離愁暗損神

館閣追陪憶昔時相逢各已鬢成絲鹽梅準擬君調鼎農
圃須容我作師茅棟停軒知有客野人倒屣候論詩黃金
難買青春色忍負花前濁酒卮

和東阜對菊韻

秋空灑露泣花香翠羽金錢近月陽真共松梅榮晚歲耻
隨桃李競春妝踈枝雨過娟娟淨密朵風翻疊疊黃更取

真心奪造化不貪遲日怯嚴霜

和中川韻奉荅

留都官府神仙並君在詞林擅令芬賦就江山有異寵公
餘登眺帶微醺庭栽綠竹棲靈鳥院多竹屋對 皇居蔭紫
雲計日玉亭拜 宣召重華應待共凝勛

送段時卿赴無錫

早歲才華衆所稱交游如子是良朋一官佐縣聊須爾萬
事浮雲未足憑但使檢身同白璧不妨止棘有青蠅勸農
督水俱仁政時卿管此二事莫學哦松負却丞退之藍田丞壁故事

送邊汝明赴南光祿

荆河海岱兩旬宣卿寺留都官似仙登眺再題江國勝汝明
先為應天尹調和先握相臣權火雲在樹禽張口伏日經山石
沸泉驛路月明動征鐸原華高下正相鮮

和汝明留別韻二首時在予莊餞別

尊前拭手用絺巾對客開瓜意自真遠顧衰翁尋舊約汝明
春初約過儀封相會不辭毒熱為情親山啣白日催歸劇席展青林
此會新別後未知重見處淹留莫厭酒行頻

君着緋袍我葛巾都忘顯晦任情真同心膾有金蘭味異
姓賢於骨肉親林色山容供指點竹聲鳥語闔清新城東
咫尺天涯隔莫更停杯告別頻

雨中飲杜處士草亭

簷外雲來忽作陰
草亭開酌慰幽尋
村村樹樹鳥相喚
雨風風花不禁坐
對林丘真勝地面
忘爾汝是同心隔
年有約償今日更
寫新詩續舊吟

水退口號呈東阜中丞

水聲如怒連三日
一去洪濤斷細流
詎意朝宗作昏墊
空教秩祀比諸侯
禮四瀆祀蛇龍已遠祇今害果窟休思上
世謀但恐歲飢民
轉徙老夫空抱杞人憂

疊前韻再呈東阜

築堤苦被民胥怨
今日憑堤障逆流
千慮幸能協君子
欲

修築舊堤獨東阜以爲然後水漲卒賴之全功尚惜阻前侯
先議修堤比舊高闊各加一倍王尹
錦不以時召夫役故功半焉甚可惜金湯可比真無策
籠錘重勞是一謀舉邑相安處堂燕幾人可語棟焚憂

入山和韻

九列卿陪趨祀事
七陵瑞靄接
皇京群峰疊翠真
天作祥窟靈源本地成
執簡昔曾叨扈從
奉章尚憶竭微誠
予舊歲凡四叨扈從因君歛動春遊興
千樹金桃想自生

苦熱用少陵韻

伏日將除轉炎熱
暫拋短筭亦難能
葛衣屢易不禁汗
湘簟雖陳還苦蠅
長漢縣流空自潤
驕陽爲雲故相仍
老夫

病暍思涼冷安得元戎票致水

和東阜中丞題杜氏亭子韻

喬木短墻茅屋靜東郊幽勝此無餘旌麾雙引中丞駕雲
樹深藏處士居白露杯行秋釀熟黃雞膾出黍初肥城中
滾滾多麀擾我欲從之共論書

勤夫哀詩

春時問訊君無恙首夏人來說大還齟歲相將居鳳郭中
年更與侍 龍顏連鑣出餞傷同輩對月題詩憶共刪
今日帷堂隔冥漠不勝哀淚落潛潛

飲重陽三首

即看紫寒度歸鴻又見黃花滿玖叢對景况逢朋輩合得
歡莫遣酒杯空寒沙帶水明秋浦霜葉辭枝趁晚風小舍
秣今成勝會龍山從此恐難同

海門龍臥一經秋未許滄江把釣鈎巖野暫須留傳說
朝廷準擬相韓休即從唱和開詩社更取登臨對酒甌無
數禽猿隨杖屨水頭看罷定山頭

賈傅才華擅洛陽喜看鳴鐸向濠梁春衿几杖歸師席白
日笙歌在講堂野水石橋相帶引浮雲遠樹共微茫士風
文體今多弊君到還須一主張

和貢院對月亭韻

月桂婆娑映彩雲雲容桂影錯成紋上天終古垂玄象下
界于今仰異芬臺史岳侯諧夜賞物華靈景媚秋分曠懷
逸興誰能會賴有緘詩爲遣聞

和至公堂閣卷之作

秋闈提調使君歸天地明明鑒此心共說雙眸懸藻鑑誰
言滄海有遺琛應知麟鳳歸羅網已見風雲豁宿陰計日
撤簾誇得雋紛紛桃李滿園林

詞調三首

晚秋感懷臨江仙

風厲霜淒將日暮空林鴉鶴飛鳴蘭皋楚歌薜蘿平風前

傷落葉飄轉類浮生○况是悲秋秋更晚粟腸欲訴誰明
美人不見獨含情今年看又盡何日續幽盟

水調歌頭曲和桂洲韻

天祚 皇明國日繞正陽關唐虞治化方盛擊壤喜相安
真個明良再作可是都俞更見泰運幹重還已遂從 龍
志大施壽民丹遍乾坤合宇宙少創殘紆籌爲國彌切盡
瘁肯圖間爭仰二公弘化堪羨尚書應斗地位逼星寒正
倚調金鼎誰許臥雲山

無俗念和馬泉韻

蒼谷青林高臥穩忘却曾伴朝傑浮世豪華風燭似任他

片時明滅採藥經丘濯纓臨水倦後時還歇宦海風波作
惡慎無輕涉韶華爭似流水試問前途幾許閒時月對景
逢歡須作樂况是酒錢無缺詩社留連醉鄉潦倒休向時
人說私喜歸閒心戴 九重丹闕

杏東先生文集卷之五

杏東先生文集卷之六



明太常寺少卿兼翰林院學士儀封郭維藩 著
都察院右副都御史門人德清蔡汝楠校刻

記五篇

韓侯脩廟記

正德丁丑夏四月予告謁歸既以享禮見於父母翌日乃謁文廟廟瓦皆脫落不能蔽木木亦摧朽罔雨格淫水瀝夫子像交於頤有司者棚席以障之席且就壞矣乃肅然心傷弗能視也秋七月邑侯汝哲來自朝邑予告之故侯謁廟其傷如余退以告余曰廟之云子傷宜矣子傷宜矣

然予宰也有政教之責焉夫政非教不淑教非政不行是故廟者政教之所出也敢弗崇與乃遂經其費於是凡訟而罔理者富使輸木與灰貧使力作皆准其當匠則官擇其良而與之直侯諏日告於廟乃肇事木則盡易其舊瓦則仍其舊者半壁若庭剝者圮者凸者窪者皆治如舊自九月乙丑至十月壬戌凡二十有二日而廟奕奕矣乃民不知有役役不知有費焉於是學生李富苗天潤因有請於予曰廟敝且十年凡經四令罔有及者侯始政吾邑即有此功盍記諸石以爲後勸予曰未盡侯也茲役也其有善後之政焉夫用不擾民力省而功倍仁也因改中權費不溢功知也謀定舉事刻日而功成果也是故仁則必愛斯無苛行矣知則必察斯無遺奸矣果則必斷斯無敗謀矣以是於政有弗善者乎故曰茲役也有善後之政焉侯廉而有節姓韓氏名邦彥

祁門縣創建環谷書院記

環谷非谷也其地山谷環繞也祁門鄉先生汪公德輔居之因自號曰環谷中有講堂歲久而圯然而未有書院也先生陪祀于紫陽書院然而未專祀也有書院以專祀先生也乃都御史陳公文鳴命祁門令洪哲爲之也縣治之右有山曰大洪山之下爲社壇社壇之左其地博大以長

實爲院之位山形盤紆回合如梳其院題曰環谷書院蓋擬其舊云其制中爲堂三楹前爲門楹如堂數又前爲門一楹肖先生像居堂中其費以其俸而僚屬亦以其俸來助補而措之官者才十二而民不與焉以嘉靖丙戌十月十有三日肇事再月倍日而院成令釋奠焉以妥其神奠之日邑人士皆樂觀厥成翕翕向風矣令退曰茲功也都撫志也弗可弗著其始也遂以余生光賚狀來留都請予記予曰祀之哉祀之哉夫古所謂鄉先生沒而可祀者非以其行足以表世學足以開後與祀之哉祀之哉先生元人嘗以省試舉于有司已而棄去逮我 太祖之黜元

命也遂趨脩史之 召非中隱見之義與其行正矣先生之學也非六經孔子之言不究在易有音考在詩有音義在春秋有纂疏在禮經有補逸在通鑑綱目有考異非精於經與史之義與其學正矣夫行正則身脩學正則行純二者交益聖功也豈曰鄉先生之云乎士之後先生而生者瞻其像而不法其行是不以先生自待者也讀其書而不求得其義是不以先生之學爲學者也奚以鄉先生爲哉是故本其隱見以行已斯不陷於非義矣本其經訓以求道本其史考以論古斯不惑於異學矣由是而之焉上則聖次則賢次則亦有令名則邾門永爲君子之鄉而先

生亦永有辭於邾門祀之哉祀之哉陳公問學文章推重於時其撫南畿也以表賢興教爲先務故其化大行令在邑六年政宜于民是役也蓋嘉績云

南京翰林院重修記

嘉靖乙酉夏五月予遷南京翰林院侍講學士以十一月二十八日蒞院院圯太甚堂之右廊凡五楹二門右介凡三楹圯十餘年矣堂後南廂三楹圯八月矣遺址宿莽長可及限土地祠寄于右廊之址上棟撓壁穿後逼民廁腥穢之氣達于主櫝大門三楹木朽如絮瓦半脫罔格雨其下支以木岌欲顛矣儀門之敝如大門焉交堂三楹孔目

廳三楹北廂三楹屋脊皆崩墜卽雨下湜水如注屋中積淖如塗附講讀廳暨左廊迤邐而西餘二十武壁皆地裂欲傾勢逮于屋其堂圯階砌齮毀土崩或凸或窪難于走趨顧瞻久之盡然用傷遂以繕脩請諸司空司空以詔停興作報罷會李孔目朝貢來送院卒直金總一百二十六兩有奇予曰是月以前皆吾未任事之日也奚可受直盍致諸攝院二君子乎而通政叅議黎公師召太常少卿何公粹夫皆堅辭之孔目以復予喜謂曰廢其可興乎吾欲罄此爲之子其具材飭工以旣厥事孔目曰唯唯於是剏而復之者爲南廂爲右廊爲右介毀而脩之者爲大門

爲儀門楹數皆准其舊剏之者爲土地祠一楹居二門外
之南偏其崩春巖墻頽圯敗砌皆加繕焉凡用木以根計
大小二百三十有奇甌若坏以方計甌一萬八千六百有
奇坏一萬三千有奇瓦以片計二萬二千六百有奇石灰
油鐵膠煤以斤計灰八千有奇油以下總百有奇工以工
計匠氏一百八十有奇塤氏一百九十有奇總費金一百
二十五兩有奇以丙戌三月十六日肇事至九月旬又三
日告成焉孔目悉會其費以上且琢石請書其事予曰人
無乃以爲伐乎曰非伐也夫院之廢極矣先生以卒直之
金始克復之欲紀諸石者俾後之人知其廢而復也則必

思保之矣如其廢也知其前之復也則必思繼之矣夫保
則復者無或廢也繼則廢者或可復也皆于石焉賴其何
伐予曰諾遂書而刻之是役也大門之材與費皆出工部
惟瓦與繪事不與焉又嘗飲之甌六千方瓦六千片石灰
三千斤桐油六十斤云

柳溪書屋記

明有冢宰曰東崖許公天下罔弗聞公之爲宰也董正百
官官罔有倖進雖奄瑾擅國命亦弗能撓以私不亦節乎
獎惠吏絀殘吏吏能而無惠政者亦抑之不亦仁乎公莊
而不驕羣僚嚴之門無習客焉不亦威乎急於進賢不以

好舉不以怨抑不亦有容乎故君子之言賢宰者歸焉公
嗣子廷章敏而肖者也構書屋三楹於柳溪之上屋負東
崖且以爲號夫喬然而立者崖也俯然而垂者柳也喬者
父道也俯者子道也子之道在敬承于父東崖故有書屋
公之處也寔成德于茲溪之外有山有竹山有堂竹有亭
廷章構屋必于崖後而讀書必于是其知敬承之道與是
故觀崖之排風雷而弗撼則思公之節觀崖之出雲雨以
澤庶類則思公之仁觀崖之欽巖可仰而不可凌則思公
之威觀崖之生物畜珍則思公之有容夫思則思求之求
則思得之得則思守之守之固斯可見之行以配于東崖

矣夫讀書所以求心也求心所以致思也廷章其知敬承
之道與

劉壽州修橋記

壽州北門之外淝水過焉行十里合於淮又州良方有湖
廣袤百里每七八月之間雨集三水會溢奔放懷城無間
歲焉舊有橋代涉歲久而圯石皆寢諸水凡往來之人深
厲淺揭時有顛溺大爲民病乙酉春有詔贈劉子刺壽
因大修廢政次及於橋臨河歎曰草荆而重負又何怪焉
遂僱工飭材乃命龔氏曰凡採石用積理而黎者勿用疎
理而丹者積理者弗剝疎理者善剝違此石弗良命陶氏

曰他日汝用石汝其往贊于龔氏命匠氏曰凡求材取堅木勿取脆木堅木禦蠹脆木叢蠹違此木弗良命治氏曰凡煨鐵火欲熾淬欲數熾以數則淬去而精違此鐵弗良又表位以示曰橫勿過四十尺縱勿過四百尺中勿過四空石覆三空板覆一空使可啓闔勿過舟楫謀定而工乃大作復即工所申命曰陶氏來汝爲空定基欲審爲基欲廣比石欲密施灰欲周如無介焉是故水雖湍而弗傷於空又曰汝覆空布石欲大小相比下石欲厚薄相比施灰而加填如無介焉是故雖有走潦而弗淋於空曰龔氏來汝其選石以從于陶氏曰匠氏來汝治材杓當視其鑿鑿

杓相得是故木雖敝而弗脫曰冶氏來汝爲鐵貫者欲厚其體直者欲銳其下圜者欲無辨其介是故達諸堅而弗敗又命徒曰重服重輕服輕各共其服重無或逸於輕輕無或逸於併工有程課徒有番更日有津犒故命不再申因有糝事始乙酉秋訖丙戌冬凡暮有三月而橋成命之曰利涉郡人士觀之皆歎曰博大雄偉自有茲水來或未有茲觀也盍紀諸石以頌厥成於是鄉貢士吳生介太學生柳生聯芳乃南渡大江請予記予因劉子而有感於子產之事焉其如晉也責其不以時平易道路晉人服罪及相鄭乃以乘輿濟人於溱洧之水言是而用違此孟子譏

其不知政也夫公而有制周而不遺之謂政劉子在壽薄賦輕刑興禮明教故今民安其生士脩其學美化浸浸矣成橋之績非所謂有制而不遺者乎劉子之賢勿論今人雖子產亦未足多也劉子名天民魯人嘗爲選部大夫守職不阿毀於讒口其成橋惟在壽之次年云

序一十四篇

贈大司徒黃山鄒公考績序

黃山鄒公守大司徒之三年將上其績于朝其子部大夫士咸圖以言贈於是魏大夫宗召潘大夫希平來請於予旣不得辭乃遂言曰夫邦之建官以凝績也官之考績

以陳職也朝之黜陟以馭官也是故其績凝者其職脩職脩於是乎陟及焉其績因凝者其職廢職廢於是乎黜及焉故考績之典朝廷賞罰彰焉人才賢否辨焉政治得失昭焉功業久近由焉國家治忽係焉是朝政之大而臣職之急者乎夫官以績至者也司徒之尊非一陟而至也而績之所由來者漸矣昔公之給事內廷也諍言直議言務其大諫績著矣而逆瑾弗說也以都諫而遷于郡瑾縛於是乎有叅政于魯之命又有布政于閩于滇之命然而三省安而民饒于畜旬宣之績著矣於是乎有中丞撫順天之命然而平叛苗以寧其民綏定之績著矣於是

乎有總都臺之命然而羣寮率職時則無匪人無秕政風紀之績著矣於是乎有今茲之命焉初公之涖南省也委吏守空庾而卒有饑色通國皆危之公以便宜請諸朝命以逋賦屬諸撫臣以督餉責諸藩司然而粟來而溢于庾總賦之績著矣是行也 朝廷其又命之乎其將留贊大政乎夫大政者天下之政也非領一方專一曹也今天下之弊士張詖說而詭于聖道德殊矣衰冠詭服自士而達于賈狙皆服之風俗瘵矣國是靡定人罔適從公議乖矣官府憚難事而遞遜焉因循成矣幼陵長卑間尊禮化乖矣而侈俗惡政盜患民災不與焉此不可後視而緩圖

者也其在吾 君與大臣與公量足以有容識足以有別才足以有濟向者之績既隨在而著今也出其有以劑量而贊襄之大政一轉五弊可祛太平之業必自此興矣他日上其績 朝廷命之崇階高爵又安可涯乎公其無忘天下哉

贈孟溪鄭先生擢南京太僕寺少卿序

孟溪先生登 朝籍二十四年至是四易其官矣始爲行人使職也其使於四方凡吏治之臧否民生之休戚罔不究知人或聞其論歷歷如躬履其境而見其事者君子曰使道其在是乎行而不忘公進而爲給舍諫職也論人必

究忠佞之實建議必要成敗之歸君子曰諫職其止是乎
不矯不欺又進而爲南京尚寶司卿秩華而務簡地峻而
心清然而弗自逸也其於天下事因革張弛先後緩急參
伍錯綜具有定筭君子曰其天下之達才乎處靜不忘其
有事在寺六年 天子用吏部請簡爲南京太僕寺少
卿君子曰位已顯而責亦重然而未盡其才也予聞之曰
非然也非然也夫馬政猶邦政也故周人以司馬名官夫
國非戎不立戎非馬不行謂馬政爲細務可乎是故戎馬
相因者也其在于今戎政不舉故馬政亦廢昔者內郡患
盜徵兵于邊王旅戒行投牒索馬戎馬之單耗奚如是之

甚與故今日之重且劇者其太僕之任與夫養軍猶養馬
也今夫軍閉其欲則忿戕其生則怨餓其體則瘁匱其力
則傷如是安得而弗困且逋也其在馬也亦然水草之弗
適其形瘠以困勞逸之弗節其力匱以僊追遊之弗時其
欲離以沮病瘍之弗恤其生殘以害如是安得而弗耗且
敗也夫軍之害在人去其害軍者軍斯妥已若夫馬非地
不牧非人不能牧欲蕃且息不其難乎 國初建太僕寺
於江北以其地高曠而水草美也故馬息而用足今其地
尚在而馬之不及舊者何與蓋牧吏失其職而牧地失其
舊也孟溪之往也行牧地而表其疆復其舊而後以周官

趣馬巫馬校人庾人圉師圉人之政督羣吏而課其成如是而馬不蕃未之有也馬蕃而邦政亦可裨矣孰謂太僕之職不足以盡其才乎司諫黃子趙子林子以孟溪舊諫僚也問贈言於予予告之如此凡舊諫咸附焉

送侍御朱大武三載考績序

三載一考績三考黜陟幽明此虞典也我高皇帝之馭羣吏也以之其制凡吏滿三載者書其績于冊從其長考核之已乃達諸臺部臺部又考核之然後上諸天子積三考而黜陟行焉今京官自五品以下非守堂篆者皆然若夫御史之績則有不可同庶僚求者何也庶僚之

績易書御史之績難書易書者易見難書者不易見不易見故不可以庶僚之績求焉夫會計明而出納允賦吏之績也儀物品式之當其可儀吏之績也卒試而般戎吏之績也持法如水民不知寃比吏之績也故當事者易集而考核者展冊即可見御史之職雖無所不得聞而其大且要者則不在是夫御史主諍君德之成就關焉又主察百官之邪正關焉是故御史之於君有諷諫有正諫有危諫其於百官也有婉刺有直刺有聞刺諷諫者假彼以明此其操心也委正諫者因事以陳義其為謀也忠危諫者直辭以犯顏其致忠也決諫雖不同歸於正其君而已矣婉

刺者舉其失而不沒其美欲其改也直刺者斥其惡而弗與諱欲其退也聞刺者有聞卽舉宣其事于衆欲其惡無所掩也刺雖不同歸於正其官而已矣夫諫行言聽則君臣於是乎皆正君正則可以作則可以垂謀臣正則可以替議可以行令由是而明王之道興由是而太平之業著此御史之績也故曰不可以庶僚求也朱子大武之爲御史也三年矣學粹而行潔節嚴而禮恭臺中重之凡有舉也審而後發其諫也不欺其刺也不枉故疏上而無弗行之言是以三年而功加於上下乃大武以績上諸南臺臺大夫曰賢乎哉御史也署上考又以績上諸南銓銓卿曰

賢乎哉御史也署上考又將以績與考上之銓部奏之天子也大武戒行於是侍御戴子承緒謂予曰大武考上上先生盍言以贈諸予曰予何言三考足以見賢矣今入奏天子將又寵綏之其賢當益著予何言承緒曰請卽以是爲贈哉

送僉憲李天章之湖廣按察司序

天章爲禮科給事中三年有六月吏部推其賢天子命爲湖廣按察司僉事將行都諫邢君伯宇暨諸司諫屬予言以贈旣不得辭乃舉天章之賢以質之曰天章之在諫省也論人必究心術之微言事必中成敗之會明矣乎

曰然與諸司諫議天下事是非必面盡其退也無後言直
矣乎曰然舉不嫌怨刺不辭親公矣乎曰然見義必行不
沮不疑斷矣乎曰然此固優於憲司也夫湖廣大省也爲
府者十四爲州者十九爲縣百有五府若州有守縣有令
皆民之牧也牧者賢民胥安矣牧者不賢民胥戕矣戕乃
怨怨乃離民而離焉非國之福也是故舉賢絀不肖以
求民之安者非憲司之責歟賢否之辨不可不慎也夫廉
者無欲其氣揚其言遂正者不阿其氣舒其言直仁愛者
無華其氣溫其言確貪者虞敗揣以僂諂者務悅巽以承
巧者觀望迎以順六者之吏其賢不肖相去遠矣非難辨

也而每賢者沮而不肖者昌何也夫今之監司皆挾權以
陵下故今之守令皆屈已以援上陵者日益驕援者日益
諂上下相安而不知其非也賢者守正則不諂上以爲傲
而惡之不肖者弭過則務諂上以爲恭而悅之惡故不知
其美悅故不見其惡是以是非不明而賢否倒置也欲民
之安得乎天章旣以明直公斷成其信其達於是也猶反
掌耳是故明斯賢否不枉矣直斯喜惡以道矣公斯舉刺
無我矣斷斯利害弗奪矣夫如是則賢者安不肖者勸安
則行其志勸則化於善而守令之政皆脩矣則百二十城
之民不將舉安乎此憲司之急務也故曰郡縣之責付監

司云

送吳靜之副山東憲司序

朝廷以民治責守令以察吏治責監司是故守令以安百姓興教化爲職監司以端表則公舉刺爲職守令之職舉斯民治行矣監司之職舉斯賢者昌而不肖者遠矣故監司不可不慎也是守令之表也今夫民治之不臧也十城而六七也非時然也皆有司者之過也是故貪者徇財其心荒荒則政疵暴者任刑其心慘慘則政苛佞者媚人其心卑卑則政陋通者務名其心誕誕則政僻四者雖不同皆民蠹也及監司之入其境而察其治也乃謹其送迎降

其身志飭其簿書隆其供具皆足以滅其醜而示其有爲豈惟免咎有因之以取薦者矣是故監司者非已正希不受其蠱也吳君靜之自刑部正郎擢山東按察司副使將行允升諸君子丐予言爲贈夫按察司外臺也副使臺貳也守令之表也可弗慎與夫所謂表者貴身不貴法貴成人不貴威人也傳曰有諸已而後求諸人無諸已而後非諸人此之謂也是故上廉潔則下不貪矣上仁厚則下不暴矣上正直則下不佞矣上忠信則下不誕矣其猶有毀行而厲民者是自絕於善者也由是而舉皆賢之可升者也由是而刺皆不肖之可斥者也夫如是則守令勸勸則

皆賢賢則職舉而民治行矣何憂乎四者之奸哉予與靜
之同朝知其賢甚習以立齋司寇公爲父瞻之都諫爲弟
庭訓之所漸被昆季之所滋益貴而不驕可以觀其仁富
而不侈可以觀其廉持法不撓可以觀其正獄成不變可
以觀其信所謂表則舉刺者有其具矣夫表正則取影直
水清則鑿物準靜之之往也則守令化而勸戒昭山東之
民治其將大行乎諸君子日望之矣靜之盍慎焉

送張孟復副四川憲司序

孟復自刑部正郎擢四川按察司副使奉 命飭兵備撫
流民於重夔之間將行予乃述鄉大夫之意以告曰兵之

興有由然也夫政庀而後費冗費冗而後賦重賦重而後
民貧民貧而後盜起盜起兵斯興矣於是又取費於民民
之竭於取也益去而爲盜兵愈興而盜愈起此天下所以
益敝也且飭兵威也撫民惠也威也者末也惠也者本也
務本則民安民安則治興而兵可去矣務末則民殘民殘
則亂生兵雖飭無益也本末之辨不可不審也夫民之流
由不能生也以不能生之民轉而求生苟不植之使生是
出水蹈淵避火就焚也欲其弗盜得乎是故授以常產則
不去正業而稽事則不曠禁貪吏之侵刺則不困厚積而
薄取則不匱抑強植弱則不暴興學厚俗則不悖夫如是

則民皆樂生而思親上矣由是率其子弟以習戰陣輸其財賦以足器用定其心以信上之賞罰致其身以奉上之節制其猶有狂悖之民據山谿之險如駟虜之爲者可以一戰而縛矣夫以兵安人者未有能安人者也以惠養人者乃可以即戎本末之類不亦較然矣乎孟復之在部也屢讞疑獄於朝人服其謀議刑不刻刑成不喜人服其愛處繁劇之司無委案無滯訟人服其才質直無華人服其誠夫謀以治兵則揚愛以撫民則輯才以造謀則善誠以立愛則久其於重慶也固已優矣雖然造謀在才用謀在斷立愛在誠推愛在政蓄疑蠱志謀斯敗矣徒善無法

愛斯塞矣是故理明則疑除身脩則政立

送僉憲盛大化序

今之言法官之難者曰法官以法制民之情而息其爭者也民之情強者怯匿黠者癡匿奸者良匿官求其情而不得也刑其既得也刑刑斯苦苦斯怨怨斯謗矣是故廉也而以爲非廉也公也而以爲非公也明也而以爲非明也斷也而以爲非斷也一人倡之衆人和之傳之士夫聞之廊廟賢否定焉黜陟行焉是以聽訪非真而黜陟失實故今之時官難而法官尤難予聞之曰非然也夫民至愚而神者也水則謂之曰水火則謂之曰火未聞以塗爲水以

燼爲火也今之居官者廉公明斷吾未之多見也蓋多其
似者耳似者猶夫水之塗火之燼故民鮮信焉夫無欲爲
廉克而至於一介不取斯廉矣廉生明明生公公生斷是
故廉以養志則寧公以施政則溥明以察物則括斷以臨
事則果夫如是雖施之天下宜也民何謗焉吾鄉盛君大
化以戶部員外郎擢山西按察司僉事大化自爲邑三年
而至臺憲廉公明斷蓋真有而累効者也其推是以施于
政不將大行于晉乎若夫今之所謂聽訪非真而黜陟失
實者蓋亦有之矣不可遽變也夫 朝廷建官分職以爲
民也黜陟幽明以馭官也黜陟失實官何以勸古之時積

九載考績以察幽明而黜陟之於是賢者不以人蔽而惡
者不以人免故官勸而太和之治成今之時不然寄采訪
於衆口而以毀譽定其論譽之陟之未必皆賢者也苟毀
之所及雖有才能之美政業之實亦黜之矣其不卽黜終
亦疎斥而不使之升故讒謗流行而官士失其守乃亦在
上者爲之也惟大化益脩舊業以臨於晉人毀之可也誦
之可也至於聽訪黜陟之是非則係於在上者吾何庸心
焉同鄉諸君子皆圖所以贊大化者聞予言而是之乃以
告焉

贈浚川子序

浚川子自中丞遷少司馬奉

命督版幹之役于西陲

將行過予言別曰子亦有以助我乎予曰眇者不足以與明也聾者不足以與聞也愚者不足以與謀也子賢也而予也愚奚以助子浚川子曰子過矣子過矣吾聞古人之友也退則相勉以善也進則相翼以道也居有處而行有贈也然後動不違順益受其福子必有以助我予曰廣乎哉子之心也是忘已者也予雖愚可無言與夫子之所督者版幹之事也延袤三百餘里大工也動數萬人築之大衆也日給不貲大費也地當窮塞虜人出沒抄掠當制其未形之患大備也築成而遮虜可圖久安大利也可以版

幹之事而易乎哉然而所驅以成功者人也馭之在得其心而已得其心功之成也何有夫楨幹者誠信也版索者法禁也畚鍤者任用也揀度者鼓舞也削治者潤澤也是故飲食備直均其節興居進退一其時是之謂誠信懲惰賞勤之有其章是之謂法禁擇人而用隨器以授而期其有濟是之謂任用不偵而勤惰明不言而賞罰著是之謂鼓舞曲體而厚恤之是之謂潤澤夫誠信所以立本也法禁所以定約也任用所以器使也鼓舞所以作倦也潤澤所以加惠也夫築之道楨幹以立本版索以爲約畚鍤以利用揀度以盡築削治以平妥而墻斯成矣其於人也亦

然本立而後人孚約定而後人理器使而後人勸倦作而後人敏惠加而後人悅豈惟圖版幹之功哉雖達之天下可也浚川卓識遠猷能濟其務而又有廣善之心成天下之大利其在茲行與詩曰愛莫助之予言不再

送楊仲衡先生之興化序

侍御楊子仲衡奉

命如兩廣理通卒賢聲大著未及

瓜也

天子乃命守興化府其同年地官大夫林子民

服司馬大夫俞子仲尊請予言以寄贈焉予既善楊子又重以二子之請乃遂言曰夫君子之仕也將以行其道也其行道也將以澤民而舉諸堯舜之世也其澤民也將自

其身而推行之也苟不自其身本之則無何以有功楊子博學多識有文有謀其行已也明而不察嚴而不刻敏而不欲速故尹襄陽而民宜之按兩廣而吏畏之非自其身而取足乎今之往也位雖尊而不遠于民官雖改而猶監乎吏夫民之同也其治之者無二道吏之同也其馭之者無異法取其已效者則而用之其於興化也何有是故興農則民志不逸訓儉則民用不侈使時則民力不困歛薄則民財不匱如是而民有弗宜者乎禁殘刻則吏不敢暴獎廉潔則吏不敢貪核名實則吏不敢欺絀浮薄則吏不敢誕如是而吏有不畏者乎夫民宜斯愛愛斯信信斯從

從斯化而之善矣吏畏斯省省斯革革斯賢賢斯勉而脩
政矣民興於善吏脩其政興化之政不將有聞于天下乎
雖然不可泥也詩曰伐柯伐柯其則不遠解之者曰睨而
視之猶以爲遠言則雖在我而審之以從宜也夫物且然
而況君子之於政乎是故因俗而化存乎順視時而裁存
乎變居之不渝存乎恆斯善用其則者也然後不迷于政
二子曰然乃書之簡以達諸楊子

送少叅王遠吉之河南序

正德丁丑春予同考禮闈士得佳卷焉披而誦之四子暨
經若辭而析理其義明矣論議而不逞辨而不詭其理辨

矣表婉而切其文典矣判議法於辭其斷習矣策論事直
以核酬變正以審處勢順以達其才練矣予私喜曰夫夫
也必彥也及發卷登名乃今庫部正郎王君遠吉也予又
曰言甚都矣盍觀其行哉遠吉嘗主戶部事矣入粟出粟
罔有弗明又嘗分司於淮矣權舟征商罔有弗平又嘗自
庫部佐賑於江淮矣流民餓夫罔有弗生又嘗自分司以
漕政五弊陳于朝矣天子是之罔有弗行予又曰

言而能行矣尚觀其究哉今年春三月

天子用吏部

請命屬於北司馬未行又

命叅議豫藩政予喜曰其

言可漸究哉夫豫之爲藩也府七州十有三縣九十有四

其爲地也方千有餘里土沃而產多用物號爲樂土正德
壬申賊劉齊亂而民困嘉靖壬午賊王堂亂而民又困比
歲不恒雨則恒暘至斗麥七八十錢而民益困是以豫之
民昔也淳今也黠昔也訟簡今也繁昔也盜伏今也橫昔
也俗儉而尚禮今也侈而豪凡是皆係於監司夫遠吉之
在司徒司馬部也當一曹分一事今當一方一方之事固
不得聞昔用其言效矣茲大沛其言於豫不將又效哉夫
義也者言其宜也義明其於政也弗舛理也者言其條理
也理辨其於政也弗迷文也者言其賁也文典其於政也
弗野斷也者言其決也斷習其於政也弗貳才也者言其
能也才練其於政也弗滯是故弗舛則先後之序得弗迷
則利害之實盡弗野則品飾之節宜弗貳則正直之守確
弗滯則發揮之力敏如是而豫之弊救矣豫之民生矣其
究予又安能涯哉遠吉同年友封部正郎王君汝澄駕部
正郎張君豫卿以予知遠吉者來問贈言故道其所知如
此遠吉其尚錫予光哉

送葉時舉之廣南序

弘治辛酉葉君時舉舉於鄉明年遂舉於禮部文名奕奕
也然而民事未習也比其爲浦城也簡而不擾馴而不怠
民安其惠矣進而爲蒲州也政弗改於其舊而蒲民之安

猶浦民也再進而爲冬官大夫也司空使督蘆稅奸戢而稅無逋矣又使其主斃政舟人無怨而斃如流矣政聲奕奕也夫學也以文升仕也以政顯不賢而能之乎乃羣吏述職於朝天子大明黜陟凡藩臬之長貳與郡之守以幽黜者若干人嗣命吏部擇兩京臺諫部寺之賢者領其任於是葉君時舉以田部郎中知廣南府命既下時舉曰噫予奔走於外二十有一年今倦矣烏能行也于時禮部大夫王君時禎刑部大夫徐君公輔暨學院右廳之寮李君朝貢皆與時舉同舉于鄉者也適予館以告曰時舉不悅廣南也欲勿行先生與時舉友也盍勸

諸予曰時舉之勿行何時禎曰難哉乎道巖而遠也公輔曰畀之巖且遠也君相或棄之也朝貢曰獐獠之種頑而難化志弗可行也予曰夫患遠者厚其身者也虞棄者有其官者也畏難者急其功者也厚身者未必能厚有官者未必能有急功者未必有功三者皆惑也夫君子之事君也無險無夷其行已也無適無莫預擬而先備之詎可以如志乎夫廣南之地周以前外夷也自漢及于今已爲中國之士矣昔劉寵在弘農而虎去韓愈在潮陽而鱷徙廣民雖頑猶中國之人非虎與鱷也時舉賢者也朝廷以守廣南庸非欲化此邦之民與昔者子言之曰言忠

信行篤敬雖蠻貊之邦行矣夫盡心之謂忠率而發之之謂信敦厚之謂篤儼若思之謂敬時舉言發其心秉禮無失其忠信而篤敬者與夫忠信無欺篤敬無慢因違道以取其權因密文以違其習順而柔之皆不欺之類也勿以俗鄙而廢禮勿以民頑而廢教徐而化之皆不慢之類也不欺則民信信斯恒矣不慢則民從從斯安矣如是而俗有不變者乎旁都聞之有不相率而化者乎由是而天子有詔矣由是而高位可躋矣時舉其行乎三子曰是可以勸矣遂錄予言贈之

送朱廷輝之貴州藩司序

我太祖皇帝割元朔制罷行中書省爲布政司罷平章政事爲布政使又以叅政叅議副馬所以重民治也夫今之布政司卽古之方岳也土廣而民衆故今之布政使卽古方伯之任也叅議者所以叅方伯之謀議而達之政令者也其階雖次方伯而其任實與之同是故朝廷於是官也必擇望高而資深者然後授之夫布政所以統一方之民也故有牧民之政焉民必有賦故有督賦之政焉軍所以衛民也而出於民故有清軍之政焉撫民理賦治軍必有司存故有馭吏之政焉一方之民必有秀者故三年有興賢之政焉五者皆天下之政也可易舉與必議而

後理可得必得其理而後可見之行是故議欲盡不欲泛
欲直不欲阿欲虛不欲固欲切不欲迂欲實不欲詭議民
必欲愛議賦必欲平議軍必欲勿敢隱議吏必欲廉有功
議賢必欲明無私是故愛無困民平無負賦勿敢隱無逋
軍廉有功無蠹吏明無私無蔽賢如是而天下治矣夫治
由於政政由於議非明不能造議非慎不能保議非斷不
能決議非勇不能行議故是人之弗易也戶部正郎朱君
廷輝在省幾九年矣敦厚慈良上信而下安之譽望升聞
天子乃命叅議貴州藩司政夫敦厚慈良仁之發也是牧
民之本也而又濟之以明慎斷勇然而藩之政有弗行者
者以言廷輝其擇之

送顧梁卿之廣東序

嘗聞夫子之語治矣以獲上治民信友本諸誠身至哉聖
人之言也夫三者盡天下之人也而惟誠可感以孚至哉
聖人之言也夫誠明者聖人之道也明誠者君子之道也
故君子之於誠不可不慎也夫誠者信而不貳之謂是故
不擇是非而信其失也愚聞人之言而卽信其失也隨用

已之見確而不疑其失也固廣於取人行如不逮其失也
疎愚者知之反隨者執之反固者權之反疎者慎之反四
失叢而誠僞混其何以誠哉夫獲上者非謂有令卽行惟
意之承也從其可議其不可飲其美不成其非美斯已矣
治民者非謂其令出弗反必已之從也順其欲不施其所
惡嘉其善不罔其不知斯已矣信友者非謂有諾不宿無
言不報也揚其善匿其所短不幸其所不知而強其所難
從斯已矣夫如是則上下朋友之間而心一心一則可久
可久則有功故曰君子誠之爲貴顧子梁卿之僉廣臬也
諫省諸君子請予言以贈予旣知梁卿又重以諸君子之

命可無言與夫予與梁卿友也有蘊必言有言必盡其旣
也可稽可覆其誠矣乎事幾物情知之必預其知矣乎可
言也嚇之不能止弗可言也誘之不能動其執矣乎昔者
大臣臺諫爭梁卿上疏平之於是群情乃和其權矣乎事
起也人不知其謀之始事成也人不知其功之歸其慎矣
乎夫知不欲察察生刻執不欲專專生愎權不欲流流生
譎慎不欲危危生惑刻寡容愎違善譎任待惑廢義於是
而誠或幾乎息矣是故誠以爲質知以擇之執以守之權
以濟之慎以行之是故可以獲上可以治民可以信友此
君子之誠也

贈中丞南川陶公赴鎮序

天下之治也吏稱其職民安其業而已矣其反是則不治夫吏治民者也民治於吏者也未有吏職脩而民不安其業者也亦未有民安業而不本之吏脩其職者也善求治者盍於吏職之脩廢而加之意乎今夫朝廷之建吏也郡縣之吏以司牧也學校之吏以司教也軍衛之吏以司武也皆所以求民之安也然猶未也又建藩臬都司大僚以監之所以責群有司之脩職也然猶未也又命都御史巡撫以監之所以督監司之脩職也則朝廷望治於有司亦已切矣而有司曾莫之省也吾見牧吏視其民

如牛羊而不之恤矣教吏置風化爲末節而不之談矣武吏以介冑爲浼身而不之視矣其稍知當務之急而又不能行者纔一二見焉吏之於職如此民之安業胡可得哉夫有司臨民者也監司臨有司者也巡撫臨監司者也體統正則舉措明舉措明則人心勸是故巡撫論監司而精核之賢者必舉而不肖者必遠監司論有司而精核之賢者必舉而不肖者必遠如此則賢者在位各脩其職而民之安業也其庶幾乎若夫巡撫而下行監司之事是亦監司而已矣監司而下行有司之事是亦有司而已矣用力愈勞治效愈疎則吾未見其可也今年南贛汀漳南雄巡

撫都御史缺 朝廷以河南左布政使南川陶公往蒞其任此地疆連三省民錯五方性悍而頑俗惡而鄙馭之少失其道易以起變故 朝廷選巡撫視他方爲加慎而巡撫當是任視他撫爲獨難予嘗見公在諫垣時逆瑾虐方煽而公獨効其奸河苦決溢公爲憲副督理之能順其性以保運道今爲方伯也惟務與民休息而民安其他斯皆急其大而得其要者其問學之精深謀猷之弘遠又足以爲敷政應務之本今茲之往正已以正監司正監司以正群吏而上下之皆正由是監牧者率其屬以康民而民安監教者率其屬以教民而民化監武者率其屬以脩武而

寇賊奸宄之不敢起其不足以成南方之治而副 朝廷之命哉公將行藩司諸公以使來徵予言爲贈辭之不得故以是質諸公其幸擇之哉

杏東先生文集卷之七

明太常寺少卿兼翰林院學士儀封郭維藩 撰
都察院右副都御史門人德清蔡汝楠校刻

序二十二篇

贈侍御趙仲熙三年考績序

粵惟在昔周之設職也以六官虞之課官也以三考夫天地以四時成歲功任事以六官其道則備矣人必久而後見幽明黜陟以九載其時則可矣斯二者非聖人不能爲也夫虞之九官禹棄契臯陶垂益夷夔龍周之六官周召畢毛芮伯彤伯衛侯此十有五人皆聖賢之徒也奚俟于

諫虞則三考黜陟周則大明黜陟若有不得已焉者故其
時官無否德之人朝無不舉之政人到于今稱其治我
太祖皇帝之有天下也建官之制取諸周課官之法取諸
虞故官勸而化成可並二代所謂先聖後聖其揆一矣夫
周之六官各率其屬以阜成兆民然冢宰得總五卿之事
有明之制六官不相統惟都御史與六官並都御史領
御史御史得兼察六官之治蓋以小宰之職而益之與是
故冢宰統百官黜陟行焉御史出而巡方入而蒞臺得舉
刺群僚以聽其黜陟冢宰曰黜陟當矣御史曰因當司徒
主財賦出納歸焉御史得監庾得督逋賦司徒曰出納平

矣御史曰因平宗伯掌禮儀節度出焉凡大祀大饗大會
暨天子之視朝御史得見禮而糾其違宗伯曰因有
違御史曰有違司馬總軍旅謀威資焉御史內而按教閱
出而清戎監軍司馬曰伍充矣師試矣御史曰因充因試
司寇執邦禁辟宥施焉凡大辟元熟御史得參其議司寇
曰刑罰中矣御史曰因中司空董百工制作萃焉御史得
權木督工司空曰物制精矣財賄省矣御史曰因精因省
故六官之職舉御史斯弗言矣六官之職曠御史斯有言
矣言以天下弗言以天下則御史者贊天子之黜陟
以起六官之職者也故其職因授之匪人而其選也特重

於庶僚焉侍御趙子仲熙博學敦行孳孳弗怠其在臺也
刺不避權威不加弱衆推其直適正月之吉外服群吏當
述職于朝趙子與其僚凡吏有不共六官之事者與其
貪者暴者老且瘡者行弗飭者疏其若干人請黜貶之
天子從其議於是群情大服趙子之於職蓋無弗舉矣乃
三載考績臺長冢宰皆署上考侍御王子汝學孟子希周
來告予曰趙子吾同僚子同鄉也上考不可無贈子盍言
諸予曰諾遂書此授之

送太守游器重之登州序

正郎游器重擢守登州府將行其僚陳子君咸劉子以中

乞予言以贈若欲有贊於器重者予曰四廣不行焉其於
登州也沛然矣二子曰何謂四廣曰聽廣愛廣刑廣令廣
今夫聽取言以益明也好聽則言集是故毀言自讐譽言
自好滑稽者其言流矯譎者其言詭是謂讒叢故不可廣
守牧民者也愛所以牧也然任愛則流是謂誨慢故不可
廣濟德翼教者莫大乎刑尚刑則法苛而俗弊是謂爲暴
故不可廣仁非令不宣民非令不一寡盲而蔓詞錯出而
互見是謂煩文故不可廣夫讒叢則眩眩則施逆其弊也
傷公誨慢則縱縱則民驕其弊也傷義爲暴則殘殘則民
怨其弊也傷仁煩文則支支則政疵其弊也傷信傷公而

民弗可服也傷義而民弗可使也傷仁而民弗可生也傷
信而民弗可孚也其何以守位而建功故四廣不可行也
是以君子之於天下也正其心而已正其心明其理而已
矣理明則心正心正則措宜是故不廣聽而明不廣愛而
惠不廣刑而威不廣令而行故優於天下執其要而已矣
登州阻山距海其民好訟喜鬪郡務甚殷守非上才者不
易爲也器重明惠威信著在戶省今之往也袂四廣之弊
成維嘉之政使東方之吏有所矜式非諸君子之望與予
與器重同年友也因其請敢附告焉

贈楊推府序

汝吉拜推官將之永平國禎天臣國珍晦之在焉謂予曰
汝吉少年授官願先生告之官理使立於時也予曰然乃
告之曰推官理官也其職刑獄其事讞訊得其理獄斯弗
冤矣失其理獄斯冤矣而豈易乎哉夫民之初生固若同
胞然本無訟也惟夫不平也斯爭爭斯忿忿斯鬪鬪斯訟
訟斯辨於官以求理矣是故共財專利而訟共謀專功而
訟豪茹弱而訟富併貧而訟愚者苦狡者之欺而訟酒訟
言訟戲訟奸訟詬訟譎相誘而訟嫌相陷而訟黨相誣而
訟訟於官而弗理理而弗得其情民斯亂矣而可易乎哉
是故不懾於勢以枉是非公也獄成而利弗奪廉也誣誕

之辭勿使盡知也不用已見而禁人言怨也見定而弗移
斷也公則民之請無所行矣廉則民之賂無所用矣知則
民之姦無所售矣怨則民之情無所閉矣斷則民之獄無
所留矣以是聽民之訟焉有弗得其理者乎汝吉大臣之
後也素貴而勢難役必公服食器用不假官以足必廉在
富貴紛華之中而不廢學必知如是而濟之以怨且斷焉
郡之獄有不平者乎夫民猶水也官猶舟也水之載舟平
而已矣水之覆舟失其平而已矣故民之平也則愛官民
之失平也則怨官官而民怨永其官者鮮矣語有之曰衆
心成城衆口鑠金言民嚴也汝吉慎之哉

贈劉杭州序

杭州東南大郡也天下言饒物產者必歸焉又爲布政使
按察使治所而都御史亦監於此訟繁而務殷郡之劇未
有過於此者守日與諸監接剛者責吾果厚者責吾恤敏
者責吾辨任法者責吾嚴故守無專政無獨成夫地饒則
易汚郡劇則易困責衆則易沮守於是始難爲矣晉江劉
克全自刑部郎中擢守杭州克全之賢張君子孟復鍾君彥
材爲余言之其爲推官也守法而不徇人可不謂節乎在
郡一毫不取於民可不謂廉乎爲郎中庭無滯訟訟無冤
獄可不謂才乎是故律身存乎廉濟務存乎才守已存乎

節非廉則徇利徇利則汚汚則節不立而沮者至矣非節則徇人徇人則靡靡則才不行而困者至矣廉以立節故不撓節以輔才故不禦不撓政斯一矣不禦行斯廣矣充是以往克全其大行於杭哉雖然吾聞之名分與政理通其分定者其職安其職安者其政成 國家之制官秩之有定品相接之有定禮故屬之品高於監者遇不避路見不拜下今守之見監也皆庭參伏起奔走與末品下寮無異豈人自好卑哉勢使之也夫 朝廷之命監將以察守令之賢否而黜陟之也非以取其諂佞事人也今之監好其人之逢已者不好其人之違已者故賢恒以直棄而不

賢多以佞舉棄則敗舉則遷非獨立不懼者不能不變而趨佞也故守令之多佞勢使之也於乎諂佞在位政理斯乖矣舉刺失實黜陟斯罔矣治胡可望哉君子於此不可不慎也克全之行吾無憂於杭民矣而克全之自待與監司之待克全者不能無重望焉

送馮汝霖令贛榆序

汝霖自鄉貢於 天子之庭凡十五年始就吏部選

命既下得贛榆宗賢天臣謂余曰汝霖靜久而積厚見精而謀長必大行於贛榆也先生盍言以贊其成余曰何言傳有之曰身脩而後家齊家齊而後國治國治而後天下

平夫家觀諸身國觀諸家故君子之爲政奚可以他求哉亦自脩身推之耳昔汝霖之在家也竭力承歡太夫人安其養可謂孝矣甘貧茹淡不受非義餽亦不以非義干諸人可謂廉矣嘗見邑大夫之政寬則曰民受惠矣嚴則曰民命弗堪也可謂惠矣及其得贛榆也憂切於心而形諸色吾嘗問之汝霖曰吾慮吾職之弗舉也可謂懼矣備是四行以推於治其於贛榆也何有是故孝則順廉則儉惠則愛懼則敬順斯不違君矣儉斯不取民矣愛斯無苛政矣敬斯無敗事矣豈惟贛榆措之天下可也汝霖其念諸宗賢天臣又曰先生之言非獨爲汝霖告官箴也然吾聞

贛榆居海上嘗被流賊焚劫民悍而貧殆難治也何如余曰君何薄此邑人哉昔劉昆守弘農而虎去韓愈在潮陽而鱷徙誠也故誠心愛民異類且猶感而化之況人乎汝霖苟能以誠心推四事民不感而化者未之有也今浚川王子衡以才御史謫丞於此民咸宜其政未聞難治也汝霖少與子衡同硯席其心同其道同茲往爲僚同寅協恭民化而富有日矣君何憂焉

送王天則令東明序

天則令東明告行於予曰子盍語我以政曰政在惠民天則曰政止是乎曰朝廷舉一邑之民而付之令責以牧

也故一民弗獲令之憂也可易言乎孟子曰今有受人之
牛羊而爲之牧之者則必爲之求牧與芻矣求牧與芻而
不得則反諸其人乎抑亦立而視其死與令之不務牧民
皆立而視之者也可易言乎是故精敏而不困於事謂之
才令發隱摘伏民無遺奸謂之明令事必據法不沮不撓
謂之執令以憲持民民跼蹐而不敢犯謂之法令事必以
正人已如忘謂之公令摧權茹豪以身任患而不悔謂之
直令夙夜孳孳弗怠於官謂之勤令視財若苴言利若汚
謂之廉令以身徇財謂之貪令齊簿書急幹辦謂之俗令
取民不恤邑無逋賦謂之歛令善事上官漫無可否謂之

隨令詭於取名謂之巧令妄以悅人如脂如韋謂之媚令
深法而嚴刑謂之酷令若夫以心行仁以仁行政民之所
好因而予之民之所惡因而去之使民安定而不知其功
謂之惠令夫貪以下不可言令矣才之諸令亦多有之世
以爲賢令也惠令吾未之見也今夫天下之多盜皆令之
棄民也天則溫而不炫直而不華心於民者也茲令東明
不將成惠民之政乎世之所謂賢者固天則之所優也同
鄉諸君子曰是可以贊天則者盍書以勸其成

贈王衛夫序

衛夫旣入粟爲散官寧弟欲贈以言問於予予曰汝之欲

贈何寧曰衛夫有三榮焉昔也著帶巾衣則盤領今也烏紗爲冠衣團領袍衣冠其諸異乎人矣昔也以事謁縣入則奔拜則下俯首受命無敢謂卑今也升堂交言陟降以禮體貌其諸異乎人矣昔也役及其身今也復之逸豫其諸異乎人矣此寡會而創諧者也惟大兄贈之言旣以張衛夫抑亦使鄉人重焉予曰是則然矣汝蓋先末而後本務名而遺修者也夫德也者本也官也者末也德不修則名不著名不著雖官亦奚以榮夫天下之生久矣士以一節成名者亦載於史苟非其人而萬鍾之卿相亦卒淪漠而無聞然則官奚能重人與是故擇言慎行所以檢身也敬長恤孤所以敦族也飭容謹節所以修禮也形勢固移所以厚謙也身檢則能教族敦則能愛禮修則能讓謙厚則能下夫如是則德自我成名自我立我能榮官非官榮我其所否者位高則誚叢寵極則愆集而況其下者乎衛夫貌恭言訥與人無競蓋有德之基矣其將以身榮官乎以官榮身乎寧其以是告之

贈趙載道制酒序

昔者孟子以惡旨酒表禹之聖予讀之初不謂然乃卽事反已然後知非聖人不能也夫酒飲食類也飲食物性之所向人鮮不溺昔韓退之唐之元望也位旣顯而戲不

改於棊塑程伯淳宋之大儒也德已成而心猶動於見獵
皆性之向而不自知也況其下者乎禹之於酒既飲而甘
乃遂絕之如惡臭然苟不固剛健中正以道制欲其孰能
之信哉其聖人也夫酒之爲物體陰而氣味皆陽陽性發
散故能助氣氣之所動志亦隨之故人之酣於酒也靜者
動默者躁又者亂恭者倨而皆莫之能知則德於是乎喪
及其溺而不返也雖富必貧雖明必愚雖強必弱雖成必
喪而卒莫之救則禍於是乎叢而世之人方且甘心而無
悔益信孟子之言爲知德也夫昔先王之制也惟元祀用
酒父母慶用酒凡群飲者有殺而剛制於酒有訓皆厚生

正德以左右民也故民富而寡酒禍今也不然其用無限
群飲無罪而又無制酒之訓故民之靡穀喪德而死於酒
者益多矣吁豈民之罪哉載道幼而善飲久而業衰又久
而形傷心知其非乃遂止而不飲今五年矣衰者起傷者
全遂爲志士謂非合於古人剛制之義與孔子曰唯酒無
量不及亂又曰不爲酒困何有於我夫志蕩而恣謂之亂
氣奪而危謂之困斯二者皆酒之烈也亂曰不及不困曰
何有聖人猶難之而況於人乎賢者則德將可免次焉者
莫如制制而不飲則何亂與困之有夫不亂志斯定矣不
困氣斯充矣志定則可以有爲氣充則可以助道由是以

之行身則正以順以之接人則愛以恭以之蒞事則審以確無適而非善矣制酒之益不其大與清弟嘉載道之制酒請予言以贈予曰諾故授以是說

送運判李先生赴河東序

天祐選於吏部 命既下得判河東運司事衆方爲之喜而天祐若有不豫然者余問其故天祐曰運司財利區也利在聖人猶罕言而吾日處其間坐見身之污而謗之來也余曰非也夫財天地之生而人之用也易有之曰何以聚人曰財傳曰生財有大道生財以聚人雖聖人猶所不廢而子何惡其污耶是故百官六軍非財不養享燕祭祀

非財不辦內親藩國外撫四夷非財典禮不行恩賞勞賜非財不給行師平暴恤災賑窮非財不濟不充故財者國之所急也官以董之者重其事也而子何惡之耶夫財非能污人也人自污之也是故服用宮室之不飭所以儉奉也親故貧乏弗使感於我所以慎施也飲食宴樂非時不舉所以節費也夫如是則心弗侈弗侈則易足易足則用省用省則不取雖日處其間庸何傷子過矣昔子產爲政三年而人誦之實積也馬援南征還人指薏苡爲明珠文犀嫌生也毀譽之出於人者孰能禦之乎故君子之居官盡吾心以責其實而已而何計其嫌哉夫利猶水也導之

則行過之則壅行則利廣壅則害生故不取斯不過矣不
過斯行矣行斯廣矣故曰五人者將導利而布之上下者
也

贈陳嘉信序

相人陳嘉信丞中立驛以洹野太史之命來見予曰節不
敏昧於官理願先生教之以免官謗予以洹野之意不可
辭乃告之曰子亦知夫子之職乎夫丞掌道路之治以付
賓客者也故職舉爲賢職弗舉爲不賢蓋亦求諸已而已
是故飾馬戒卒無怠迎送勤也不媚上官而忘遠人直也
賓旅交馳應不失宜敏也勿剝驛卒勿縮廩穀廉也重符

使而杜私請公也遠探密候賓過必知慎也六者有一焉
則職舉而謗免亦可以爲丞矣子其慎諸嘉信再拜曰謹
受教矣予曰斯亦人之所能也丞有惠民之道焉子蓋未
之知也夫總其馬與卒而待賓客者丞也出馬以供其費
者民也是故一馬則一夫庖廩之需衾帷裯篋器物之用
皆隨馬以輸自馬而下一夫歲百金費及馬之入驛也夫
率入贄金於丞丞利之故馬易瘠以困不一二歲卽斃斃
復取於民間故民之爲驛夫者數百金之產之家率五六
歲卽敗矣不亦可哀哉今之制大驛百夫次六七十夫次
三四夫中丘南北之衝道也少亦不下六七十夫民命

懸於承者亦衆矣子知之乎恤其馬斯不頻取矣不頻取斯民不困矣民不困斯不饑且盜矣故曰承有惠民之道焉此之謂也夫名可以起官非可以得民惠可以得民亦可以起官今之人急於名而後於惠者惑也子請擇焉嘉信以告洹野曰此可以爲官勸矣子其識之

送李載之丞日照序

載之丞日照以東之惟忠爲介問政於予予曰行勿踰其職奉勿踰其祿禮勿踰其則斯可以爲政矣載之曰何爲行勿踰其職曰職者執也是以定官官以執事故舍已之事而窺人之事曰侵不能舉已之事曰廢二者皆有官刑

是故在其位則思謀其政謀其政則思盡其理是以職修焉何爲奉勿踰其祿曰祿所以詔能程功也其位重者其祿厚其職輕者其祿薄祿薄而奉厚則用侈而貪生焉貪則取取則怨興而敗斯及之矣故儉其身所以永其官也何爲禮勿踰其則曰過敬爲諂殺禮爲傲諂傲者皆辱之招也禮以招辱與無禮同故曰人有禮則安無禮則危是以君子於人也不踰節不侵侮載之曰三者足以盡政乎曰行不踰職慎也奉不踰祿廉也禮不過則禮之中也慎以檢身廉以養心禮以出政無所不可矣況承邑乎

贈張僉憲序

孟子曰爲高必因丘陵爲下必因川澤言君子之有爲因其已爲者斯易有功也是故明不熟不足以判疑惠不熟不足以臨衆斷不熟不足以決謀公不熟不足以行法如是則在上位而無以率下在下位而無以承上而亦何可以有位乎此君子所以貴有因也張子履謙以刑部正郎遷陝西臬司僉事夫僉事之職以法正人者也法刑也王政之有刑也猶天之有秋也天以秋收斂萬物而主殺王政亦以刑收斂萬民而主殺苟以其主殺也而又以威行之則民必多枉或者矯之過寬則民必多縱枉且縱而法於是乎廢矣是故必卽其行之已效者而因之則於法也

其庶乎夫民之有訟也皆出於弗平也其始也必訟於縣若郡縣若郡不能平也而後訟於監司訟於監司則民求平之意猶在水火而望出也監司者如以威而已矣則悍者以肌膚禦訊辨者以口舌匿奸而弱且訥者枉矣如以寬而已矣則佞者隱情而不露柔者甘言而避撈而質且直者枉矣求法之勿廢得乎故情之未得也降色以訊之虚心以聽之勿爲嬖近所惑勿爲游辭所使如斯而已矣其旣得而致辟也重勢不能使之奪厚利不能使之移喜之不敢輕怒之不敢加如斯而已矣夫如是而後法行法行而後民勸於善民勸於善而後刑可措刑可措而後太

平之治興矣法可易言哉履謙博學有文行謙而不屈於物其爲尹與刺史也惠而無私在刑部也明而有斷皆行之有效者也今之往也因而措之無難矣夫惠且明則無枉人斷且公則無廢法陝臬之刑措也不將在履謙乎侍御王子汝學孟子希周正郎李子仲鳴魏子理之與履謙皆魯產也欲以予言贊之履謙法官也故以法言

送呂公兆指揮序

呂公兆自振武來襲職於朝宿山我山二太史以其甥也館而賓之館中諸君子皆交訪焉公兆言必稱名坐必避南色憚憚弗以放諸君子曰敬哉人也於其拜命歸

皆贈以詩二史謂杏岡某曰諸君子之教公兆至矣子盍發其意以告某弗敢辭乃言曰指揮武臣也軍旅武事也詩人歌吉甫北伐曰有嚴有翼孔子論行三軍曰臨事而懼皆言敬也公兆敬矣其弗舉乎職哉夫敬所以立仁廉信威也仁所以不虐也廉所以不取也信所以不欺也威所以不易也不虐則卒親不取則卒悅不欺則卒信不易則卒畏親悅無怨信畏無貳無怨故可用矣無貳故可與有功矣是故戰不憂敵守不擇城此能將之事也公兆其進於是哉夫理貴充充則通弗充則窒通則行窒則守而弗達故曰苟能充之足以保四海

贈陰陽典術姚國和還信陽序

陰陽氣也其體爲天地其精爲日月爲星辰運爲四時奮爲雷爲霆盤薄爲雲噓爲風潤爲雨爲露凝爲霜爲雪然而其間有災祥休咎之不齊者二氣相摩而變生也是以聖人建官設屬使之因其運以測其變以察休咎之由以明得失之報以詔王而王不敢愆於政焉其在唐若羲氏和氏曆象日月星辰以授人時在周若保章氏以歲相觀妖祥以雲物辨吉凶水旱以十二風察天地之和以勅政序事先王於天道其嚴乎非天下之至精至變至神其孰能與於此乎今之陰陽官實兼二氏之司序時以授人察

妖祥以詔王以左右民任豈輕乎哉信陽姚國和自陰陽生爲典術當道蓋器而授之也信陽多君子國和又大復君之甥其於天地之理陰陽之變亦旣聞之矣若夫盡其術以舉其職而可易乎哉夫羲和氏之推步保章氏之觀候其法具在推而行之存乎其人是故明則見定通則用圓靜則中虛信則務實見定故習其法而不惑斯可與議精矣用圓故因其法而不泥斯可與議變矣中虛故疑似弗亂有占必知斯可與議神矣務實故不誣妖惑人以竒其術斯可以用法矣夫如是是惟無詔詔則民信之以趨吉避凶官信之以反身修政一郡之陰陽不將理乎不將

益重君子之鄉乎國和其圖之

贈陳散官序

高生鳳鳴因侯生李生見於予曰鳳鳴外舅陳翁者名翥字某先輸金爲義官既而輸金爲散官夫去民爲官去義爲散其亦榮矣願乞先生言以爲外舅重予辭之三生者乃固以請侯生名思恭從予治經李生名天澤習醫家書予與談調生之理焉義不可終辭乃遂言之夫官者外者也德者內者也外者非已有也故不可恃焉內者已固有也故可修以見焉是故顏子之窮君子取以比湯武馮道爲三朝相而五尺之童恥言之官重人與德重人與惟知

者爲能擇之是故富而能降可以觀其敬不漁弱以附其家可以觀其仁畏官懷法可以觀其慎供租與役而罔敢後可以觀其義敬仁慎義立而達於邦族矣夫如是雖無官也人猶將敬而愛之而況於官乎翥逸於城東田墟中以耕稼自給產甚豐資貌偉岸儀稱其官而於是四行亦嘗體而踐之乎體而踐之亦復何言若猶未也盍從事焉

壽封監察御史霜筠劉公八十序

封監察御史霜筠劉公今年壽躋於耄五月有五日惟厥誕辰邑大夫鄉大夫暨劉氏內親外親舉欣欣然願祝頌之於是上舍段時卿扈伯良邑選士岳堯咨張君錫請予

言以壽公與先中憲公友也公子中丞君又與予友也而予弟之子又妻中丞君子交久而義深故予以季父之禮事公四子之請蓋有先得我心者予寡學而無文不能遠借旁譬以揚公美敢卽公取號之義以壽可乎公號霜筠筠竹膚也曰霜筠卽霜竹也竹之爲物衆美備焉奚啻能凌霜哉是故色潤而澤仁也筍箬下垂猗猗而俯禮也春不加榮冬不加悴義也內虛外直公也根易實生相禪無已壽也其植類之秀而異者乎夫君子之於物也有合於心斯愛愛斯樂樂斯不忘公取竹爲號其有所合而不忘與公之爲人也卹族庇親能使其不饑不寒非仁乎與人

克恭不以先達自居非禮乎五十而仕未七十而歸進退之節確乎不可易非義乎愛不徇譽惡不徇毀非公乎公八十矣聰明強健無異壯時夫旣生中丞君以大其美諸孫茂異又將繼中丞君而興非壽乎此則公所與竹合者若夫本之心以出乎身者隨人所見而名則竹又烏能同哉予聞在昔有衛武公者其進學也如切如磋如琢如磨其德之成也如金如錫如圭如璧至於九十有五之年猶爲懿戒之警詩人爲之賦淇澳蓋以竹美其德之盛也後之清修之士多愛竹或以竹比德蓋取諸此及考其實類皆耽草木之華取性情之適而已何足與議哉千載而下

可以武公同日語者吾得公焉公德已成矣自今加十五年而至武公懿戒之歲其年彌高德彌進予雖不敏尚能爲詩以美公之盛今 聖天子緝學更化以復隆古之盛欲采詩以觀民風則吾邑不將爲今日之淇澳乎四子曰然請登之軸以俟

壽封君東村翁八十序

東村翁行年八十矣有子曰武選君今擢叅議山西藩司政叅議昔爲大理寺副翁受封故今如其官云叅議拜命今兩月矣將蒞於晉告別同鄉諸君子諸君子喜其有壽親也咸願予言以壽予曰予劣罔敢辭請言所以壽翁

者有曰予聞翁居鄉而鄉化故訟不之官而之翁一言而可罷爭此可以壽翁乎有曰翁五十口同爨遭時之歉翁力能飲食之無厚薄焉此可以壽翁乎有曰翁有孤姪焉字之如子人不知爲姪也此可以壽翁乎有曰昔翁與弟姪之析也美室良田恣之取而翁取其棄及其不能娶也翁復爲娶之此可以壽翁乎予曰美哉至矣此可以爲翁壽矣夫居鄉能平其訟直也凶歲而均食公也撫姪無間於其子仁也臨利而讓義也直則心無所撓故其氣壯公則心無所倚故其氣順仁則心無所泥故其氣和義則心無所係故其氣直夫心者氣之帥也氣者壽之源也心正

則氣生氣生則體充體充則壽永翁有壽之道矣予也學不知道言而無文奚以壽翁然不敢爲佞也夫仁義公直翁之所有也四者皆所以養心也心得其養則正心正氣之本也翁年旣高矣使四者之德靡悔則壽來其無窮矣叅議君歸懸金曳紫獻壽於翁之前試以諸君子并予言陳之

壽銅峰陳士元六十序

太學陳生思孝因大鴻臚劉君克柔見於予君柔曰生告于其師甘泉子以見於君佞予曰厥有言哉君柔曰生亦因敢攸言予言君佞其聽聞於是君柔若曰厥父士元友

予予其在于鄉實惟善士予枚數其行君佞其聽聞元昔應明經科累應罔克攸舉乃退明農於野於是相厥考協厥弟戮力於田功家用大裕茲惟孝哉能愛諸弟弗私貨財服食婚姻罔有攸異茲惟友哉元生三子教咸厥時考業作勤弗棘什于銳弗縱入於退子乃才茲惟慈哉又惠于饑民惠於貧衲曰罔責爾償各憚乃心茲惟義哉用是孚于我鄉之人我鄉之人僉曰善士禮書吳公工書沈公僉曰銅峰冠服以彰有德時乃天命子德在鄉其亟就例以順于天肆今階七品罔事事六月朏惟厥初度年躋于耆敢乞言以贈君佞其以予是闡是俾予曰君柔乃言

都惟茲其可壽予亦何言夫天之壽人于德不干否德人之修德于其性不外于性德修因遏壽來其因禦予聞先民有言栽者培之傾者覆之厥若影響夫孝于親友于弟慈于子惠于人茲非外性命之曰德德積于厥躬天其克畀以壽今夫水源因泥則流日新流日新則達益遠泥則流涓流涓則涸夫修德務新新乃崇崇乃自致于期願君柔其告于士元德日新壽其永綏予言不再

壽東溪封君六表序

東溪封君賢而隱者也因子元靜貴 勅封南京刑科給事中今年某月某日封君年躋于耆元靜之僚東崖鄒

子拙菴方子大同丘子北泉林子修菴趙子賢元靜而論其自也乃致敬於封君微予言以壽予獲交於六君子義不可辭乃言曰夫壽有三一曰天二曰人三曰頌夫天者言乎其真者也人者言乎其養者也頌者言乎其德者也氣充而形堅疾疢因于則無待于人而壽是之謂天保氣嗇神心定而欲不能誘則無違于天而壽是之謂人存仁而踐義善積厥躬人歸其德於是乎皆願其壽是之謂頌五子者之壽何居於是鄒子曰封君於人也交不苟合過必面折其直可以正是鄉人宜其壽方子曰封君顧養而不遠遊其孝可以教人之子宜其壽丘子曰封君當吳氏

顛沛之際而完其金以歸其廉可以律貪宜其壽林子曰
封君教子有方先忠信而後文藝故其子賢其慈可以興
人之父宜其壽趙子曰封君居家威如家人皆謹於禮其
嚴可以訓于有家宜其壽已五子曰子亦有壽乎予曰五
子之所以壽者至矣予何言雖然予嘗見封君矣體豐而
步捷聽其話言聲之出也深以長其稟厚矣又聞封君服
食淡而嗜欲省其養善矣廉直孝慈嚴其德修矣元靜式
穀似之 國有攸賴其修成矣夫養所以厚稟也德所以
正養也成所以徵德也德成則養正養正則稟者全矣封
君之壽其備矣乎五子又曰其或未備者然則三壽孰爲

上曰稟者偶值者也養者修爲者也德者復性者也偶值
存乎數修爲存乎術復性存乎已數存乎天不可必得也
存乎術可得也亦或不可得也存乎已則可必得矣夫克
已則性復性復則德立德立則可大可久之道也是故可
以表今古可以凌山岳可以絀喬松夫壽可以永世不可
以傳世德可以永世亦可以傳世於其得不得之間相去
遠矣五子曰然乃書予言致之元靜以達諸封君

壽趙侍御母夫人七十序

世雍爲御史二年言不及細刺不避權臺中稱之丙子春
正月母夫人年七十同鄉之仕于 朝者若大夫士賢御

史而喜其母之壽也乃往賀焉御史奉其母迎於庭拜於
堂客以次舉觴爲壽有曰夫人以御史爲子惟 天子
耳目臣夫人何不樂宜其壽夫人曰 朝廷爵不及匪人
況于御史職司國是吾懼吾子之弗任也有曰惟孝養居
其一夫人日食御史之祿旣安且吉胡不壽夫人曰祿以
程功吾婦人而坐食又何功焉惟吾子萬一有功吾其安
有曰惟茲揚鱣皆鄉之賢者嘉御史之名皆倍位御史以
獻夫人壽夫人永惟多壽夫人曰其然其然人惟親賢乃
克成德以永終譽吾子若能從諸賢以成其德吾其承鄉
大夫之休貺已乃進御史而命之曰鄉大夫之貺吾及汝

者至矣小子識之夫昔三代之盛也士惟修德而不求人
知故德成而論於樂正升諸司馬司馬復論之以告于王
量德而授官因事而給祿無倖位無冗食無先容之客無
虛得之名故上有道揆而下有法守也是故道德同而風
俗一今之時官人之法亦異於古矣士之修於身者亦不
同矣吾不敢知也汝惟居其官則思樹其業食其祿則思
效其勞因其名則思勉其實從吾之言以修於身庶不虛
諸君子之貺小子識之御史再拜受命三進觴而退杏岡
郭維藩亦在賓席乃作而歎曰賢哉母也昔孟母之於子
也徙舍以端其習斷織以勸其學因仕以教其成義故孟

子道成德尊而爲世法其教之者至也今夫人言官必及
業言祿必及勞言名必及實是其教之者無方也夫業者
舉其官者也勞者有其祿者也實者永其名者也乃天之
道也夫人其亦知之乎知天者必順天順天者天必福之
夫人之壽其有艾乎越兩月御史奉 命巡于陝廷評
大經侍御景括屬予次其事以壽夫人且以贊于御史

壽畢孺人六袞序

畢孺人者高士畢君之配也賢淑之行著在南州凡南州
之婦若女罔不是師是程於今司諫大同丘子寔爲嫂氏
丘子幼受孺人之德有若榮陽夫人之於退之者故丘子

亟稱其賢云今十二月五日惟六十設悅之辰司諫諸君
子皆賦詩以壽丘子欲以予言序其詩予固願壽孺人者
其何以辭昔洪範之疇有之曰壽曰攸好德夫壽者永年
之謂也德者脩身之謂也非壽無以累德非德無以將壽
二者相須之道也德壽備斯爲福矣是故並言之夫諸子
之詩頌德以揚壽也故誦其詩則知其德知德則知壽矣
今夫詩有類葛覃之音者矣有類思齊之音者矣有類雞
鳴之音者矣有類采蘋之音者矣夫葛覃昭儉也思齊昭
教也雞鳴昭勤也采蘋昭敬也孺人富家也其歸畢氏也
方有顯者而歎於財孺人苦身節用而無怨言非儉乎孺

人有子甚敏今職方君也其才其學皆孺人成之非教乎
孺人遭家之末造也黽勉爲之家以不墜非勤乎孺人淑
慎其身事上接下咸中於禮非敬乎斯可謂備德也已若
夫諸子之詩非有擬於古也孺人之行非有迎於諸子之
詩也行之所成詩之所歌有弗約劑而同矣夫德所以御
氣也氣所以生壽也德愈備則氣愈昌氣愈昌則壽愈永
此無窮之道也是詩也發之諸子傳之丘氏其將爲南州
之美風乎後有編詩者當與葛覃諸什並列矣

壽東蒙封君暨配邵安人序

天之壽人者一人之自壽者三天壽以百計自壽以無窮

計夫氣厚而形實以至于百年此之謂天壽者一立德立
功立言此之謂自壽者三在天者難必在我者可力是以
君子之壽責諸已而於在天者有弗望焉夫德者盡性而
建極天下萬世之所取則焉者也功者先天開物澤被當
時而法流後世焉也言者聖而無位闡猷定制以垂訓
者也有一於此卽可以不朽不朽謂之壽至乎哉不可尚
已此皆大聖之事也若夫節行足以表人政事足以利物
論說足以翊聖此皆賢者之事也有一於此亦可以不朽
壽孰大乎夫天之壽人也或十人而一二人焉或百人而
數人焉同謂之壽則然也然而人是也弗皆賢也賢者後

世有聞不賢者後世無聞則弗可謂之同矣是以君子之壽責諸已而於在天者有弗壽焉邢臺令魏公以子正郎宗召貴封主事厥配邵封安人公之在邢臺也邢民無饑寒其惠洽矣盜遠而奸戢境內弗擾其政肅矣士向學而修業其教行矣功不已立乎公善積而流光宗召承之取有官位且大有聞于時德不已立乎邢臺之政安人內助之也正郎之賢安人翊教之也相而克協順而無成賢不可並乎夫邢臺之澤邢之子孫戴之正郎之賢正郎之子孫又引之所謂不朽孰大於是則公與安人之壽不既大矣乎公行年八十安人七十有七耳目聰明神氣益強

天其又壽之乎語有之曰天道無親常與善人夫公之夫婦立政積善非有望於天天之壽之非有私於公之夫婦理之相通如執左契有必合者故曰積善之家必有余慶其以是夫宗召之友正郎游子器重副郎田子世英咸曰書標壽考詩敘偕老稽謀厚倫式昭國美若公之夫婦宜有紀述以昭天之祐又謂詩書標敘皆出史氏以予嘗爲史官故請作壽序

杏東先生文集卷之八

明太常寺少卿兼翰林院學士儀封郭維藩 撰

都察院右副都御史門人德清蔡汝楠校刻

序一十七篇

綱目前編序

著書非古也自仲尼始也然而非聖人之得已也夫古者
庖羲堯舜禹湯文武之王天下也皆以聖德致治身睹厥
成何以言為仲尼之德數聖人之儔也然不得位以行其
道於是恐數聖人開物成務之道遂無傳於後世又恐後
世不可數得聖人也乃取數聖人已行之迹筆之於書是

故易弗贊則陰陽不可得而明矣書弗序則政事不可得
而用矣詩弗刪則性情不可得而正矣禮樂弗定則人鬼
不可得而禮矣春秋不修則名分不可得而秩矣故謂之
六經焉自夫人主之有六經也用之則治違之則亂自夫
學者之有六經也守之則爲聖爲賢背之則爲愚爲不肖
然而無有能易之者故曰非聖人之得已也夫經所以載
道也史所以紀事也世之所不可無者也若夫六經之春
秋固史也載道而至易書詩紀事而至春秋粹乎不可尚
已由孔子之後而有作者若曾子之大學子思之中庸孟
氏之七篇其經之翼乎若左傳國語其春秋之裔乎由四

子而後作者益多矣談道者宗經言文者宗左氏或僭擬
經其粹且高者僅可以爲三子之翼左氏之裔耳下焉者
吾不欲觀之矣書可易爲哉不可已繼春秋而作者其史
乎若近世司馬氏之通鑑朱氏之綱目蓋史中之傑然者
也昔仲尼作春秋也終周敬王三十九年而通鑑暨綱目
始威烈王二十三年其間七十餘年之事邈焉無聞非史
之缺典也歟吾友函谷許子賢者也以忤時退處龍灣十
有餘年探道旣精稽古旣悉乃爲綱目前編三卷以續朱
氏之缺其書法不襲近代而亦不詭於春秋至其表微闡
隱獎善紬惡之意嚴且正矣其斯世之不可缺者乎而函

谷未嘗以示人也夫鑒往戒來人心之同也世烏得而舍諸是書之成在嘉靖二年春元年夏則中庸本義并詩考五卷成最先成者易參五卷春秋意見一卷在正德十六年夏夫十年之間而著五書函谷之於問學可謂強力不怠者矣

壬辰會試錄後序

嘉靖十一年會試既訖事臣當有言附諸錄後夫 國家之制科目也以言取士而士之以言升者又能隨其所使以媚於上下是以百六十年來英傑輩出功業炳煥科目之制亦既無負於 國矣然近時議者有謂科目以文程

士不得其人噫可謂不知言矣夫人之有言也猶天之有春也天之心因春以宣人者天地之心也故入之心亦因言以宣春布而物生天之心見矣言出而行著入之心見矣若夫文又言之成章者也顧不可見其心乎是故心正者其文莊以舒其政普心誠者其文確以整其政實心淵者其文深以切其政精心廉者其文方以嚴其政辨故文詭而政放險心者也文紆柔而政靡諂心者也文縱而政無制粗心者也文刻厲而政猛忍心者也心發於文文達於政心之臧否攸判而人之賢不肖昭矣孟子曰諛辭知其所蔽淫辭知其所陷邪辭知其所離遁辭知其所窮生

於其心害於其政發於其政害於其事其斯之謂歟是故
讀太甲之文則知伊尹之心公而堯舜君民之業出焉讀
說命之文則知傅說之心誠而霖雨天下之澤出焉此皆
異世者也猶能因其言而知之而況於同時者乎孰謂言
不足以知人哉又孰謂以文程士而不得人哉爲斯言者
不知言者也雖然文由心而出心由養而正養由學而得
學由教而興是故必端好尚必審取舍必辨義利必慎防
檢必致擴充久之而熟則心正矣心正文斯美矣文可易
言哉我明龍興太祖高皇帝以天縱之聖能自
得師而制作之見於御製文集者渾渾噩噩如元氣於

穆播之萬物色象各具真天之文也其教人之爲文有曰
明道理通世務無事華藻大哉王言其以身教者乎肆

皇上入纘

大統聰明睿智繩其

祖武懋德緝

學如恐弗及

聖學之著於敬一箴及五箴註者弘博

深奧雖堯舜精一執中之旨何以復加今皆鐫布學宮以
惠天下天下士目濡心繹溘然不變今閱多士之文皆會
理研義合於典則蓋有取之不能盡置之不忍棄者非

聖化涵育鼓舞神速詎至是乎爾多士旣以文升矣其尚

克克乃心施之有政以成格天仰德之業以侈我

聖

祖

皇上作人之化是亦尹說之徒也若言與心違行

與言違而但希寵取名以爲身計無乃重資議者之口以爲科目羞乎爾多士其慎之哉

壬辰進士序齒錄序

同年有會敦友好也會有錄示考祥也達於斯義者友道其可興乎嘉靖壬辰春 上賜進士三百二十人是三

百二十人者同日對大廷又同日 賜甲第其進同皆業

六經而宗周孔其道同茲所謂友也會者所以序齒明義以講其好者也厚之道也昔者子言之曰毋友不如己者曾子曰君子以友輔仁是三百二十人者皆天下之英也所謂益友也有益友而不取以輔仁其何益哉夫仁也者

無私之謂也無私也者事必合道之謂也事必合道則可以爲君子行而不息則亦可以爲聖人夫朋友之倫列在五典與君臣父子配其重如此其義惟在輔仁以成其德而已今之友者乃異於是夫身居華要力可以升降人物則友之於是降體隆貌極力爲役務結其歡心此取其形勢也揚於詞場蔚有名稱則友之於是朝夕講說共探其模擬鍛鍊之術此取其文藝也摘前賢之微瑕以張已見唱無實之高論以惑後學則友之於是私相論議動傲聖人大言相誇以誚一世此取其詭異也媒釁使氣退處待價則友之於是曲爲稱道推挽不舍必有濟而後已此取

其釣譽而獵榮也至其訥訥尚行者目爲庸腐忠信誠慤者目爲迂愚正直不隨者目爲骯髒修職立事者目爲流俗不惟不之采又從而訾毀之棄其所可取而取其可棄安望其有所益而成德哉由是觀之雖謂之無朋友之倫亦可也子又言之曰友直友諒友多聞益矣是三百二十人者皆天下之英也直諒多聞者濟濟皆是也諸子和厚慈良者取其直克疏通敏辨者取其諒克篤信固執者取其多聞克有無相濟彼此相成如是則文章道德可以範後勲庸氣節可以鳴時是錄布之天下天下頌之流之四夷四夷頌之傳之諸子之子孫諸子之子孫頌之其或

不然將有指而議之者矣夫聚天下之英於一席會可樂也然有錄以考祥亦可懼也樂以興懼懼以興其取友之實則友道之復於今必自茲會始也諸子盍共圖之哉因高公秉林敬夫之請書此爲錄序

序張氏世譜後

宗法亡而後族紀疎族紀疎而後恩義薄恩義薄而後風俗衰風俗衰而天下不可言治矣昔周之盛也鳧鷖既醉詠歌太平其由在上者君之宗之乎及其衰也角弓興怨荐至陵夷其幽王不睦九族之致乎此宗法所由壞而天下之無善治也後之君子思宗法之不可復也乃爲族譜

則譜者宗法之寄也作之者其仁孝之至乎其亦有遠慮乎秦漢以來賢人君子藉譜之力猶能識其祖先於數世之上唐衰而譜法亦絕矣至宋而歐蘇二子始爲之其立法勅例真可以敦敘宗族長其恩愛矣由宋而來爲譜多倣之間有所附益者以義起也亦所以廣仁愛之道也予觀石首張氏世譜其法雖倣二氏而其例又有二氏之所不及者予所謂以義起也譜始教政公自教政公凡三世而得僉事訥菴公由訥菴而來得叅政東軒公由東軒而來得今禮部侍郎兼學士陽峰公父子祖孫宦業赫如文章煥如而張氏之族益顯望於荆楚矣譜之作訥菴也陽

峰則自訥菴以下續譜焉其爲目有四曰圖譜者列合族之生敘而達其所分者也行譜者列分族之生敘而人著其所履者也事譜者錄合族之行也凡有善皆弗掩也文譜者錄合族之文也文凡爲族人而作者也凡張氏之子若孫觀圖譜而知其本之一也而尊祖敬宗之心生觀行譜而知其一之分也而敦睦族之心生觀事譜而知先之不可忝也而繼志述事之心生觀文譜而知先烈之有述也而敬守慎重之心生尊敬可以作孝敦睦可以作愛繼述可以作善敬慎可以作德孝愛德善立而一家仁讓之化行矣由是可以化鄉黨化邦國以達之天下由是雖

三代之盛可幾也傳曰君子不出家而成教於國其斯之謂與侍郎又謂譜雖善而無法則不可守法雖立而無惠則不可行乃爲族約以訓宗人以敦宗好又置義田以待貧乏以救饑寒約法也田惠也法以翼譜惠以翼法張氏之譜雖傳之百世可也侍郎方以道術德行受知 聖主自是當進宰天下矣使天下興仁興讓其亦以是加之乎續譜旣成侍郎欲予言序之後也乃以此說歸之

便道寧親詩序

張子德珍之在禮省也謹節明度禮職甚修 武宗在御時議南征乃上疏亟諫有 詔杖于庭 今上欲更議

大禮又上疏亟諫有 詔杖于庭楚甚以瘠危而後蘇者累矣嘉靖乙酉自正郎叅議江西藩司事 上蓋酬其忠云今年秋九月督其省之儲入留都事竣將道于浙省其母太宜人王乃求諸公卿之詩以歌其事又請廷尉灤江王公屬予爲詩序予感德珍之事而重王公之請故樂爲之役焉壹者德珍之來嘗顧予於玉堂之署予揖之坐而謂曰惟予寧親之二年有南征之諫嗣予涖南雍之二年有伏門之諫皆不得從諸賢後以自盡於心今見吾子予心猶戚戚焉敢問昔者伏門諫禮之時能無惑乎曰禮如是也奚惑曰明矣哉昔者持議者已獲 聖心焚語

一入禍且叵測能無懼乎曰爲禮而弗知禍奚懼曰忠矣哉昔者伏而哭於門也欲以衆勝乎曰冀悟上心也奚敢曰勝曰誠矣哉昔者杖而危也怨乎曰得吾心也奚怨曰愛矣哉乃作而歎曰仁哉德珍之爲道也夫人之所以爲人以其仁也故曰仁者人也人而不仁如禮何夫明仁之辨也忠仁之毅也誠仁之確也愛人之用也審於仁斯辨於禮矣是故仁人不逢君以貪利孝子不遺親以向榮故隨其所在而盡心焉德珍昔者之諫所以致忠於其君也今日之歸所以致孝於其親也非仁而能之乎故嘗三復冊中之詩而審其音矣詠其明者昭以曠矣詠

其忠者勁以厲矣詠其誠者莊以確矣詠其愛者寬以和矣斯皆治世之音也已於是詠之登堂之時以侑上壽之爵太宜人聞之有弗悅乎餘風所動鄉士聞之有弗興乎他日採風之使以姚風爲東南之美者必自茲冊始

高司諫出使詩序

昔子路去魯請贈顏淵告以去國反國之道焉及顏淵請處子路告以居國之道焉辭不蔓指不泛君子曰知言哉夫贈言朋友之義也責善朋友之道也言而無善之可尋焉用贈是故高則失之虛誇則失之誕達則失之蕩危則失之激深則失之晦直則失之倨曲則失之屈易則失之

淺泛則失之同頌則失之諛思則失之怨親則失之暱憫則失之愁斯皆遠於贈言之道矣是卷之詩諸諫長贈頌之使楚也臣道子道友道使道皆備焉實而不滯簡而不遺文而不飾取而不賈施而不旣其辭碩其風好誦之使人有不興者乎頴之篤行而好諫篤行則踐好諫則從踐則履其道從則助於行其於是詩也不將益踐益從乎

送蕭汝肅還汝南詩序

汝南蕭汝肅既卒業太學將歸汝人仕于朝者皆贈以詩執中善汝肅請於予曰汝肅吾汝名士伯若父讀書樂施咸有聲於汝吾汝人愛之重之是以有贈詩子盍發作

者之意以勸汝肅予曰作者之意予不得而知也詩之義則予聞之矣夫詩者言之諧聲而可詠者也心感於物而有言陳辭比興各本其心之所之詩之體也抑揚諷詠使人興起而不能自己詩之用也是故其辭正者導善其辭邪者導淫故詩之用大矣夫贈行之詩感乎人者也詩莊重言乎其人之正者也詩巖拔言乎其人之毅者也詩婉正言乎其人之和者也詩竒以宕言乎其人之豪者也詩暢而通理言乎其人之文者也反是其人可知矣是故嵩高之詩碩好巷伯之詩萋菲皆感乎人也汝肅誠賢矣諸詩誠美矣汝肅諷詠其詩必將自感乎哉是殆益進於善

矣詠之而弗感焉詩雖工無益也孔子曰詩可以興言感也

洛陽路自立先生挽詩後序

今之挽詩卽古之挽柩歌也思其人而不可見也則哀哀而不已則歎歎而不已則形諸言詩則言之有聲而可詠者也故觀其詩則人之哀可知已洛陽路自立先生卒縉紳皆有哀詩積旣多其子進士直乃會錄成冊屬予爲冊後序予固哀先生者也能無言與夫挽詩述死者之行以寫其哀者也惟其行不同也而詩亦隨之予見詩浮於行者有之矣未聞行善而詩不美者也是故悼德者其詩溫

以莊悼功者其詩詳以實悼文者其詩雄以深悼節義者其詩廉以栗悼恬退者其詩安以和故行薄而詩浮詩雖美不足觀也已足冊之詩詞婉而旨深節疏而音暢殆賢者之作乎其足以表先生之善行乎於乎先生於是爲不沒矣

贈京兆唐應韶送母還楚詩序

泰之爲卦也通也故象曰天地交泰否之爲卦也塞也故象曰天地不交否夫交二氣往來也惟交乃通於是乎萬物化醇而天地之化行矣否則反是於是乎天地塞而化息焉天地且然而況於君臣乎夫君天道也臣地道也君

臣之交莫大於乎君臣不交莫大於謫乎信也信則志同故德業修而國昌謫弗信也弗信則志乖故德業不修而國危故君臣之間不可不慎也其在時也泰爲正月否爲七月天地之泰也自正月之春比於六月之夏極矣故夏者泰之衰也天地之否也自七月之秋比於十二月之冬極矣故冬者否之變也否泰相禪歲功以成此天之所以爲大也惟聖人之御世也法天之道消息盈虛與時不倦故能使世常泰下聖人一等則難言矣以詩書所載君臣之言論事功觀之唐虞其春乎禹湯文武其夏乎周衰以後其秋冬乎其君臣不可言交矣我 太祖高皇帝以

聖人之德有天下于時小大諸臣罔不一心以從 聖志故功業巍巍可並唐虞至於今日壹似有少異者比歲以來在廷之臣多以疾病侍養省覲送親乞歸其鄉而以病乞者十八九皆不得旨且禁之是四者令無禁 朝廷所以體臣也一者之禁其亦有所懲與予嘗觀人於今日矣其乞而去也壹似有不盡然者或感憤於一事之微輒爲危辭以諫卽有不逞則乞疾此舍名者也或值難事謀不能濟而力不能任恐其敗也則乞疾此持祿者也或惡行欲張勢不可止則乞疾此辟咎者也或骯髒善傲開爭端以激怒上官上官或怒也則乞疾此賈禍而沽名者也

至有上疏卽行若謂弗顧其祿者 天子如天之覆也
大臣又以爲賢比其後也畀之華秩如恐弗及由是遂使
浮薄之士肆行無忌如此者信乎譎乎其視 國初諸先
正之忠實孰賢乎故今日之禁正所以易否而還之泰也
六亭唐子之爲御史也奉其母夫人於京師其承京兆也
又奉於留都婉曲承順母安其養者五年及于今而歸志
弗可奪也乃唐子以送母請於是 帝若曰是昔爲御
史以直道事予者乎是向予簡承京兆者乎此純臣也不
予欺 詔使行焉當禁假之始而唐子之請無俟於再非
其相孚能如是乎留都公卿嘉唐信於 君而孝於母

也皆願歌其美以爲臣子者勸古人之詩載諸國史必有
序以明得失之迹予從史官後故爲序以竊附國史之末
焉

送中丞申臺張公之遼陽詩序

嘉靖五年春

天子命南京光祿寺卿信陽張公季升

爲右副都御史以撫遼東若曰雲予端臣也遼東予衛服
也狄寔蔽焉其棘勅以往以撫吾士以固吾圉 命旣

下公乃戒行於是留都部院監寺諸公咸作詩以贈光祿
少卿柴公德美乃萃而登之軸以予爲詩序予曰不可夫
言大者不易窮義幽者難爲訓公有申伯出甫之賢諸公

之作皆崧高烝民之誦予也寡學又弗文安能序德美曰
昔周之盛時采詩列國國史篇著其義以明得失之迹子
舊爲史官又職文字其何辭焉請必爲之予不獲辭乃詠
其詩而審其音有優而不迫敦而不厲者言乎其仁者也
有確而弗貳者言乎其信者也有方直而勁正者言乎其
義者也有屹乎如山輻乎如雷稜稜而不可犯者言乎其
威者也有浩浩乎湯湯乎流而弗流止而弗止者言乎其
知者也夫仁所以爲恩也信所以致一也義所以立令也
威所以行法也知所以洞幾也恩以育之而衣服飲食之
當其欲則士於是乎不怨一以結之而居閑臨事之定其

命則士於是乎不疑令以致之而賞罰動止之有其節則
士於是乎不慢威以肅之而慢令怯敵之信其誅則士於
是乎不驕幾以覘之而物情事變之炳其先則士於是乎
不倍不怨斯親矣不疑斯固矣不慢斯從矣不驕斯畏矣
不倍斯和矣是故親無棄固無間從無擇畏無違和無疾
如是以之戰則克以之守則固而何憂乎圍何憂乎士夫
仁義知信威德之大也公所素有也茲行矣出其有以臨
于邊成申伯蕃宣之功慰吉甫遄歸之望公也亦將永有
譽於天下矣諸公誦德之意其在茲與其在茲與

讀白沙先生詩教小序

予讀白沙先生詩教喟然歎曰懿哉言乎斯可爲教也已夫觀物探化其義幽矣談學論政其道廣矣審出辨處其幾淵矣行道樹勲其用大矣服食與居其事常矣朋從賓旅其接異矣登山臨水其情適矣題草詠木其感微矣多或數語少卽在韻然皆闡陰陽發性命原道德本人情貫倫紀其音颯颯乎洋洋乎諷詠之餘可使達者定其趨卑者廓其量寂者務其實寒者通其機不煩訓告可以辨得失可以正性情故曰斯可爲教也已或曰聞昔大儒以片爲閑語先生學聖賢者然則亦爲詩與曰何爲其然也夫曳杖之歌知死生之說烝民之誦發物則之彝聖賢固不廢此矣夫非惡爲詩也惡爲而無補於教者也苟有補於教雖三百篇猶以爲未足也子固矣哉論詩也或又曰子生而不與先生接居而不與先生近奚知其然與曰作詩之旨吾得諸先生自敘先生著述之意吾得諸甘泉湛子之敘詩云

劉伯儒御史壽母詩序

伯儒御史奉 命察雲貴將道於蜀壽其母氏蜀人仕於朝者若大夫士皆爲詩歌其事史惟信屬其僚杏岡郭某爲詩序乃爲之言曰夫詩者道情者也情感於事而動於中形於言而詩成焉所感善焉詩弗與掩也所感不善焉

詩弗與掩也故觀其詩而所感可知矣今之詩不然也因人以飾事緣事以飾辭不係於所感所謂道情者吾弗知也是故本無是事而故飾其爲有誕也辭大而誇事不稱辭誣也暱其人而相率以爲之黨也屈於勢滅其所醜而揚其所長諂也彼不欲爲我取而爲之激也鄙其人與事之不可而不爲且復爲之隨也因厚幣而爲之貪也若夫因感而動以自得其情之正者無幾也詩豈易美乎伯儒在臺二年守法摘奸甚力其察雲貴也必道於蜀而後達故得拜其母皆可歌也是以觀之諸詩其辭莊以正其節疏以舒其音清以婉殆所謂因感而動者乎夫以御史榮

其親可謂孝矣而夫人詩以歌之可謂得其名矣然吾聞之立身行道揚名於後世孝之終也是故道行則官立官立則實著實著則名生故道也者所以立官也實也者所以永名也此君子所以貴務實也伯儒奉 天子之命巡於南必行其道於南方使南方知 明天子之有賢臣以是爲孝不亦大矣乎以是保名不亦永矣乎夫如是雖無是詩可也是詩雖傳之百世可也惟伯儒圖之

李司空老先生壽序

大司空李公既致仕自南京歸於隴越五年乙亥年七十有二惟聰明強健邁厥官時公姪貢士守纓乃乞文壽公

因閻司諫見於余曰纓伯父蒞政行身罔不淑卿大夫暨士有知有未知纓罔敢譽親罔言無以辱先生言昔我伯父爲御史巡於遼東惟時總戎及厥中貴臣厚歛於軍士棄厥戎務邊防大頽伯父乃揚其罪於 朝遂乃戢嗣爲都御史植厥紀綱公厥刺舉罔貳於左右近習厥公卿厥貴戚亦罔弗守法茲惟勇哉伯父友於兄弟纓少失怙母暨兄皆育於伯父以克有今日茲惟仁哉余曰子言罔譽茲惟壽余聞凡厥有形惟氣之生受氣厚罔弗壽非厚罔克永年氣生勇氣盛長勇乃大多壽其來先民有言曰積善必有餘慶又曰自求多福人惟累仁於下天乃降祥在

上厥若樹厥根茂氣乃來滋天之傾佑惟人子伯非壽伊疇其壽余聞氣惟養斯充厥氣仁惟充斯廣厥仁不貴異味後穀味氣乃生不役形志致外物氣乃嗇不以喜怒蕩性情氣乃平惟茲氣充壽乃益勿恃貴而暴衆勿益已而無人勿據尊而凌卑仁乃廣茲惟迓壽子其告哉余聞國有老成丕乃著龜周書曰無遺壽考曰其稽我古人之德矧曰其有能稽謀自天今四方多事須嘉謀明德以底於寧 明天子其尚有稽公惟懋乃謀德子其告哉

送太學劉生歸省詩序

萬安多賢與顯者而劉氏爲盛有忠而無倦勤而有勲者

大司寇雲菴也有專務寬簡寧民者方伯安菴也有公而確任而濟者方伯木洲也有勁正而溫然者司寇執齋也四公皆成德君子也而聚於一家於是鄉之士有所矜式而成其才況子弟之趨庭乎四公之德尚足以風鄉人而況口談詩禮之教於子弟乎太學劉生美卿者於雲菴爲曾孫於安菴爲從孫於木洲執齋爲從姪漸詩禮之澤奉過庭之訓有日矣故在劉氏爲賢子弟在鄉爲名士在太學爲上舍生今卒業將歸其鄉以省其父母執齋旣求諸公卿之詩又以書屬予爲序使發諸作之義以進生於遠且大者予夙受知於執齋及予爲司業生猶及受業于成

均故於生之贈義有不可辭者夫世貴之子易侈世賢之子易才習也世貴而侈已不足言矣世賢而無聞焉適忝其家而已矣生旣薰世德以成其才今之歸也若怠厥修以優游於鄉曰我僉次如是也是世貴之習也非所謂世賢也夫處者出之宅也求者用之地也生僉次於鄉處也處而不求用將何資生歸而求之家其有餘地乎是故忠也求諸司寇寬也公也求諸方伯正也求諸少司寇由是出而有位也忠足以事上寬足以使民公足以臨事正足以直身而士之能事畢矣不將益重世賢之門乎諸詩義之所及無乃亦在是乎生其無忽予言哉

贈行詩序

石岡叅山東藩司三年分守於遼邊民悅也已還治於省
省民又悅也已巳卯冬巡撫中丞檄督京餉未行盜起齊
魯弗靖復留捕盜盜乃夷以庚辰正月至 京師來輸者
如趨市民又悅於從也於是大夫士稱之無間言六月吏
部疏其賢宜遷 天子命爲山東臬司副使將歸詞林
諸君子贈以詩予萃錄之遂成巨卷焉覽而歎曰美乎哉
言也友道盡於是矣夫友道之益以責善也人之取益以
受善也友不責善曰損已不受善亦曰損友而交損奚取
於友哉諸子之詩有直有諷有勸夫直者其詞核陳事而

不詭欲其見之行也諷者其詞微寓於言外欲其繹而從
也勸者其詞忠意惻而不能已欲其肇新業以篤舊功
也黜諛而納誨明義而略情是益友之言也石岡知能擇
術謙能受言是善取益者也詩所及不將爲德業之資乎
故曰友道盡於是矣

送灤江王先生赴京詩序

灤江王公汝溫爲南理長之二年晉佐大司馬于京師將
赴召太宰玉峰朱公以下凡有七人餞于徐氏之東園又
卽席各賦詩一章以贈之少司徒樾岡胡公屬予爲序予
三辭之樾岡不可予曰無已聊以衍諸詩之義乎樾岡曰

可夫詩者主文而譎諫者也辭明而音婉清濁協陰陽節
奏中律呂詠之足以動人者文也陳善致規使人聽其音
而徙義者諫也徒文則肉好而近諛徒諫則徑直而難入
其於詩道遠矣吾觀諸詩其弗爲至乎夫太宰之詩詠其
才也少宰靜菴胡公之詩詠其德也少秩宗類菴趙公之
詩詠其謀也奉常栢齋何公之詩詠其威也都憲靜齋陳
公之詠如玉峰大秩宗立齋沈公少宰蒲汀李公符卿程
齋盛公與樾岡之詠如靜菴少司馬石峰陳公都憲信山
韓公宰卿萊灣安公納言仰止黎公如類菴馬夫才者造
謀者也德者所得者也謀者制勝者也威者立令者也才

良則謀善德深則已正謀善則勝全威定則令一是故謀
善斯外患可制矣已正斯債帥可祛矣勝全斯國家可定
矣令一斯六軍可訓矣以是協恭于大司馬不可以復皇
武之無競乎因感以陳義略情而申規此諸公之詩所以
爲至也灤江敏博沉斷都諫省則國無淆論撫兩鎮則時
無饑民長南理則人無冤獄非天下之全才乎收大臣之
全功其在茲行與諸詩之義無乃亦在茲與

守難贈王良謨守順德

守有三專有三沮去沮舉其專守之職其庶乎何謂專民
所皆好因而與之則已不費而惠行則專民所皆惡因而

去之則上不損而害弭則專隸郡之吏好惡以民者吾得而舉之好惡以已者吾得而治之揚善禁惡斯政均則專此之謂三專何謂沮守吏民之首也其任甚重故與監司相接之禮亦優監之品下於守者守不庭參今皆誦之跪趨唯諾與州縣之吏伍則無以取重吏民而政不可立則沮道路之治置吏掌之迎送之事非可以責大夫也今之顯客往來者守不迎送卽以爲傲而毀之多至名敗而官廢故通衢之郡守以迎送爲務而以其餘治民是以多廢事則沮 朝廷以黜陟之典馭庶官 國初之制九載三考然後綜核其功過而黜陟之是以法定而人尚義自推

陞之法行而三考之制格於是以致察定賢否而毀譽之言行以毀譽爲黜陟而官士之守奪故行賄以取譽而剝民以資賄則民玩而難使則沮此之謂三沮夫沮與專二者不並行也沮者昌則專者塞矣塞則惠政不流惠政不流則民不輯民不輯則怨怨則違亂不遠矣故欲天下之治非求其沮者而去之不可得也夫沮之起由法壞也法之壞由簡便者決之以趨利也及其久也顧守以爲法矣今欲移其弊以復於正非 朝廷大政驅之不可得而變也非公卿言之 朝廷之上不可得而知也公卿言之

廷斷以復之非良有司不能守也良有司守之非明罰

以翼之不可得而久也是故事不憲舊爲擅責非分之禮
於人爲僭屈節以媚人舍務而逢迎爲諂剝民以利己爲
貪如是者罰無赦則沮者塞而專者行矣然而惠政不流
而民不輯則吾未之見也刑部正郎王君良謨擢守順德
順德爲畿內大郡又當南北之衝人爲難之良謨方而
有禮質而無好非惟自信之吾黨之士皆信之也則不諂
不貪固已預知矣其所專者孰得而禦之乎若夫人之所
以處良謨者皆非良謨之所能知也同鄉諸君子咸思贊
其行述之以屬予因作守難贈焉

杏東先生文集卷之八

杏東先生文集卷之九



明太常寺少卿兼翰林院學士儀封郭維藩 撰

都察院右副都御史門人德清蔡汝楠校刻

墓誌一十四篇

大明宗室奉國將軍一清墓誌銘

晉之始出 恭王 王我 太祖高皇帝子也封於晉

謚曰恭 恭王生 寧化簡懿王簡懿生鎮國將軍美堦

鎮國生輔國將軍鍾鏃輔國生將軍諱奇況一清其自號

云將軍仁厚有至性事輔國敬愛兼至輔國嘗病將軍侍

左右衣不解帶凡飲藥則嘗以進飲羹則手調以進逮病

能起每寢必先溫枕席而後請卧焉輔國既大愈謂之曰
孝哉子也吾病不苦而瘥其孝親有如此者將軍有三兄
事之甚恭相處無違色無背言諸兄皆安之仲兄早卒字
其姪如子門戶與居皆有節制諸姪卒賴以成其愛兄有
如此者將軍恬靜寡嗜好府無狗馬禽獸之畜門無技藝
方術之客惟見賢者則傾心下之如恐不及平居讀書之
暇飲酒賦詩鼓琴而已其於貨利澹如也故其行成而名
立其身有如此者性又喜施凡病不能醫喪不能葬者
輒助之費嘗歲饑饉民貿貿載道乃以祿米爲粥食之流
民多所全活其惠人有如此者將軍好賢故賢士亦好其

賢其相慕者皆作詩或賦以贈之積至數百餘篇將軍乃
萃而錄之於冊居則展詠終日樂而忘世其好文有如此
者夫外物之感於人者無窮皆能移其心而富貴尤甚是
故富貴者多驕侈驕則長傲侈則敗度傲而敗度欲其免
咎得乎將軍生長富貴之中而能確然立於善道如此是
固 祖訓遺謀之善而我 高皇帝 聖德昌後

之慶真可衍之無疆矣於乎盛哉於乎賢哉將軍生於成
化三年八月一日薨於正德十四年十月五日享年五十
有三元配樊氏封淑人一子曰表採天未封女二曰栢城
鄉君配儀賓吳夢曰 鄉君配儀賓郭陳善繼配張氏

封淑人生三子曰表桓封鎮國中尉曰表楯曰表棟幼未
封女二曰武義鄉君配儀賓牛鵠次幼未封孫子二中尉
出也俱幼未封正德十五年十二月十日葬陽曲蘭福村
之原中尉走使京師介五官司晨王明德問銘于史藩乃
按太原府同知李君錫狀敘而銘之曰 恭王開晉百五
十年曰富曰貴子孫是傳四世之孫粵惟奉國不侈不驕
令儀令色守富以約守位以仁 帝室之慶麟趾振振
蘭原崇崇佳氣浩浩將軍寧止終古是保

明故四川布政使司右叅政進階嘉議大夫李公

誌銘

右叅政李公卒其子運判應禎以運使王君宣所爲行狀
一帙緘書走介京師乞余銘余旣知公又與運判爲婚姻
其何可辭乃序而銘之公諱景繁字邦泰別號澹菴世爲
儀封人高祖旺仕元爲萬戶生伯通伯通生贈知縣原原
生太僕寺寺丞榮寺丞娶趙氏封安人實爲公父母公爲
兒時其遊戲好拾梗畫地上若書字狀長遂好讀書從其
從父黃州府同知恒學大遂於詩成化乙酉舉鄉試越四
年己丑舉進士初授三原縣知縣三原難劇在秦中爲最
公至勸學訓農摧奸植善明理正俗興利剋害三原無遺
便流民間之皆相率來歸居三年政乃大成巡撫都御史

巡按御史交薦其賢遂擢太僕寺寺丞民思之爲立石勒其政績焉尋改工部主事進員外郎中弘治庚戌奉

勅管理河道自濟寧抵儀真凡二千餘里時淮揚間河道澱塞漕舟膠不可行總漕都御史以聞 上乃 勅

命都御史暨公濬理公曰都御史大臣吾當任其勞卽移檄召夫於河上諸州縣咸期集總八萬人又檄吏之廉而有才者分領之公乃定番更以節力禁侵漁以省費限時日以程功明勸懲以勸力蓄藥餌以備疾約束既定遂畫地分工公往來督視罔怠乃自揚以下濬邵伯濬揚子橋濬三汊口以達于高郵州長計三萬一千八百六十丈廣

計十丈深加於舊五尺已乃悉引河外諸陂塘水以入舟仍告淺公行瓜州河堤上見東南地下沮洳若有水者升高望之果然因問土人對曰是江湖之匯也公曰可導也已卽相地勢高低導之先古劄子港次張家灣次劉家圩次皂莢林水盡入於河猶淺公議欲引江水自都御史以下皆不敢主其議公曰無傷夫自揚州至淮安河淺三百餘里非江水灌必不通江水併潮流乃奔悍潮盡水平亦易制也有害某不敢避遂移濬夫守閘運土石備壩令潮至決壩啓閘水入奔悍聲如震雷衆懼公不爲動流一日夜水瀰瀰與河斫平原引江水流勢亦減遂塞壩閉閘舟

乃大通都御史謂人曰李正郎知且勇哉見事明利害弗能奪也公分司徐州徐在黃河下流水漲卽放城下震盪衝嚙城甚危徐人屢告急公因思蘇文忠故事於城北築堤障之其築雜用土石甚堅其亘半匝其城徐人始不患水謂之曰福星堤且立石紀其事堤上癸丑遷山西布政司右叅議奉 勅總儲政公至治貪吏戒暴征定懲法警愾農時巡歷賦完而民不病嘗行邊郡至灰溝營謂其守官曰是夷夏之衝也芻粟積者幾何對曰旋運旋支無積公駭卽赴巡撫議請于 朝得召商上納芻粟積至十餘萬是春虜犯大同守暨應援兵馬得取給不乏其先事

之見率類此時邊事急公往來暑中督運至天井關渴甚因憇樹下有童來獻瓜公顧索米償童童遠不可及從者以爲異辛酉遷四川布政司右叅政至則領三道事衆方望公大行而公病手強足蹙而語瘖遂致仕歸公素知醫乃減嗜欲審藥物自調攝之不二年漸能言語起居公寬厚而介凡弔喪問疾雖貧必往至以官府事相干雖親且富不應也又好客客亦爭附公客每叢集公接無倦容親友則欸以酒食或有請邀不擇富貧貴賤皆往往必盡醉以故愛敬盡邑人邑人稱厚德者必曰李公李公云所著有本草捷徑人相大略二書藏于家配尹氏族望而賢子

二人長卽運判次應祥儒官女三人一適庠生毛瑜知府
泰子一適左士舉一適太學生曹岫側室子三人應福庠
生應祿應壽庠生女二人一適鄭伯甫一適王御史廷相
弟廷梧孫男九人紹先紹緒俱庠生紹謀紹誌紹哲紹祖
紹徐紹晉紹蜀孫女三曾孫男一如金公生正統三年十
一月十一日以正德九年十一月一日卒享年七十有七
運判將以十年某月某日葬公於丘伯岡之原從先人兆
禮也遂銘以授使者詞曰公出人福公退人賢退以其疾
卒以其年維德罔愆以克斯然

明封文林郎翰林院編修王公配封孺人宋氏合

葬墓誌銘

公姓王氏諱瑞字世楨其先山西太原人曾祖有諱明善
者國初來居于曹縣之解原里其後復立曹州割縣里
界之而解原適在割內今遂爲州人祖諱斌父諱果俱敦
善行鄉里稱焉母張氏公兒時病痞甚危母念一子恐遂
絕先祖祀療治禱祠無虛日夜忽夢一人持刀割其脇取
痞以出自是病愈比成人嘗曰蓼莪之詩謂哀哀父母生
我劬勞若吾父母之生我其諸異乎人之父母之劬勞矣
家貧自營薪水以養父母雖極勞瘁不廢書冊年二十六
始補郡庠生又十有八年始廩食於州公學益大成矣累

應省試不利嘉靖初元當貢于朝以子三錫編修貴
勅封文林郎翰林院編修乃慨然曰吾志吾子其行之吾
盍休乎遂管家務家乃用裕公益節用縮費稍有羨賄輒
買畬田之薄者久之得若干畝諸子皆莫知其意人或問
曰遠而瘠將何用焉公笑曰吾愛其費少而獲多可以資
無產者也於是以授三族之貧且困者皆欣然往耕焉人
多賴其惠有識者比之范氏之義田云父嘗病公養之無
遺力且每夜率諸子禱諸祖先之前泣而請曰願我死留
父父衰不能爲鬼神役予壯能爲役也父尋愈後母病亦
如之比其卒也皆登耄年人以爲孝感所致子三錫生纔

七八歲知其性慧也卽口授以四子之書爲講大義及長
教之爲文之法曰時論謂作文爲玩物爲小技此不知文
也夫天之爲天也文而已矣人之爲人也文而已矣故易
曰柔來而文剛分剛上而文柔天文也文明以止人文也
又曰觀乎天文以察時變觀乎人文以化成天下言文之
用大也夫天有命人有性性與命道之極也君子之爲學
也求以知性命焉耳知性命道在其中矣知道文在其中
矣知道之文見之著書則可以垂訓見之議制則可以濟
務此則經世之文也若夫時之所譏藝焉而已耳非吾之
所謂文也小子識之三錫奉以從事蚤歲以東藩鄉試第

一人發解取進士官翰林爲時聞人東人凡教子皆以公爲法平生忠信不億詐然亦不爲人護過嘗有人售田於公旣與之直矣後復以原田書劑來售仍與之直家人曰渠昔已得直矣奈何復與之公曰豈有是卒不信鄉人有爭鬪多相率來質公輒面判之曰夫夫是夫夫未是狡者或不伏公笑曰彼堯舜禪而湯武放伐孰是耶孰非耶今安在耶汝且休矣皆帖然服謝而去公年旣高德益著又封受法從之銜凡藩臬重僚行部至郡皆就而問政公惟以獎當罷利當舉者告之非公事不以出口藩臬多施行之且曰翁若是宜有是子也郡大夫舉鄉飲酒禮必以公

正賓席庠序目以爲重公孤起成立無所資待偉然爲一郡達尊然豈弟有容口不知言人過亦不知忤人人造公待之必以禮其容怡怡如也至其論說之際忠信仁義之談確乎不可奪人皆竦聽之有進善之益焉蓋所謂和不流者與嘉靖甲午正月二十一日偶以寒疾卒距生景泰乙亥十一月十八日及卒之歲得年凡八十二云前配楊氏早卒無出繼配宋氏封孺人詳具本誌子五人長卽三錫以翰林侍講爲四川叅政次三顧生員次三槐次三鑑生員次三俊暨三顧先卒孫男四人曰綿曰繩曰編曰綏孫女三人使以書來請予銘曰先生昔年家居嘗銘吾母

今吾父之葬而復值先生家居不肖孤三錫杖經喪次不敢越境匍匐請于門下念惟門牆之義其賜之銘是吾父母之兩幸也予既對使弔問乃遂銘之銘曰於戲封君惟脩不爽惟闕不章惟後之昌其施無疆

明故工部司務楊公墓誌銘

公姓楊氏諱潤字玉夫其先陝西郃陽人洪武中秦人大凶饑有諱伯中者携家踰關東走河南之儀封久之遂家焉贈通議大夫兵部右侍郎伯中生瑾爲華容主簿封文林郎監察御史旋贈通議大夫兵部右侍郎瑾生謚以進士累官至通議大夫兵部右侍郎蓋公之父也母蔣氏封

淑人公成童時卽有遠識大度侍郎公舉進士授崑山令携家之任時青州府同知趙公希魁幼失怙亦在行實公之表兄也至邑侍郎公延師並教之愛趙如同生然每食必勸飽每製衣必讓先與趙終日誦習無違言侍郎公謂蔣淑人曰吾兒能讓孤甥如此吾弗關心矣公賦性甚敏侍郎公庭訓又嚴績學爲文月異歲長比歸督學憲臣選入邑校爲弟子員一時弟子員皆弗若也成化丙午以明朱氏詩舉於鄉明歲試于禮闈弗第自是凡四試皆弗第時侍郎公以中丞巡撫宣府及遷佐兵書俱隨侍外則匡贊謀議內則綜理家務暇則延訪文武士之賢者以備侍

郎公論薦故侍郎公在邊著于襄之績在朝擅壯猷之稱
公與有力焉弘治庚申侍郎公卒于京公護喪以歸本
朝之制凡京官三品滿一考沒則差官督造坐域其材役
之直許取之本省藩司喪家輒收其直乃屬督造者仍取
直於縣官以故縣官與喪家常交怨公於營務一聽督造
者督造者乃盡直金爲之故其制倍好於近所作者公精
楷法手書 諭祭文於碑豎之亭又書公卿大夫祭挽諸
作于石陷之壁字畫遒勁體兼晉唐督造者摹數百幅而
去其爲人所愛尚如此比免喪乃以蔣淑人命就吏部選
遂居部試第一得授 工部司務司務秩雖下士然爲尚書

幕僚每晨趨堂揖尚書行立皆在四曹大夫上士之上又
四曹或有滯務惰吏尚書輒命司務稽核之故司務或有
言於四曹四曹亦多允行四曹凡遇事有可輕重者乃亦
就告之以探其所欲言公至部曰豈可亂人官守以遂便
利耶旣不干四曹而四曹有所告亦却不行由是四曹大
加禮敬尚書曾公亦愛其爲人或部有疑事輒引公與計
之緩急輕重咸中幾會曾公每用其說嘗曰昔所謂入幕
之賓其能過子耶正德丁卯寺人劉瑾擅 朝政生殺廢
置半出其手士大夫稍忤意卽中以禍宿怨舊憾必報至
有沒其家而戮其尸者舉 朝震疊卿大夫以下見皆庭

叅公曰婦寺而乘士夫尚可仕耶卽上疏乞休曾公亟止之不能得乃致爲臣而歸後數日曾公以事見瑾接之甚倨曾公喟然曰楊司務可謂先見矣因鬱鬱成疾兩目發黃尋卒公旣歸日以將母爲事凡冬夏裳衣裊褥枕簟之所宜皆親自檢視務極潔好向夕則立寢門問寢內婢曰寢矣乃回晨則問安內婢曰安乃回卽勅家人戒饌每食公必待凡甘旨滫瀡必竭其力之所能辦至淑人食之多寡與其嗜好皆有節度不使其少過今淑人九十有五矣猶強健聰明如五六十者雖盛德自獲其福然公奉養之力亦不可誣也公眉目竦秀方面豐頤皙白如玉動止雅

重翩然如塵外人天性樂易不立峴畛惡言人過而樂道人之善接人無賢愚大小辭色温温常若恐拂其意者故人皆爭相親比常於城西一里許建菴一區名曰止蓋取知止之義因自號云菴多奇花芳樹嘉禽翔集其中每遇吉日或興至之時輒招親友同遊樂之敘情話道桑麻官府之事絕不出口若不知天下有勢利事者昔侍郎公在朝公與弟惠夫皆以鄉進士侍用門閥赫赫親戚與所識日競趨之豔有譽德無所不至比侍郎公捐館惠夫亦逝公復辭位向日競趨之人皆轉而之他氏有招之不至者子姪以爲言公笑曰此輩譬如蠅蚋逐馨臭爲聚散者也

何足重輕安知後日彼人不舍他氏如舍我者乎人以爲
名言於乎麗勢趨時之徒聞此亦可以知愧矣正月十六
日夜公張宴懸燈招予輩四五人共賞之羣子弟俱侍坐
笙歌諸戲俱陳甚樂也縣樓漏四下公猶戀戀不忍客去
越四日竟以疾卒乃知公戀戀不忍客去者其爲永訣耶
於乎痛哉計聞予遂偕中丞東阜劉公都諫東岡張公走
弔哭凡邑之士人皆曰善人亡矣無不弔哭哭且盡哀焉
則公之爲人可知矣嘗以子承祺貴 勅封承德郎順天
府通判云公生天順癸未六月七日以嘉靖乙未正月二
十日卒得年七十有三元配劉氏封安人生子承祺順天

府治中次子承祉邑學生承禴側室朱氏子承禕承祀周
氏子承祊邑學生承祝承禪邑學生承初女六長適吏目
柴炳次適邑學生李坤之次適李紹庭次適蘭陽學生王
維謙次字喻思恭一幼孫男七範邑學生簡篋邊籌筠箎
女孫六長適知藩印龐正儒次適承都司差李邦弼次適
郭畊次適謝寵一幼治中以丙申年二月十一日奉公柩
葬於丘伯岡之原先兆側齋公表弟地官尚書主事雷公
震之所爲狀來問銘予辱公愛甚稔宜爲銘銘曰人愛官
爵公棄如遺人厭山林公甘若飴棄官保身括人之規山
林陶真道者之儀彼闕其發以爲後綏我銘撰德百世其

知

勅封監察御史胡君配孺人李氏墓碑銘

嘉靖壬辰予主禮闈試得楚士曰胡鰲氏榜揭楚人咸曰
得雋旣釋褐以尹邑治最徵爲御史適西北邊數有虜患
邊氓肝腦塗地御史上疏言本兵用將不得其人且極列
時帥庸懦寡謀罪狀時 皇子生希進干澤之徒皆媚
竈圖改 宮僚物論喧騰至達 廊廟御史又上疏言
皇子天下之本本正則天下安宜豫養德性以奠萬世之
業 宮僚輔導 皇子所係甚重盍選道德端方之士
以充厥任勿使希進干澤之徒間之以妨養正二疏

上皆嘉納於是朝紳皆多之無何

上覃

大慶之

恩

勅贈御史父如其官母爲孺人御史見於予因某

某二公以請曰鰲生十三而失父十有八而失母奉其遺
訓績學爲文不敢廢墜荷先生之鑄以有茲官今拜 恩
而二親不逮鰲寔痛心願先生賜之言鰲將刻碑墓前仰
荅 天子之寵命以表先父母之耿烈庶少逭鰲不孝

之罪又再拜伏於地予曳起而諾之按誌君姓胡氏諱應

相字錫祥其先江西人六世祖曰均輔爲元辰州路總管

府判因家焉祖曰某父曰世安俱以洞曉方術爲郡醫學

正科公幼警敏有大志嘗讀四子書及經爲舉子業及見

州縣吏無惠政民多困敝喟曰讀書取位如斯而已乎反不如吾業之能活人也乃舍去悉取醫書讀之遂盡軒岐之術於是診脉藥病發無不應矣歲嘗疫長田民有李氏者舉家病不知人請視之公至乃次第施治纔數日皆起後李氏率少長齎金帛以謝公辭曰吾向也疾有司刻民故爲此今受謝又何異於彼貪而病民者乎遂以溫言遣還卒不取一錢正德中得奉例爲醫學正科君術業旣高又掌醫之政令治疾攻疔不啻饑渴切身由是郡無夭札焉時人比之俞跗倉公云年四十二以疾而卒配李氏卽孺人也幼讀列女傳及曹氏女誡女德甚習及于歸於君

室家之內雍雍翼翼無愆儀無昵語凡君有行輒以義贊之故君之善益著事公姑備極孝敬其與妯娌處能推逸而居勞至遇奴僕亦惻惻有恩宗婦戚姬皆賢而式之及遭君之喪哀毀幾不起自始卒以至窀穸皆準禮經營且自盡於心教子嚴而有方乃厚幣延師以屬之且戒鰲曰吾之未亡以汝故也汝如弗學學如弗成豈惟汝之不孝是吾借汝以偷生也死之日何以下見汝父又謂師曰先生無忘夏楚之威老身亦竊效熊丸之誨庶吾子之弗敗也鰲懼而發憤有成遂至登用皆孺人之力也年僅四十三而卒於乎君與孺人齊賢並美敦善行仁施不究積年

不逮德天若無意於善人矣顧乃發祥於其子今御史致
主行道施未艾而位洵顯孰謂天道與善有爽乎哉宜表
之以爲世勸因系以詞俾御史刻之詞曰 截截衡嶽爰
峻爰博根本旣豐物產亦錯江漢湯湯旣溥旣長源流混
混岐派無疆豈惟物理人道斯然德盛流光善積慶延於
惟封君術高利物惠普郡人言報色佛於惟孺人惟德之
行慈和溫惠宗族咸稱本厚如山源長如水闕而未施世
誦厥美惟德儲祥乃生竒男鐵冠朱服柏府潭潭俶俶封
章言皆至計可以懾奸可以救弊未究之業未獲之榮施
及後人爾勲爾名桃溪之原溪流瀾瀾百禩千秋德音不

已

叅政傅公配安人郭氏合葬墓誌銘

蜀省右叅政傅公卒後三十年爲正德乙亥厥配封安人
郭氏卒卒又十六年爲嘉靖辛卯其孫某等將啓公之北
而祔焉昔公之葬未有銘茲來問銘於予公予王姑夫也
故宜爲銘按狀公姓傅氏諱允字克誠曾祖諱貴祖諱守
信始自汝之確山徙儀封遂家焉考諱廷美以信義重於
鄉贈承德郎刑部主事妣魯氏封太安人俱從公貴也公
爲兒時喜弄書冊稍長遂好讀書嘗夜誦漏下三鼓矣油
不濡燈而息乃燒薪繼之火逸燃衣及膚而覺公滅火誦

而不輟故弱冠而其學已大成景泰丙子以朱氏詩舉於鄉天順甲申禮部登於廷第進士成化乙酉授刑部主事公持法甚嚴罔敢以喜怒輕重其間每議獄虚心以求情情得而後比以法法一定雖大官勢人干之莫能奪也性尤不喜騶從其出惟乘驢又不自蓄有行輒賃於養驢者之家相善者或止之曰予昔也爲士嘗徒行今也不亦愈乎京師遂呼爲乘驢公訟者聚輒相問汝訟在乘驢公平公廉而公不枉人由是聲名大起其長暨僚咸重之乙丑遷員外郎會浙江藩司缺提督銀場叅議時礦賊張信猖甚郡縣莫能格但斂手旁視而已衆議欲得有文武威風

者領是任吏部以公請於朝遂遷浙江右叅議奉

勅以行公自釋褐至是纔五歲士類榮之公之將至也賊信甚懼暗通守公宇者以五千金置臥室內有帖云以此獻公願勿捕當卽解散矣公至得金笑曰賊以利嘗我耶遂以金付藏吏偵得與信通者論以法公乃大捕之得賊四十餘人信乃逸去不敢復聚礦賊遂息凡煎礦爲銀錠成卽獻督官請驗人二錠焉謂之樣銀故事皆受之公一視卽封記已復俾歸額內曰此以爲樣非以爲利也自後提督者皆不受公主之也礦卒皆呼爲傅青天撫按使者交薦其賢無何以魯安人喪去位喪免補山西右叅議時

朝廷方命征大同威遠軍前芻粟甚急撫按推委公爲僭
運官公內巡郡縣外應邊庭士飽而民不知有軍費師克
論功得陞俸一級旣又塔兒山用師公再用僭運功朝
廷以彩幣一彩絹一馳賜焉撫按使者又薦之於是公滿
九載矣遂考滿朝於京師時某公爲吏部尚書以好賄
聞憚公所獻遲之一歲不遷所厚者以爲言公曰吾夜苦
蚊嚙而不能具帳安能爲是吾能爲是亦不至此考縱考
亦不遲至此吾志決矣卽上疏自劾求歸某公見其奏因
疏公名請簡乃得蜀藩右叅政公之未得命也患氣病腹
脹如附大鼓藥之而愈及抵家又病藥之又愈至蜀纔五

六月又病卽不起公性廉潔寡嗜好視天下無一動心物
自主事歷三省皆在刑獄金穀之司嘗見士君子居此者
多不能免謗公所至稱廉無間言在官二十餘載田宅皆
無所益葬後囊無剩貲安人與諸子饘粥纔足糊口而已
此可以覘公之廉矣嗚呼公以廉守官而以廉死使所抱
竟不得大行於時果天之爲乎抑彼人者之罪哉安人吾
曾王父蕭縣府君季女也莊敬溫惠曾王父甚愛之教之
讀書通列女傳大義手能作小楷宛有書法贈主事公知
其賢求爲公配旣歸孝於舅姑順於夫子和於妯娌傅氏
內外親皆賢之公績學能贊其勤及公之有官尤能以儉

承其廉而公廉名遂重於時皆安人之助之也若安人於公非所謂惟德之行者乎公生於宣德九年十一月四日卒於成化二十一年八月十一日得年五十有二安人生是年四月二日卒於正德十年九月十日得年八十有三子三長汝舟次汝霖次汝夔庠生女三長適岳思忠太平府同知次適劉玦次適李鉉安州知州孫子六瀧湖洙渡俱庠生浙瀚衛史女孫四曾孫七曾孫女十三葬以是年三月十一日塋在圈頭之原銘曰古有廉吏恐人知惟公之廉先後一時不窮而堅不達而移逢匪其人資久遷遲鬱而爲疾卒成禍基雖過其年令名不墮圈頭之原在河之濱孕靈藟畧三紀於茲長松搖壑堅石盤瑤安人來拊百禩攸宜

鳳翔府通判賈公夫人孟氏合葬墓誌銘

正德六年八月一日舅氏鳳翔府通判賈公卒年七十三甥維藩聞訃卽於京師邸舍爲位哭復爲之服五越月乃除公卒後四年公季子宗儒適在太學泣告予曰先君子於諸甥中獨愛兄器兄兄於先君子亦愛敬踰他甥舅甥之間可謂知己今將舉葬事我不請兄銘孰知先君子之心兄不銘先君子則先君子永有憾於地下言已予與宗儒對泣弗能視也於乎銘吾弗忍也不銘弗忍舅氏之無

傳也遂掩泣以銘公姓賈氏諱廷輔字良佐其先山西潞州人三世祖諱大良大良生謹謹生貞貞商遊儀封愛其土俗遂定居焉苦身節用尤善廢舉致貨貲乃起家數千金貞四子長聰次銘次志次肅公實銘出也公生而氣質端重不好弄及長獨喜學問雖大寒暑未嘗廢書冊至嘔血身羸而弗恤也遂乃大就連六試於鄉輒弗第有司以次貢入太學公誦讀益固懈有同門者戲且止曰君失之東隅欲收之桑榆耶公徐應曰豈爲是豈爲是爲愈於閑無所用心耳竟以詩經中順天府鄉試及試進士科五六試復不第公歎曰吾自結髮來辛苦三十餘年始獲一第

必再第而後仕老不及報

天子矣乃就吏部選得通

判鳳翔府專主徵輸藁穀之務公至府卽下令與州縣之吏約曰惟是藁穀賦民足國吏有以催科自見先穀時徵因念國家之用後穀時徵二者均惟病民違則罪無貸其有厚徵陰爲利圖茲惟不廉違則罪無貸民有頑而弗輸州縣各械以來予其罰由是吏畏民勸所領一州七縣之稅固無逋負弘治庚申西北邊用兵悉運內郡米供軍巡撫陝西大臣擇才幹吏董邊運卽以公行公至階州與其衛官約開倉期衛官武人欲得輸戶賄乃陰使軍士以米粗糲爲辭拒使勿入倉輸戶稍近倉卽羅射之公聞之自

往叱曰民數千里來運粟哺汝何仇於汝敢爾獨非
天子之民耶遂執其首惡數人杖之仍枷其頸以徇且謂
其衛官曰汝求賄弗得而教軍爲亂吾且狀汝罪於總帥
矣衛官懼謝不敢遂開倉以其軍舁米入焉及歸撫臣以
花幣獎其能嘗行部至扶風縣有僞爲御史微行者夜入
其城令以下皆匍匐請罪知公在府館遂號其門入使人
就臥榻趣公起公倉皇具冠帶見未數語叱吏執之曰爾
僞也杖纜數下卽吐實服罪令伏庭請故公曰吾見其顧
驟而言枝夫顧驟中懼也言枝心疑也二者皆僞之形也
以夜行飾僞也吾是以知其必詐也衆服其明於是以公

移械送上司公在任六年前後凡三四告休監司輒辭其
狀不受公不得已乃以給由請諸監司皆曰賈判賢而有
績宜令其去公遂解事東歸比及家遣人牒報府曰通判
病不能行可以缺報部矣公居家教子孫坦坦怡怡雖門
外之事一無所問凡公庭會聚鄉飲酒縣令屈體邀致弗
往也公性豪爽好植善而摧強故人皆敬憚之及宦歸乃
更寬厚人有犯者雖侮至門亦弗校也夫人孟氏邑名家
女正靜莊重配君子無違德公在官賓友稱其敬寮案服
其勤夫人內助之力居多卒先公十一年子三人長宗仁
卒先公七年次宗義次宗儒女二人長適李九成次側室

張出適崔廷幹孫男女十一人出宗仁者崇恩崇相崇惠
崇節崇基女二長適張肅次適張元出宗義者崇桂出宗
儒者崇胤崇祚一女曾孫男女六人同松如柏崇恩出也
一女崇相出也引爵一女崇桂出也以正德十年某
月某日宗義等奉公與夫人柩葬於城南之原謹銘以授
宗儒使掩諸幽堂詞曰允維別駕儒起家也煥于有政德
振華也退身保名道孔嘉也衍于子孫慶無涯也詞以銘
幽永世之嗟也

明故襄陽縣知縣葛峰李君墓誌銘

君諱凝忠字本孝別號葛峰杞人也其先有關荒田於考

之葛岡者家用殷富遂卽其岡居焉傳至三世祖以齒德
重於鄉鄉人弗字弗名皆呼爲三老猶言大老云爾三老
生海海生鑑鑑生太學生瑁太學娶張氏生君君資性端
重不好弄惟見書冊則展玩不舍去太學曰是兒之志其
在茲乎稍長卽遣就傅初從孫抑菴授朱氏詩已知其說
繼又從御史趙君世雍學益殫心於此興之義遂洞究三
百篇之旨一時庠序之士莫之與班焉嘉靖壬午舉於鄉
越五年丙戌舉進士旣釋褐得知湖廣上津縣縣及旁境
多四方逋逃之民人頑俗敝號爲難治君曰官不能行其
志者欲累之也民不服官之政者以其有欲也吾以不欲

治之何畏其難哉既見吏民布約申令一私罔通方踰月
民卽帖帖服君乃勸農興教佑善黜惡慎刑明罰恤難救
窮施無遺政政無遺便上津大治於是巡撫巡按交薦其
賢於朝且言上津小不足以張其能旣而有旨徙襄
陽襄陽大而巖也君行之日上津民遮留者幾千人惟恐
其去之速襄民日日迎之又怨其來之晚也至襄方二日
以父喪去位乃不得終其政君爲人孝友忠信不事矯飾
尤不以官位上人其與鄉人處無敢慢卽人或慢之亦不
校也故鄉里稱厚德焉今年春正月君如京師道于儀
因過予舍見其趨穆而視端氣溫而貌肅其論確實弘遠

無險語無勦說予私誦曰此遠器也乃二月遂聞君計於
乎國家設庠序以養賢備於天下一庠之內恒數十年
不得一賢或賢未必卽用或用未必卽當其才用或當未
必卽究其施此天下所以多糝政也今君賢矣用且當矣
而乃不盡其才以死豈非命哉君卒之歲爲嘉靖辛卯二
月二十一日得年方四十云配王氏凡生四丈夫子長桂
次梓次梧次桐女一字馮天福之子匏將以是年十一月
二十日葬於葛岡之祖塋其兄凝誠以邑選士劉廷聘所
爲狀來請銘銘曰旣壯而行方強而已孰與孰奪人乎天
只

明故驛丞張公配安氏合葬墓誌銘

公諱鼎字廷器姓張氏其先山東恩州人四世祖諱順者始徙河南之儀封遂家焉順生誠道爲勝國元帥府幕賓誠道生振以鄉貢進士爲唐山興平二縣學教諭有教澤至今二縣誦之教諭生紀配劉氏生公公豐背大耳雙目炯炯顧瞻有威幼嘗習舉子業旣乃棄之爲臬司掾及附名銓司冠帶來歸家居者凡十六七年不妄作事不輕交游鄉里重之正德改元授寧國之宛陵驛丞公至見官舟敝漏舟卒多不知風候水勢之宜喟曰舟以載人卒以行舟舟敝易溺人亦及矣卒不知風與水舟雖堅好亦敗矣

來非守官乃傷人也吾豈可一日居乎乃請於府修其舟而新之又募知風水者爲卒而厚與之直故事丞新蒞任驛卒皆眞物賄以見謂之見面錢公卽革之卒咸帖帖服此地產雪梨木瓜皆取驛舟以進又當衝路使舟往來如織公上達貢篚下應賓使篚無敗味河濱無停橈焉諸監司皆賢之勸獎之使游至多有擬薦之者而公倦矣遂致其事而歸公家故殷富多田園日臥其中時爲酒食召故舊以相娛樂或與班坐壟上道平生話桑麻衍衍然不知有塵世事也有古隱君逸士之風性尤好施族人暨里中貧且餒者或婚葬之不能舉者公皆助之務使有濟又曉

醫家之說常畜藥室爲丸爲湯液劑以待病者歲嘗疫求藥者填門戶公應之無倦色賴其全活者甚衆公爲人厚於倫紀孝親敬兄出於誠懇兄沒撫諸姪以恩而訓飭之意亦未嘗不切宗族以爲難及公初娶高氏處室無何而卒及求繼室乃得安母母東明人父曰鑑母盛氏淑婉端莊家人宜之然工於縫製精於酒食張氏大族姑姊娣之屬甚多皆翕然相效宗爲女師云又閑內政供祭待賓具有條理凡用物之出也外供惟稱情而內供必適其用雖薪水之微亦不妄投故其家益豐與公處協而能敬終其身如一日焉可謂合德無愧者矣公生正統十三年三月

十九日卒以正德十五年八月二十一日得年七十有三母生景泰六年六月初五日卒以嘉靖十二年九月二十五日得年七十有九男子一曰鈺義官女子一適蘭陽縣庠生劉拱暘孫二曰滔庠生一尚幼公歿後十三年舉也女孫二一適馬文潔一適庠生郭維清重孫女三俱幼鈺以母歿之年十二月初四扶柩於小宋之原啓公窆而祔焉以公葬未有銘來請於予公昔在黌舍中與先子中憲公爲友而予亦繼受公愛故得銘之銘曰七十三禩公卽幽高母也後之又加六齡公見一孫母見其二母見公告欣然其啞生也同德歿也同藏小宋之原終古允臧

石泉處士武君墓誌銘

君姓武氏諱滋字宗潤石泉其別號也其先河南洛陽人宋靖康間徙居溧水之蒲村遂家焉三世以上莫詳其所自出曾祖曰裕祖曰昱考曰鎮皆有善行在鄉里武氏素饒于貲君能守之益拓以厚壯時猶舉廢於廛中未之哀也卽慨然曰財所以足用也用足已矣奚用多爲因構堂於田就而居之與田父畦老相勞問或道說耕耘灌蒔之法因歎曰乃今而後知農爲財之本也夫百工作爲器用商賈貿遷有無皆所以通財也然非農不通故農爲本於是益務於農每秋穫倉困皆充溢焉兄早卒遺子昂昂皆

幼君檢其出入防其疾厄至飲食衣服皆有節制是以二子長而弗侈號爲克家嘗歲凶君見饑民貿貿於廛市中大出粟賑之賴其活者甚衆縣上其事于朝乃命以冠帶君旣以惠義重於鄉又性直不能爲好好之行里人相聞多就質焉君輒面指曰夫夫是夫夫非是皆聽而解人或有難事不能處亦就質之君一言而決咸厭服其心是

以其存也人愛之歿也人相弔哭如聚市哭且盡哀焉可以知其爲人矣君生于成化庚寅十一月十八日卒于嘉靖乙酉閏十二月十七日得年五十有六配某氏生三子長曰昂次曰曄次尚幼女三長曰善真適傅舉其二幼未

行將以某年月日葬于某原祖塋之次其姪昂高暨其孤
昂杖屣來請予銘向者予邑胡生寧嘗主其邑簿簿以事
至留都主武氏予過之又以河南之故故武氏子得見予
予哀其懇乃爲之銘銘曰遺利于屢陶真于田里尚其義
人頌其賢而不有年奈何乎天

明故彭母陳孺人墓誌銘

靜軒處士彭本立厥配陳孺人年八十有一以今年五月
十七日卒其子學錄元暘以學正麥汝復李如鳳爲介齋
刺史龍大有狀問銘于予昔予在雍嘉學錄尚節而有文
待之有加禮焉於其請也何可辭按狀孺人姓陳氏世爲

茶陵人父曰務源母曰羅氏孺人生而莊靜婉順父母有
教卽從之是以孺人早賢旣笄歸于靜軒靜軒之先有諱
仲文者嘗刺茶陵因家焉族大而務殷孺人理之種種皆
就緒宗黨咸以爲得賢婦而靜軒亦自謂有助也嘗歲饑
靜軒出粟以賑里人及秋熟里人爭出息以償靜軒辭受
未決孺人曰若取息非向者相恤之意也靜軒乃却其息
以入一日侍姑劉暨宗婦數人入城唁親道側有尼菴衆
欲少憇焉孺人止之曰禮婦人出必蔽其面以遠嫌也非
爲男子乎今菴有佛佛男象也近之非宜衆遂止劉寢疾
病孺人供湯侍藥不少去其側夜則禱于天冀以身代劉

疾愈呼孺人謂曰孝婦孝婦天必昌汝子以報汝矣蓋謂學錄也及學錄能就傳孺人出則誨之步趨歸則問其所業後選爲弟子員始入庠有搏虎以獻于泮者諸生以虎有文而變兆在學錄學錄歸以告孺人曰虎可食乎曰然皮可藉乎曰然然則能益人學問乎學錄無以應孺人曰徵兆幽遠而難憑學問切近而可力夫力學則德成德成則可以式人可以傳後信兆則怠修怠修則無成未免爲鄉人也今而不求諸近而欲信乎遠斯惑也已於是學錄極力於問學遂有今官夫相其夫以義妻道也事姑能竭其力婦道也教能成子母道也自處之嚴因以淑人持身

之道也他尚弗論也孺人其賢乎哉孺人其賢乎哉孺人生三丈夫子長卽學錄次元曜次元時女二一適譚弘秀一適龍則顯孫五人嘉慶樂慶宜慶順慶顯慶曾孫二人宗乾闢乾將以某年月日葬于某原銘曰於姑爲孝於夫爲宜於身爲正於母爲慈撰德考行允維世師刻此銘章來者之貽

明故武母杭氏墓誌銘

溧水胡主簿寧者予同里閨人也嘉靖癸未夏以公事入留都主於武氏曷曷溧人也頗讀書善應對因主簿見於予故識曷主簿嘗言曷母之賢予曰何以知之簿曰寧數

館於其家矣見其內言弗出戶外言弗入戶雖少男女不相授受其閑家有如此者客至必禮物豐而潔其供賓有如此者自夫君之卒也鉛華麗服卽屏不見曰待亡之人奚事於此自非至親罕見其面其持身有如此者品高皆孺而孤罔與甘美罔與輕暖及其長也各責之本業故二子農穫而賈售其教子有如此者爲處子時愛紡績及歸武氏也族大而富益紡績弗怠其衣咸取之所業其勤有如此者其性質而有恒雖以主母處豐裕然衣不重帛食不二味其儉有如此者又喜觀書自始字及于嫠未嘗一日廢曹昭女誠故其行可尚如此予曰若是其賢矣乎若

是其賢矣乎無何曷介主簿齋狀來謁銘狀所列皆與主簿昔者之言合是可銘也已按狀武母姓枕氏太平之當塗人也父曰仁母袁氏年十九適溧水武宗淵弘治甲子宗淵卒後二十一年爲嘉靖甲申乃卒生天順戊寅十二月初二日享年六十有七生丈夫子二長曰昂次曰昂女子一曰會真適士人程山孫子四曰尚節尚廉尚禮尚詩孫女三俱幼以乙酉年十月二十一日昂高奉柩葬於劉村大塘山之原銘曰相夫而終育子而成有德有操歸也永寧

勅贈安人余氏墓誌銘

安人今遼東苑馬寺卿侯公廷言元配也姓余氏父諱錦
太原衛某所千戶母某氏安人幼有專性少嬉笑晝日常
端坐穆然若有深思者稍長卽知向婦功見庖婦炊烹亦
爲炊烹事見姑姊裁製裳衣亦爲裁製事輒皆出人意料
父母喜相謂曰吾女如此他日必能興人之宗凡子殆不
足以當之及廷言委禽而余公已不及見矣旣歸侯氏遂
能脩甘旨以奉舅姑及爲裁製裳衣長短廣約咸中其意
且孝敬備至姑舅甚宜其養時廷言爲鄉校士以學文爲
業厥考千戶公又捐館舍內外供費頗難給安人恐廷言
力分而廢學也乃黽勉以求之劑量搏節不遺其力故能

物用相協不至縮溢家乃恒足焉性尤儉約雖舊硯斷線
必收蓄之人或問焉曰此足以備穀補之需耳其爲食務
極豐潔以進姑氏次以饋廷言與其兒女共啖粗糲欣然
不厭卽兒女之衣必數經澣補始易所親有諷其過嗇者
曰以此訓之猶恐其後之侈也識者以爲得教幼子之法
安人自歸廷言謂學必勤苦而後成遂替替不舍每夜燃
燭拂几請廷言誦讀乃於隅自爲女紅備膏以俟比雞鳴
而起亦復如之如是以爲常故廷言得專力於問學裒然
爲三晉聞人正德庚午以明經舉於鄉明年辛未舉進士
授戶部主事而安人先以寢疾病矣是歲秋扶病至京邸

越歲而益困病革時命侍婢取衣履自檢置榻前待盡又屬廷言曰君爲我治堅木盡以衣納其中令歸櫬無搖動又曰姑氏在堂吾不能以君之祿爲君養君其擇賢配養姑以永餘齡吾卽死瞑目矣言已遂絕其安人之贈從廷言主事考績 恩也距其生某年月日卒嘉靖壬申正月十九日得年纔若干歲於乎惜哉凡生二丈夫子汝謙汝訥郡庠生一女曰寅適太學生張棟廷言以丙申六月十九日啓安人柩於淺土祔葬郝莊原舅姑之北側以所爲狀發使授書徵予銘蓋念安人內助之勞而憫其相失之早也予與廷言爲同年友廷言之義安人之賢皆不可泯

宜爲銘銘曰井曰之操君子靡勞學也大成陟彼郎曹甘旨之潔力靡遑恤姑嫜底豫婦也允吉惟孝惟勤繫世之賢胡與之德而嗇其年 鸞誥覃 恩 帝褒嘉偶安人之贈展矣不朽

明故 勅封太孺人趙氏墓誌銘

太孺人姓趙氏長垣人考諱宗母秦氏 勅贈河南道

監察御史邢公海元配也監察公纔成童卽能秉禮脩義不欲輕偶凡族太孺人溫惠端莊父母愛之亦不欲輕字凡子凡邑之富室巨宗行媒至者皆弗許及得監察公議壻遂報可焉公旣委禽太孺人來嬪邢氏適其家中衰乃

贊監察公幹蠱於外而自任其內政縫衣精飯一出其手
以至薪米漿水之供皆有常故用不濫而物節家稍就裕
成化癸卯歲札瘥翁姑相繼以卒于時二柩在堂喪具費
頗殷太孺人檢其金玉之飾文錦之衣盡質賣之以供費
監察公得以盡無悔之孝焉姑歿時二孺子在遺曰江曰
澤於太孺人叔嫂也太孺人撫之恩不減禮既有室又勸
監察公以產給之曰此慰先姑於九泉也及江之卒又遺
三子一女太孺人育之有加恩及成人爲之婚嫁不啻已
出者里中咸稱其厚德云太孺人凡生五丈夫子今侍御
君進卿最少正德己巳監察公寢疾指侍御謂太孺人曰

是兒神朗氣清可讀書以大吾宗卽不諱無令失學以孤
吾九泉之望太孺人泣而應之曰諾監察公既卒太孺人
恒誦其語以警侍御侍御泣曰不敢忘也益肆力於學問
不怠太孺人晝則稽其業宵則紡織以視其讀故侍御無
嬉無廢遂以文行顯名於時歲丙子舉於鄉丙戌舉進士
初釋褐授山東臨邑令侍御奉太孺人以行臨邑民貧而
頑難使也侍御以嚴治之太孺人曰休之威之斯善矣纔
越歲民感其惠而不敢犯無何用巡撫中丞薦乃調蘇之
吳江縣同僚有以邑大地美爲侍御賀者太孺人聞鬻蹙
曰昔馬援明珠之謗得非因地而起乎吾教子以廉守官

惡用美地爲哉比至吳江見其民侈而多詐謂侍御曰非
可以臨邑政治此邦也侍御乃導之以儉而率之以誠於
是民服其化邑乃大治昔太孺人之入吳江也所親有勸
其致財以私餘子者太孺人嚴詞以杜之及在邑邸不食
白粲不衣綾錦家人請問之曰此非吾土之物也吾他日
北歸亦服食是乎故侍御廉潔之操益勵大江之南足爲
賢令者以侍御爲首稱巡按交薦其賢遂以治最徵爲河
南道監察御史乃肅使奉迎太孺人如京邸太孺人以年
高辭弗往因謂使曰汝語兒子御史言官也言之得失國
之利害由之主之聰明通塞由之非但如令繫一邑之安

危而已若能以言爲不易卽如在其所矣侍御奉以周旋
凡舉刺論建皆當其人而可行臺中稱爲名御史太孺人
性慈然持身御下甚嚴平居教諸子婦氣和色溫詞娓娓
惟恐其不喻小有過卽嗃嗃督責無少假借是以諸婦各
脩其內職閑於順道宗姻娣姪多相效之又善理家年雖
高猶不倦於勤凡奉祀禮賓歲時伏臘及內外親黨過從
問遺之禮諸婦惟咨稟受成至於指授裁酌俱適厚薄豐
儉之宜至撫族屬尤有恩義或有婚葬過時者悉助之貲
使舉之其待以舉火之家亦往往應之不厭蓋憫恤窮困
若其天性然也至是無疾而卒其孺人之封蓋從侍御之

官之馳也距其生正統十一年十一月二十九日卒於嘉
靖十三年五月十二日得年九十五子長儒次科次及次
保次第卽侍御君也女二俱早卒孫男十二人持謙遵教
遵道遵誨邑庠生循序遵化遵性邑庠生循途持光遵度
邑庠生循規持已女孫七人采蘭采薇采芹采苕采繁采
蘋采藻俱適名族子曾孫男四曾孫女五俱幼侍御將以
十四年十月十五日奉柩於某原啓監察公之壙而柩焉
乃寄書遣使齎造士王子泠所爲狀南踰大河屬其友造
士畢濟美爲介來問銘予嘗獲私於侍御遂諾而銘之銘
曰胤嗣之昌惟家之慶 襲封之章惟教之揚大臺之康

終也允臧厥福穰穰其德不爽我銘用張以掩玄堂繫後
之光尚茲考祥

杏東先生文集卷之十

明太常寺少卿兼翰林院學士儀封郭維藩 撰
都察院右副都御史門人德清蔡汝楠校刻

墓誌四篇

先子程番府君壙誌

嘉靖六年春二月有五日先子以疾終于正寢長子維藩
爲翰林侍講學士于南京計至卽易服行以三月二十四
日哭先子於殯堂踴痛崩摧絕而復蘇曰嗟乎孰使予遠
違而弗及見吾父也天其罰予之不孝而弗使見吾父也
於乎痛哉旣五月始克謀葬事於是卜地於四郊遂得城

西之新地將以十一月十日奉柩而窆焉乃銜哀撰次世系歷履之槩以誌於石誌曰先子姓郭氏諱廷珪字邦器別號易菴其先鳳陽人高祖諱德元季避亂來儀封亂已卽家焉曾祖諱二公以行行祖諱岩蕭縣典史考諱慶贈奉訓大夫南京刑部員外郎妣歐陽氏 贈太宜人俱從先子貴也先子篤志無華故其學成而確及長遂蔚然爲庠序之宗成化庚子舉于鄉丁未舉于禮部以太宜人之喪歸免喪爲南京戶部主事時襄毅秦公紘爲司徒使權舟于揚居一年金倍于前權襄毅說曰人也庶哉可任也及瓜而遷員外郎先子請代襄毅弗許乃使以陞銜從

事焉適 獻皇帝之國道于楊中貴有蘇姓者護行求貨鈔先子辭焉蘇怒遏先子弗得朝先子颺言曰蘇太監稱免朝於是乃令之朝貨鈔卒不與丙辰以奉訓府君喪去位喪除復爲南京刑部員外郎旋遷郎中有填人范和與其徒李鍾同出因酒忿相毆范和死焉鍾乘夜焚其屍數日和妻訴于司曰與渠同出必渠謀之久不得其情一夕先子夢釜鳴自外入驚而寤因推曰釜飯器也又釜鳴鍾也范器其在鍾家乎搜之果得填器二又取他填器錯之召和妻問曰汝夫之器汝能辨乎曰能卽出使辨內持一器泣曰此故夫之物也先子召鍾訊之一語而伏富人金

榮金安析產弗均訟于司榮侍長寔專其財時侍郎某公攝部亦南京人右榮甚力先子議掎榮益安獄具侍郎弗允又具又弗允先子辭弗訊侍郎送何主事訊之產竟不分侍郎坐是爲言者所論遂徙別部天長縣豪陳鏖以鬪毆殺人訟于縣縣脫其罪至是訟于司先子訊實檄縣取鏖且逮縣官鏖恐大賄于守備鄭太監屬先子使從縣獄先子陽唯之檄縣取鏖益急鄭因主鏖訟于朝誣先子求賄弗遂欲枉其獄下其事於南臺臺大夫某者使郭御史訊焉卒從縣獄會考察京官先子以誣故又爲侍郎所擠貶知膠州時論惜之州濱海民務魚鹽惡耕作故田荒

而多逋賦先子乃多市耕牛鑄釘鈔招民耕之而緩其稅於是民相率來耕比連歲大熟民爭輸賦舊逋悉還州之受賦於民也率入錢及出也其數視入十三而殺一焉每賦已得羨錢五百餘緡官皆私之先子悉以助民且言于監司監司曰微知州言其資贖也乎遂令諸縣以爲例逆瑾偵卒譚深膠人也自京反于膠怙威求賄先子弗與深忿而毀於瑾瑾使人來偵止數日無所得而去猶以先子早災徑奏爲煩瀆罰米一百五十石庚午遷荊州府同知嘗訊事入蜀舟中忽病痰頰弗能啓夜夢白衣者教曰以手摩胸以手摩胸先子卽向問曰我江神也先子寤摩

之果愈辛未攝長入覲凡屬之有責於民而瘵於政者悉
言於部黜之荆人快焉無何遷程番府知府乃不行而歸
藩以史官三載考績有 誥封先子中憲大夫程番府知
府先子樂易忠信尚履而無高論親親弟弟友友幼幼其
行純如也然尤不喜權利平居手不持一錢卽俸餘亦不
自收畜居官幾三十年無上貴以爲援無比友以助譽雖
淹於州郡然而無悶也自荆而歸不復問家事爲休老會
以聯耆舊相與觴詠日休休而已疾革時女侍悉屏出曰
吾其歸也乃卒則我先子之於人可謂無遺憾矣生景泰
庚午十一月十一日享年七十有八配我母賈用先子貴

初 封安人再 封宜人用藩考加 封太恭人生三男
子長維藩娶胡氏 封孺人次維垣典膳二十九而天娶
王氏次維屏典膳娶侯氏女二壻岳廷佐散官趙秉德庠
生孫男四人田甸太學生留會孫女六人壻岳舜俞李紹
祖田元周吳道東俱庠生字劉象程應富者其幼也曾孫
男一小名曰重後先子七月而天藩於先子疾弗得坐於
足含弗得實於口斂弗得奉於棺懷祿遺親覆載間真不
容死矣是用以不孝之辭發終天之恨掩諸玄堂以示無
極於乎痛哉

先妣恭人合葬壙誌

先妣 封恭人姓賈氏儀封人也處士公諱銘之女母石氏恭人幼有至性端方以潔故父母皆鍾愛焉恭人長兄通判公廷輔與先子中憲府君俱爲鄉校弟子員通判公有識鑒甚器先子嘗勸處士公以恭人妻之處士公心許焉時崇邑胡公澄爲尹獎士勸學甚力數蒞學課士知先子賢也又聞恭人賢也一日召通判公謂曰聞若有妹賢彼郭生者賢也可以爲配盍以吾意語若翁通判公歸以告處士公意遂決及我王父奉訓府君使妣氏來請婚處士公欣然曰縣主已爲妣之矣令妣氏以兄報逮納采胡公具醴幣鼓吹自臨貺處士公於是盛張具以饗胡公而

燕親友於別堂客咸喜曰茲事前未之或聞後弗可知也恭人十九而歸先子適吾家中衰矣恭人親操井曰安如素履事奉訓府君暨我王母歐陽宜人力竭而敬亦至故皆得其歡心是時奉訓府君獨任門戶繇賦之事然郭氏故多賦也力恒困於征輸恭人每脫簪珥助之無難色無怨言恭人凡處四叔一姑飲食裳衣之務一不以遺宜人當裘袷相代之時紡績或不時成恭人截裙衣叔解衫衣姑宜人恒未及知焉乃先子學甚苦恭人尤以勤贊之每春及秋冬之交夜必燃燈拂席趣先子誦恭人亦自執女紅不輟至聞雞始罷先子或醉而早寢恭人於夜半燃燈

趣之曰耽酒懷安實妨于業先子矍然而起因作酒戒以爲警恭人又欲先子審交以益德也一日先子與客語恭人竊聽焉聞其言善而有規諷恭人欣然潔饌以出使之盡歡乃罷他日又與客語恭人趣又聽聞其言游以狗但出茶湯一二行而已先子退恭人曰向者夫夫之言直是益友也今夫夫之言惟君意之當是損友也惡用及門爲耶及先子舉進士爲主事歷知府恭人勸其勤政親察如在鄉校時故先子自爲士至大夫所取皆正友所行皆直道官雖坐是不顯而時論賢之恭人生藩暨二弟甚愛也及有婦又甚愛婦至隨事訓教一以嚴行之子若婦小有

失必呵責或卽杖藩爲舉人時以延賓品弗稱讓婦恭人怒曰吾在堂而女讓婦何禮也藩跪而請罪杖五下始命之起故藩等幼無狎習長無侈志雖宗姻子弟皆敬憚焉恭人大耐儉素其奉惡衣菲食布被疏席不知爲薄其用卽一錢之微亦不苟出至於綜核內政黽勉求之人不堪其勞而恭人弗恤也然其心誠信無貳嚴以自飭自爲處子及于大耋目不視惡色耳不聽惡聲口不出惡言其所惡之人與之語或坐退必連唾數口若將懲其舌而湔其餘聲者衣則解而置之或浣而後衣言不違心行不違言嘗曰男子之行百婦人惟一貞而已故曰恒其德貞苟不

貞餘不足觀也用是孝篤於舅姑敬伸於夫子教學於子孫以大興吾宗恭人其可謂至德也已藩昔奔先子之喪而歸也見恭人強健善飲食謂當百歲弗止也哀毀之餘私念不及見先子得久事恭人亦可少解終天之恨矣然越歲竟亦弗起非天弗與至德無乃厭藩多罪前後相罰使之摧崩以死耶然又不卽死使藩之痛何時而已哉恭人從先子貴初封安人再封宜人恭人之封藩考史官三年滿 恩也生景泰己巳十一月二十九日嘉靖七年七月初四日以微疾卒得年八十以其年十一月某日啓城西原先子之封合葬藩謹述遺行以寓無窮之哀恭人凡

三子二女四孫六孫女其詳具先子壙志云

故季父處士府君季母張氏合葬墓誌銘

正德丁丑夏四月某自史館告謁歸越明年戊寅秋七月將復歸於 京師而季父以是月朔卒子幼不能舉葬某乃留昔我大父贈刑部員外郎府君之歿也屬河決壤我陸氏村祖塋我大人程番公市地於城西張氏村殯焉正德己巳河北徙祖塋復爲平壤某偕宗人往哭其地將奉遷大父而北域湮滅恐犯舊壙乃不果遷逮季父之喪維藩稟於程番公欲改葬大父而後以季父從焉公曰吾爲東西南北人也幾三十年是以罔盡孝於爾大父吾豈能

爲心爾不見吾之坐歛而行吁乎且吾邑截長補短將三十里也而河決者過其半善地可卒得與况吾昔者殯爾大父亦旣竭目力矣盍惟舊圖乃以白金五十兩歸諸張氏郭氏凡得地三十二畝五分益以大父殯所共爲三十四畝云乃周圍築垣前建門樓又遣人琢石於徐爲碑爲馬爲羊爲表柱而享祀之堂則明春肇事焉程番公命其曰塋地新拓十月十九日葬爾李父母於刑部府君兆側爾其誌諸石乃受命拭淚以誌曰郭氏之先家乘墜逸罔考其先所自出高祖諱德元季自虹縣避地儀封居有頃我 高皇帝一天下乃家儀封時兵後多汙萊有田

詔令民辟田田而不賦高祖乃辟田於是郭氏之田連阡陌高祖生曾祖二公以行爲字因高祖之業乃肯播穫家用大裕嘗畜水牛二十七治田牧凡驅牛浴牛入陂數之二十八也出則數如舊人皆異之遂呼爲水牛郭氏云二公府君生蕭縣典史府君諱岩有惠政於蕭程番公爲主事時以使過蕭因省舅氏於邑之歐陽家故老爭先來見曰吾屬受先公恩厚大人厚自愛吾願先公萬子孫爲官也蕭縣府君生刑部府君諱慶字宗善質而文寬而信有孝弟之行鄉人皆稱君子焉我大母歐陽氏實以淑德嬪于大父生五子季父大父第三子也諱廷瓛元兄卽程番

公以進士起官爲戶部主事三年以平賦績奏

勅封

大父爲承德郎戶部主事贈大母爲安人爲刑部員外郎
三年以刑績奏 制贈大父爲奉訓大夫刑部員外郎

大母爲宜人今以程番府知府致仕德行風節宗人式焉
仲兄及仲弟皆卒其贊程番公以整齊門戶者惟季弟耳
季父在諸父中獨負氣有風岸盱視寡言鮮合於人而人
亦懼與之合每出人輒避之曰郭三來也弱冠時嘗從程
番公業辟雍時公以文會結海內名士出則以門戶童穉
託季父季父必閉門端坐公至乃啓扇暇輒起遊於市觀
賈人之事久之告程番公曰吾觀於市而得致富之道焉

起家不難也公哂之逮歸不二十年遂有田萬畝金萬兩
爲里中富人之冠某嘗取其行而評之季父筋骨甚強出
不騎寢不旦每省耕作終日隨傭泯無倦色佃丁或進兀
筯亦弗坐也其名曰勤性尤簡質食無二味施無騰衣雖
羅縠充篋不加於身惟一子愛甚生十二年不與製長衣
曰身小壞匹布也其名曰儉與人交利甚明一介不輕與
人亦不輕取諸人其受穀於田也輒自齎飪以往饑就樹
下出諸袖中食之渴卽緹瓶汲井以飲雖勺水不飲於人
其名曰介好息訟解紛凡見人闕輒面斥曰夫夫是夫夫
非色厲而辭嚴聞卽罷其名曰直故某謂季父之致富也

以其行非特能廢舉也然縱於飲以酒爲食竟以是遘疾不起年纔五十有六於乎痛哉季母張氏其歸季父也我大母已棄代每二妣語及先姑之懿行輒涕洟自怨曰薄命不及事吾姑也敬妣睦娣宗婦無間言季父起家季母祇贊之力爲多先季父一年卒子一曰維祺聘王氏女爲婦女三一適柴營一適王汝保一適宋一奎皆名家子是瑩也大父兆於中其東偏數武則季父之塋云銘曰幽幽玄堂奉訓爲祖原拱川環閱此靈祐季父從之東偏數武爰及厥配寧於茲土

故叔父處士府君叔母朱氏合葬墓誌銘

維藩在史館七年丁丑夏四月乃乞省覲歸徧見宗人髻者弁弁者壯而壯者面亦焦矣於是于于然喜又戚戚然感也時三叔父五叔父皆在坐其面瘠而稿其黑如始體重不任行立乃三叔好酒固知其損於酒也因諫曰三叔奚至是夫面稿色黑者神奪也體重不任行立者骨憊也神奪骨憊其何能久曷亟斷酒以回脾胃之氣親藥物以攻其毒庶免於殆三叔若弗聞也者而語他自是每諫皆陽許而陰違之戊寅秋七月朔三叔父以痿厥不食卒維藩撫其尸以慟又垂涕諫五叔父曰三叔父惟不用姪言以至斯也叔父形色益不及疇昔不亟斷酒恐亦及矣乃

亦不斷酒遂發酒疸體盡黃小腹脹急己卯正月十一日
卒年才四十有九維藩乃撫其尸益大慟使五叔肯用諫
豈有此使維藩之言能動五叔必用其諫亦豈有此於乎
痛哉於乎痛哉以二月十八日葬於我大父贈奉直大夫
刑部員外郎府君兆側維藩乃拭淚誌其實於石五叔姓
郭氏諱廷玠素豪於里中里中皆呼爲郭五遂代其名云
高祖府君諱德自鳳陽虹縣徙儀封乃家儀封曾祖府君
諱二公祖典史府君諱岩考卽奉直府君諱慶妣歐陽氏
贈宜人自高祖至大父凡四世以積善聞於鄉鄉老長皆
曰善門後必有興者矣故大父字宗善云大父生五子性

慈而教嚴我大父中憲公生六七年大父曰是兒可士卽
遣就傅暨諸叔生大父曰其可農其可賈長而業成無弗
當者及中憲公舉進士爲主事大父卽召諸叔語之曰汝
兄爲京官足爲門戶重夫京官者給於人未能給人若曹
欲資之給何以助廉且幸有先人之田可以爲生吾令若
曹異釜以食不勞汝兄如何諸叔曰唯唯乃手書田數與
官各授之而虛其一官曰此與汝兄居之於是諸析無幾
中憲公迎養大父於京邸因詭請曰兒初有官大人卽命
厥弟析是彰兒弗友也人其謂兒何大父曰吾志也已奪
汝田授之矣鄉里不以是議汝汝弟不以是怨汝汝廉於

官吾樂也才數年諸叔輒起家田廣而宮拓加於舊十矣而三叔父五叔父產尤豐於是郭氏之家益大於儀云五叔父自三叔父之卒也感而多悲往事時置酒奉我中憲公飲酒酣輒出其貲於席曰非父之靈兄之庇何以有此敢以此勸爵中憲公大笑飲之乃相酬酢而醉叔父儉而質不脩容不飾衣中憲嘗戲謂曰汝有剩貲何不華服其對曰美衣費金服之費心衣取蔽體不取心勞惡用彼綺麗者爲也中憲公家居毋監司行縣至輒過其廬邑大夫政暇亦數過必召之見叔父輒以不在辭客罷中憲公召而詰之曰何子違對曰非敢違也弟以兄爲兄以維藩爲

姪雖顯客亦必禮貌焉然久疎之性不閑於禮懼爲兄羞又虞人之議之曰是何怙兄與姪而自獻於顯者也中憲公許其靜而有守叔父於諸姪中獨愛維藩弘治乙卯赴省試屬河決水溢自儀及汴凡百餘里而水涉者當其半叔父乃親送之淺則騎而涉叔父必前曰視吾行深則舍騎以涉水奔盪胸足不能定叔父卽負之得不仆至汴乃視館舍金爨牀帷定而後去焉一者之歸叔父猶謂曰汝記昔者赴試事乎乃今不徒勞矣叔父有計慮然又精識貨賄其所欲買雖微必賤其所欲蓄雖粗必售且有利與諸叔析年最少而起家乃在其先云病革時維藩侍焉亟

欲役一僕呼之及中門不入再呼再應猶不入甚怪之女
奴曰此主令也乃入於是知叔父之信行矣夫僕以利隨
人者也在利則親失利則背故鮮得其信焉叔父病已弗
留僕將無所利而乃守其令而不變非信於僕而僕信之
能如是乎昔孔子論政去兵食而存信是民之行也政之
本也叔父而得位民弗信之哉而乃止於富人亦甚枉矣
元配朱氏性惠而方內治斬斬歸叔父五年卒乃啓其柩
合葬焉側配徐氏先一年卒生三丈夫子維豐維鎬維周
俱幼今亦遷祔於叔父之兆云銘曰猗羸其躬旣富旣豐
胡命之窮有藏玄宮突而且崇厥配與同

行狀二篇

南京戶部尚書謚文莊王公行狀

公姓王氏諱鴻儒字懋學別號凝齋南陽人也高祖諱孟
良妣周氏曾祖諱道十妣屠氏祖諱覺成妣孟氏父諱本
妣司氏凡四世皆以忠厚善良相濟鄉老長皆曰王氏積
善如此當必有餘慶矣及公貴遂贈祖父父爲通議大夫
吏部右侍郎祖母母爲淑人公生而敏悟絕人六七歲時
從里師授書過目卽不忘甫十二三作書端勁可逼唐率
更令有親屬爲府史者嘗致公入佐書時金城段公堅知
南陽府號爲賢守見公書奇而問之史以實對遂召見歎

曰風神清澈非塵埃中人也乃留讀書府中續食授衣親課其業越三四年諸經子史皆熟其詞而通其義遂入郡庠爲弟子員提學副使天台陳公選以風節文章名於時校士至南陽閱及公卷驚曰此經世之文非舉子業也吾殆弗如矣其見賞如此成化癸卯河南省試遂以第一人發解丁未舉進士弘治己酉授南京戶部主事有疑其攻學而遺政者公至部其長檄使領倉庾事日求其奸弊而杜絕之無贏入無縮出軍民稱便職舉而學不廢人於是益信爲全才甲寅陞本部員外郎再以部檄摧舟於淮安督稅於鳳陽皆大有聲績丙辰陞山西按察司僉事奉

勅董學政公之於士也以陶養爲本以文法爲末以行檢爲先以詞藝爲後其考校崇雅抑浮品藻高下不爽毫釐故黜者無怨言進者無愧色又好面誨人每生徒請益交進並立公因才開發應無惰容於是士皆樂其教而公亦樂於教一時人才士風翕然大變巡撫都御史魏公伸巡按御史藍君章以生員王宣輩有狀願留公乃疏其行業交薦於朝壬戌遂陞本司副使仍董學政又三年乙丑滿副使一考以疾乞致仕天子下其疏吏部吏部知公賢乃擬待病痊可有司具奏定奪奏上天子允之蓋朝廷待大臣之體也正德四年己巳陞國子監祭

酒吏部移文卽其家趣蒞事公至監方將申累朝之規以
養天下之士才四月以父喪去位朝論惜之壬申陞南京
戶部右侍郎時尚書胡公致爲臣而去公攝部篆正已率
屬執樞提綱不動聲色事種種皆就理乙亥改吏部右侍
郎 國家自 太宗文皇帝定鼎於燕也天下事悉歸
京師諸部其遺南部者才十之二三卽有行非出諸部擬
奏者弗得專時視爲散地故卿及佐自南遷北曹者以爲
異其遷吏曹者尤異然非才德素著簡在吾君之心者不
與也公旣至乃協贊太宰甄拔人物銓序陟降各當其才
忠佞邪正不爽其實士論推重焉丁丑秋 上北巡九卿

合請還

京公爲疏其詞簡而切和而莊

上悟爲回

蠻戍寅奉使

徽府禮成而歸

王魏一無所取已卯陞

南京戶部尚書七月舟次安陸有瘍發於左脇遂卒年六

十有一訃聞

天子驚悼

賜謚及葬祭

朝士皆相

顧歎曰國失著爨矣公之在山西也

孝宗一日罷朝召

兵部尚書東山劉公論時政且及當時人才

上曰如山

西副使王鴻儒他日可大用東山對曰臣亦知之此人才

行誠不易得

聖諭是也東山後又以告鄉人員外郎胥

君文相且曰語方半月而

孝宗升遐未幾予亦引年歸

時罕有知者

朝廷用此等人方擔嘗得大事予老不及

見子其識之胥君書其言於簡以上公於乎公受知先
帝未大用而先帝崩及其位既顯未大行而公已逝豈
非天哉公天性孝友忠信溫恭動準古人思以自見於世
其所欲至大賢以下弗屑也平日讀書以窮理為主虛而
不有確而不泥惟理之所在則從之雖一字之異同亦必
求其原而審其義之所安而後已故其所得弘博奧衍交
發互益其於六經沛如也爲文不事藻飾惟務明道理佑
世教雖議論溢出而自中規矩詩則不多作遇有興乃爲
之其遇意深遠誦之足以使人興起然善觀史以歷代君
臣之行事爲案而已從而斷之卽刑賞用舍而審其得失

之故因出處言行而辯其忠邪之歸是以上下數千百年
治亂興滅之跡如指諸其掌又孰國初故實我祖宗之
用人行政及諸先正立朝行已之詳皆能一一言之下至
諸子之書裨官之說星曆醫筭之術亦旁通而無遺尤究
心當世之務凡禮樂刑政教化風俗田賦軍旅皆悉其所
弊而達其所益至論時事卽始要歸成敗了然每一事必
引古人之故以證之事理相形皆可見之行者人或問
必竭兩端以告豐豐不倦隨其才識高下各有所得接人
和而有禮無貴賤賢愚一以至誠待之所厚者輒款以酒
食與客談非道義不及公不問人私而人亦不敢干以私

由是賢者傾心慢者致敬詐者輸誠識與不識皆知公爲成德君子也若假之年而究其所施則古賢大臣之所建立不知於公何如也於戲惜哉公政餘所著有五朝都俞錄若干卷金石錄若干卷通今錄若干卷凝齋詩話若干卷文集若干卷其五經辯註則未及書云元配吳氏封淑人生男曰可以公廕爲國子生女二長適舍人呂滋次適監生焦輅側配劉氏生男曰申曰協女一字指揮應襲李世祿孫男一曰壽孫可等以正德十五年十二月二十四日葬公於某原來乞銘并隧道碑於當世立言君子以其舊操几杖於公之門日子知先君子須子狀乃揮涕序其

事如左伏俟采擇焉

贈徵仕郎兵科給事中田公行狀

公諱屋字宗坤其先保定蠡縣人四世祖大本者洪武初以舉人爲浙江錢塘縣主簿坐家人受賂謫戍古浪居數年肅王就國於蘭茂擇文學士傳世子長史以古浪薦乃請命徒充肅府校尉遂爲蘭人曾大父永寧大父義有處士節嘗野行見獵者逐鹿鹿迫入水公呼曰罷遂與金獵者止鹿得逸去其天性慈愛如此配王氏有淑行處士適與鄰閔王急走解之蹶墮胎乃匿以他故告遂解閔踰年乃生公人以爲陰德所致云公六兄公事親無違

色處兄無違言與人接言如其心見之知其爲信人也成化間公隨五兄行貨兄道病公調視湯藥朝夕無怠色及病革泣謂兄曰吾不能代兄矣妻若子吾當任之兄死事其嫂如母字其孤如子其後嫂以節著姪以明經舉公皆不有其功配高氏賢而無子公年四十五始娶側配劉於贛榆踰年子萬生再踰年子荆生生七八年公卽遣就傳禁其嬉遊至衣服飲食皆有限制或勸曰晚子盍愛諸曰勞而教之爲愛甘食麗服縱其口腹爲敗如是吾猶懼其敗也況可廢教與歲時伏臘爲酒食召諸子姪聚而訓之曰爾惟讀書讀書則理明理明則賢營利則志昏志昏則

愚賢人敬而愛之愚雖鄉人弗爾齒也爾勿忽吾言公性好施賢而貧者樂助之資貧而貸者罔責其償所厚有以蓄財遺子言者公曰子賢吾何憂不賢是吾導之侈也未年囊困蕭然惟以自供而已弘治戊午子芹生今爲蠶庠弟子員甲子三月子藻生八月荆以明經舉於鄉公年六十七以九月二日卒其不及知荆舉者才數日云卒之十二年正德丙子子萬天凡有孫男一人孫女三人辛未荆舉進士 詔改庶吉士讀中秘書癸亥授兵科給事中給事爲人諒而有直氣劾必究奸言不及細三年上其績考最 勅贈公徵任郎兵科給事中封高氏爲太孺人初公

卒於淮給事官 京師乃自淮遷葬蠡縣今將啓公柩歸
葬於蘭乃書其世系并公履歷授余曰請先生狀予將乞
大君子銘以昭先人之德余曰唯唯夫子克事親曰孝兄
死不背曰友商不徇利曰義父能成子曰慈公其賢者與
賢者不可無聞於世乃次第給事所書爲狀候大君子采
焉

祭文十八篇

南京翰林院土地祠劫建成遷主告文

土地之爲用也生百穀居四民其功可與天配故曰天地
明其尊同也今制京師有社郡若縣亦皆有社府部有

土地祠郡若縣亦皆有祠非報其生穀居民之功與夫神
之斯有祀矣祀之斯有祠矣非所以爲謠也南京翰林院
土地祠國初建不知于院之何隅乙酉十一月二十八日
予以侍講學士來視院事至則望闕謝恩已乃謁土
地之神顧祠于右廊之廢址屋漏壁傾後鄰民廁腥穢之
氣至不可聞非所以居神民而嚴事之也乃予相地於二
門外之南偏除茅崇址建祠一楹制雖未盡其美地則寔
嚴于前今旣告成敢用遷主伏願是依是安永作神休以
綏居者謹告

祭南京戶部尚書文莊王公文

曰某觀諸天下而知才之難焉夫以仕名者而不究於學以學名者而不達於政學以政奪政以學滯雖其力之不足亦其志之不立也是故多一節之士惟我先生自郎官陟司徒所在輒效而政業著焉自諸經及子史辯其疑義而道理明焉是以仕者見之謂之才學者見之謂之儒而天下企先生者寡矣雖然先生位雖顯而不當天下之任故經邦之業未究諸經周禮皆有說而未及成書故待後之志未終豈非斯世斯文之不幸哉昔先生之爲郎也某操几杖於門下先生愛而誨之若子後二十年先生入爲少宰而某亦具數史官又得日侍講席以質舊聞纔一年

某以省覲歸又二年某還朝而先生適被南京司徒之命時某病未能朝乃使人於先生而先生行矣於乎不圖五越月而乃聞先生之訃哉痛其甚矣痛其甚矣某拘於職守無由撫棺以盡其哀謹具香帛侑以此文附先生家人王重獻於靈座伏惟尚饗

祭金員外治卿文

惟君以少司寇爲父聞敦義踐道之訓以太史氏爲兄篤交脩互益之功是以擢第而入官也以得之父兄者守諸身而達諸政直而不亢廣而不踰剛而不刻寬而不廢故人皆信其爲有用之才而不知爲世貴之子也如君者可

不謂之賢乎夫賢宜獲壽於天大行於時而君位止於下
大夫年止於三十四則所謂天者不可忱而理者不可推
矣君之歿固君子之所深悲也某等與君同朝又與君之
兄爲同寮交深義重悲君之情殆又甚焉乃因芻從南發
酌酒矢詞以敘其哀君其來饗

祭通判賈公文

代文作

於戲公乎而至是乎公歿而古之遺直不可見矣夫古之
直也直躬今之直也直辭古之直也正行今之直也訐私
古之直也務實今之直也務譽斯皆遠於古之直矣惟公
面斥人非自反諸已而無愧行身以義雖愠於人而不渝

故自學士以至鄉人皆稱爲直而無間言是非得於古之
直與予性素鷲直賴公裁而歸諸正今老矣志慮減於舊
日道德愧於前脩方望引翼以立於時也而公不可留矣
則予之悲公匪直親戚之分交好之私哉月日有吉芻從
在途矢詞靈座以告永訣於戲哀哉尚饗

祭俞朝相評事

君以博學清才未壯而舉進士人皆曰年如是以其所能
施之有政通顯可立致也旣而選于朝得推官人又曰
推官理官也分錯解結練其務益其能是大受遠到之資
也旣而以喪去喪除復爲推官遲回外郡十有餘年

天子用御史薦命爲南京大理寺評事人又曰屈伸相倚
伏者也君久屈必速伸也然而在官未基而卒於乎才者
顯之地也屈者伸之宅也以君之才而位止七品以君之
屈未及伸而殞然則所謂才者果不足以致顯屈者果不
足以求伸與胡君之不偶如此也於乎天乎人乎君其奈
何哉某等與君爲同年友悲君之情詞何可宣臨柩一奠
旌其南行尚饗

祭北潭傅老先生

先生妙歲爰舉進士遂奉 明詔讀書中秘允矣大成傑
然名世文而不炫貞而不泥廉而不矯威而不憤乃爲史

官公非公是乃講

經筵善陳邪閉

命典文衡錄皆

俊又位進宗伯禮明樂備

天子向公公益退避累疏

乞休

詔許致仕臨山看雲臨水采芝不接賓客不言時

事御史上言大臣高致宜給阜輿宜加廩餼豈私公國

體攸繫方期公起以臻至治斗杓忽傾公卽長逝

朝有

大疑孰斷其議國有大事孰任其勩官師奔競孰裁其弊
士失模楷民喪怙恃臨歿之言明明可識戒其家人喪勿

過費勿乞營葬勿請贈謚生安義命歿亦不貳篤信守道

公可謂至其等年家晚生早獲參侍聞公之喪潛然涕泗

非私之悲寔社稷計緘辭遣奠薦此誠意於乎哀哉尚饗

祭顧舟卿給事中

吾之與子吳豫異域子不我見我不子卽丁丑春試予同校文得子之卷炫目竒芬陳事旣核談理旣悉氣充而昌學正而實予曰茲士其爲賢才置之有位事可康哉始爲行人寔典使事采風問俗有裨于治進守諫垣讜論屢通攸贊國是載啓 帝衷方期大用翊是袞職以人事君責也可塞胡疾之劇溘爾云亡知己之痛斯文之傷遺奠緘詞不躬親只託目征雲大海之淚

祭大父贈刑部員外郎府君墓文

某聞諸古之君子曰去國哭于墓而後行及國展墓而後入夫去而哭告出也反而展告至也是事死如生也仁之至也庚午冬某告于墓如京師會試明年辛未舉進士改庶吉士奉 詔讀中秘書旣三年授翰林院檢討職於史局又三年上其績於 朝乃得省覲歸蓋違墳墓者七年矣掃除之役久廢歲時之享莫親是自蹈夫不仁也在昔府君之命某也曰汝性慧蓋務學乎吾欲見汝官矣汝官吾卽歿寧也某奉以從事不敢失墜然慙而柔未能速成也蓋府君旣歿三年而舉於鄉又十三年而官於 朝凡府君之所欲見者皆不及見矣是自蹈夫不孝也夫耽官爵而違墳墓其之不仁也固古之君子之罪人矣然府君

志也是真也宜漠之中或不恫其不孝矣伏惟尚饗

祭外舅胡公墓文

惟公識高百夫有并包衆美之度狎睨一世有樂共萬物之懷今其歿二十六年矣使鄉之學士尚其文達士慕其義而識與不識者誦其名是非其賢與至其應有司者之求凡九試於鄉而不第豈其賢之不足與夫學問由諸已夫人而可爲也富貴命諸天非夫人而可爲也此公之賢所以不第也然而鄉之第者亦多矣身歿而名弗聞者皆是也視公之不第而名永存者其所得孰爲多與維藩十二而婚於公門及見維藩所業曰此子才吾弗如也他日

必有成於是公有樂育之意而維藩亦願師事之未幾從吾大人宦於京及歸娶而公已歿矣於乎維藩仰公之賢而未獲受其教公知維藩之可教而不獲見其成維藩固不幸也而公寧無憾於地下與今以省覲來歸追念疇昔何勝感慨敢以薄奠告于墓下伏惟尚饗

祭菊莊趙先生文

代文作

勉之之生也後予十餘年始予在鄉校講六經孔孟之言時勉之始任冠也卽欣然來就之發疑問難豐稟皆中義理予固已多其勤已而務學也及予舉鄉試而勉之已騰聲鄉校矣後予三年亦舉鄉試志行之美操履之堅又已

裒然而爲成德也於是予重勉之之賢勉之感予之舊乃以其子甥於吾假骨肉之分永朋友之交是勉之所以結予而予所以荅勉之者非一時之好也自是予仕而勉之處予歸而憂居勉之仕蓋不相見者將二十年及余辭程番之命而勉之亦致仕歸矣乃與嚮友爲會命之曰休老因飲食之聚敦道義之歡予與勉之于于然尋舊日之約也又五年而勉之卒於乎孰謂勉之而至是哉官向顯而退年未老而休蓋欲以是未竟者博今之樂也孰謂勉之而至是哉豈造物者於富且貴者易以畀人而於一丘之安一壑之樂顧重且嗇耶不然何奪吾勉之之速也雖然

勉之已矣有子以嗣其業亦可以無憾矣予老而失友無與晤語其所以悲勉之者無窮期矣其知之哉其不知哉聊陳此詞以告永訣靈其尚饗

祭解繼美文

繼美之仕也理芴刮垢事不能困有才臣之風其退也縱浪丘園日夕酣歌有曠士之懷夫才者有功故官起斯可以大行矣曠者不憂故鮮疾斯可以多壽矣然而繼美官止七品且不久於用五十有二而卒又不有其年豈所謂才者不可憑而曠者反傷其生耶抑所謂理者不可推而天者不可恃耶繼美之歿吾誠不知其然也予於繼美親

則婚姻義則朋友病也吾不及問葬也吾不及送吾行誠
薄有愧冥漠多矣亦復何言今國喪告除敢以酒脯躬告
墓下靈其有知伏惟尚饗

祭五弟文

代父作

舊歲七月汝三兄之歿也吾與汝共哭之撫其遺孤肺腸
如割既而命汝與吾子理其凡務子幼而徒貪嬉務殷而
未就緒吾與汝言之未嘗不相向而泣也曾幾何時而汝
亦不起邪汝之子幼猶夫汝三兄也汝之務殷猶夫汝三
兄也而皆託於吾身則吾之悲汝三兄者又轉而悲汝矣
使汝卽有知又將抱無窮之悲於九泉矣於乎吾不圖老

境而乃見此凶變也痛可言哉痛可言哉去歲之秋吾築
齋於巷北將收汝三兄之子而教其中今併汝之子收而
教之財息於外者爲汝收之田疑於媵者爲汝正之所以
慰吾之悲者如斯而已矣明日之吉送汝之宅酌酒棺前
以告永訣於乎哀哉汝其來饗

祭三弟夫婦文

代父作

嗟乎痛哉吾弟之歿也何屬續之際而無後言耶豈達死
生之理而不動心耶抑有長恨深痛於中而不欲宣諸言
耶抑精神渙離昏憤而無所知耶不然胡百問千呼目相
視而口不應也於乎吾知之矣吾弟財貸而未收子幼而

未成婦死未葬而病且殆此其長恨深痛而不欲言者也
豈惟吾弟痛且恨之吾與諸弟諸子亦無弗痛恨也吾弟
已矣吾之悲汝且無期矣今惟收汝之財櫝而藏之教汝
之子使至成立衣衾柳絮葬汝暨汝婦於先奉直府君地
側此則紓吾之哀而慰汝之痛恨者也更何言哉更何言
哉明日之吉靈輿莫留醇酒矢詞以告永訣汝夫婦其知
乎其不知乎汝其來饗

祭外祖母趙氏文

趙爲令族胡乃喬門惟德有鄰姻好是敦惟外祖母歸外
祖舅以賢配賢琴瑟是友惟其爲婦孝於舅姑雖雖肅肅

甘旨是娛惟其爲母教而有愛允文令子聲名長在惠流
閨闈小星之風無怨無惡孰可與同亦有孫子孤而且穉
撫育其成耕讀以植謂天蓋高鑒善則明錫壽九十載安
載寧胡乃遘疾遂成長往招彼飛瓊遊於無象某幼婚門
下視之如孫飲食教誨今何可諉計來驚懼爲位以哭千
里相望傷此骨肉聞初冬吉永寧女堂緘詞寄奠涕泗沾
裳於乎哀哉尚饗

祭崔母李淑人文

曰婦行無專母德多愛然而隨事匡順以贊其夫之美因
才誨育以成其子之名則固以義制者也有二於此即可

謂賢況無而有之乎於惟淑人以貞慧之德歸于南郭先生先生之仕也以直守官以廉守已淑人惡衣淡食而有喜色官久不遷而無怨言故先生之志益堅節益著非淑人之相之與至誨其子侍讀也幼而無嬉習長而學無損友是以學成而官也談經則欲悟主心爲文則欲復古道聲望赫然人皆仰之非淑人之成之與於乎淑人脩諸已者厚故施於事也宜取諸外者輕故遺於後也顯是可謂至賢也已正宜優游榮養以觀侍讀之大庇天下也而胡至於是乎然年幾於耄封至於三在淑人亦可以無憾矣獨惜夫女師云亡典刑寢遠使人之爲婦與母者無

所於歸也又惜夫侍讀臥苦瘠形罷講說以沃上心也於乎天乎何至此極也某與侍讀同舉于鄉其舉進士也又出侍讀之門交深義重於淑人之喪蓋有不勝其痛者謹因侍讀歸葬柩幣緘詞以敘哀情伏惟尚饗

祭李恭人文

先皇之朝予與恭人夫子後渠先生同爲史官今皇初載予分教國子於留都繼而後渠來爲長寮皆與同巷以處故予之婦與恭人得相過問而恭人之賢得之于婦之談者爲詳焉有曰嘗見恭人縫衣敕以敏又見以鯁封美品于案予問之曰將以遺舅姑也吾見其孝矣凡適恭人

之館入其中門內治斬斬吾見其嚴矣歲時歸寧尚書之府也見日而往見日而還未嘗訖宵處焉吾見其敬矣以尚書公季女爲參政公冢婦又從食大司成之祿敝衣澣服衣之無厭吾見其儉矣夫孝者所以致養也故舅姑安而壽嚴者所以立教也故其子才而文敬者所以淑身也故與後渠終其身無反目儉者所以制用也故後渠宦況清苦而不至於乏此其婦德表表可仰者也夫德所以來壽而叢福也胡乃不得其壽而究極品之封與昔留都恭人寢疾後渠欲備木與斂服焉泣而語予予曰德人未卽及也孰謂歸四越月而竟弗起與舅失孝婦夫失良偶子失賢母崔氏之哀孰大於是予仲春聞訃孟夏抵家秋初致奠雖不恭之莫贖亦人事之多乖也

祭侯氏弟婦文

曰汝以刺史公爲父聞詩書圖箴之訓以戴氏夫人爲母習剪縫織纂之工是以歸於吾家也以聞於父者脩婦德習於母者飭婦功故宗黨親屬皆稱爲賢而吾亦謂吾弟之得助也夫賢宜有壽有子汝於是二者未之有一焉豈汝生之不淑耶抑吾家之不幸耶於乎痛其甚矣二十四日之吉送汝卽地聊奠柩前以祖其行汝其來饗

祭邊廷實母文

夫人之初度也余題鄭母事以壽既踰月而夫人沒余題
孟母事以悲於戲鄭母察其子善果之政也其善也喜其
不善也嗔是以名立焉孟母欲其子軻之善也其居也擇
其學也勵是以道成焉此皆母道赫著而簡冊有聞者也
惟夫人慧而執禮慈而好義故其施於子也以清勤著官
守以詩文名四方揆諸二母教異方而同歸生異時而同
趨可不謂之賢哉余方病今女教之不行而母道之無聞
也如夫人者正宜永年以示閭化而乃溘焉以歿此所以
使余悼惜歔歔而不能自己者也余服令子之義仰夫人
之賢輻車東歸無由執紼以送聊陳此詞以寫哀誠伏惟

尚饗

雜文一十二篇

渥恩晚福解

戶省陳大夫君咸向以主事三年上其績于朝天
子嘉其能職也乃錫之命封厥父臥雲先生如其官厥
母林爲安人今守郎中三年又上其績于朝至是凡違
閨九年矣君咸曰始吾乞南省以便養也壹者吾父之來
吾母弗與俱也吾父歸又三年矣而違吾母日益久其如
養何乃上疏乞歸省已而報罷君咸曰君親之義一
而已矣以親違君非忠也因取命辭渥恩伊始晚

福未涯之句請予解其義以寄壽焉予歎曰孝哉君咸之
爲道也其乞南也不有寵也其乞省也不有官也及請之
弗得也又欲以命辭爲壽非所謂純孝乎夫孝莫大乎尊
尊莫大乎君夫君之於臣也嘉其賢以勵其脩敘其勞以
勉其繼是故其賢著者其命辭美其勞大者其命辭詳是
所以馭臣之道也夫渥厚也恩惠也澤也上之出也晚暮
也衰年之云也福備也百順之萃也卽所謂恩也下之承
于上也是褒君咸之賢與勞而及其親也夫主事安人六
品封也猶勅命也由是君咸之賢與勞益著封則爲
五品命則用文絲誥矣又進而封則爲四品爲三品命則

用金軸誥矣又進而封則爲二品命則用犀軸誥矣又進
而封則爲一品命則用玉軸誥矣故曰伊始言顯大之封
始諸此而洊至于彼也封君年五十有八安人年六十又
十年則爲傅又十年則爲耄又十年則爲期頤以至于無
期故曰未涯言恩之承于上者無際止也夫親之教子也
用吾之穀以成其德也子之揚親也致君之寵以榮其身
也臣之事君也奉親之教以立其政也故德所以立政也
政所以來寵也德充則政立政立則寵來寵來則恩與福
咸在是矣夫施恩者君也承福者親也致斯二者我也故
恩福之久近繫吾之德與政雖君亦不能預定焉君咸之

德成矣其政著矣又持而不變以是獲寵寵益進以是迂
福福益遠以是壽親親不樂乎聞之諸君子聞而嘉之皆
願附名以壽

會約

石洲五泉北樓石溪我山杏岡六人同年友也同爲史官
以職務清簡相約爲文會曰經曰史曰詩月三舉焉凡會
講讀經史各若干張作詩一章杏岡某欲堅其心而率其
氣也乃爲約以告曰斯會之舉也爲人乎自爲乎如其爲
人吾不敢知已必以自爲盍與諸君子圖焉夫業非勤不
精學非講不明是故勤之害有二而犯必形之講之弊有

五而犯必形之何也好宴飲則心志荒廣交游則奔走急
喜營爲則思慮雜三者弗克斯害於勤矣是故其形也懵
懵茫茫於經於史於詩皆不能舉其一焉如是者有罰夫
講者彼此各據所見辯論如雝而不相容者也故知而弗
言言而弗盡其弊曰隱人是我非我非其弊曰隨信
已見而不移其弊曰固知人之失而不攻其弊曰柔見人
之善陰取而陽非之其弊曰詐是故其形也爲觀望爲默
爲遜避爲執爲橫辯如是者有罰徵楮筆金五分識過焉
赴會有常期供饌有定序凡大風雨免赴罷供疾病者亦
如之其有不可已之事使人齎其詩送會所以告當供饌

者如常供違則准前罰焉夫約者所以徵業也信者所以守約也不信則約散約散則業墮吾與諸君子盍共圖焉

書聯句卷首

夫對時借樂存乎情絜情准禮存乎志舒情發志存乎言徵久考實存乎迹是故志者情之約也言者志之表也迹者事之著而可稽者也志定故情不流言莊故志可見於是乎可以徵久而考實焉是詩也八人所爲也八人者遊不奪公飲不至困志約其情言發其志蓋庶幾乎樂而不淫者矣毅齋劉子曰夫人也詞雖錯綜情志咸一是弗可以徵久而考實乎乃錄其詩於冊請予書之八人者蒲汀

李子夢弼爲吏侍類菴趙子爾錫爲禮侍申臺張子季子爲中丞仰止黎子師召爲通政毅齋劉子克柔爲臚卿函谷許子廷綸爲通政叅議黼菴柴子德美爲光祿少卿其承乏翰林侍講學士則杏東郭維藩也

書范文正公墨跡後

予觀文正公二帖作而歎曰美乎哉四善備矣放而不縱歛而不拘峭而能孫腴而能立書法盡於是矣夫書所以彰心也四者足以規矣夫放而不縱者動直也歛而不拘者靜專也峭而能孫者剛柔也腴而能立者柔剛也如是而後謂之心正心正則可以輔世可以酬務可以親九族

可以仁天下其斯以為文正乎

雜言

邵堯夫之隱于洛也烏帽緇褐不易於卿相司馬君實謝事而居于洛也出則朝服乘馬而深衣幅巾則於獨樂園易之夫堯夫有道君子也而人不謂其服之俗君實純德君子也而人不謂其猶有慕於官是故人之品存乎人而不存乎服如其服則桀堯服而可以為堯跖夷服而可以為夷乎今之君子傷今之薄而篤於思古服高簷桶子冠及鼈衣豈惟居家服之在公府亦然豈惟君子服之今自市井之中雖巨狙豪商譴吏罷卒亦有然者及考其

君子服之立異論而取名小人服之掠美觀而無忌及今制而戾古道噫我太祖之罪人也

司馬溫公好古執禮准禮記作深衣幅巾服之嘗謂康節邵先生曰先生可衣此乎對曰雍為今人當衣今人之服溫公歎其言合理今之君子有喪冠而用坡巾之製者且服之以禮賓意古之君子不以今反古今之君子顧以吉處喪乎其亡親畔禮也甚矣

疾雷迅風神奪七喪此天之怒也謂之威亦可也白日麗空照臨下土此天之常也謂之喜亦可也然而禍福靡忒威喜未嘗不在也小人以其怒者為威而戒心生也故可

以緩禍常者爲喜而惡心肆也故終於亡軀人主之尊猶
天也其喜怒與天一爲人臣者當盡誠以事之若戒其怒
而恃其喜鮮不及禍矣

明理可以無疑無疑可以安命死生禍福之不二無疑也
脩己以順其正安命也是故明理莫要於致知致知莫要
於主敬

降命存乎天保命存乎人燕安耽酒狗貨固權皆伐命之
斧斤也及其神耗形消不克永年而曰天之降命有脩短
不亦矯誣之甚乎

別言

麥汝復助教于雍將三年擢倅臨江府來予玉亭告
請所以舉倅者予告之曰昔予在雍與二三子之教多士
也教其爲忠矣教其爲孝矣教其爲禮矣教其爲義矣夫
教者所以教人行也而況於其躬乎汝復之往也敬其事
不懈於心是之謂忠由是顯其名以及其所生是之謂孝
其與僚也任勞而讓美是之謂禮其行已也臨利而辯見
難而不避是之謂義是故忠孝立而化昌禮義行而物正
豈惟臨江雖達之天下可也汝復取之爲教者以見之行
故宜有餘地矣詩曰伐柯伐柯其則不遠其斯之謂與

策問

問孔子之門速肖者七十如四科所列顏子已優入聖域矣其餘固皆高世之賢也而孟子之徒若公孫丑萬章輩其識見言論之高要非戰國之士所能及之然則二子教法之善成物之妙固足以爲萬世法程而不可易者今考其爲教孔子以四曰文行忠信而孟子乃曰予不屑之教誨也者是亦教誨之而已矣夫孔子之教切近周密皆本之學者身心日用之實故可以脩身而成德矣而孟子之不屑簡亢闊略不幾於沮人之進乎然而皆能成就人才者何與豈聖者之教固不若賢者之易與抑不知二子之教果可以相資而不悖與諸士行有教人之責將安

盍明以對我

問士習文體關繫世教甚重顧今之爲士者多尚諛佞及其出而有位輒能奔競以圖速化平居作文以險語奇字爲能以摘用經語爲博艱深刻削背畔經義號爲時格茲二者相尚相效日甚而不已夫士習奔競則廉節之風息文體險怪則經術之微非道隆化純之世所宜有也茲欲使爲士者守禮蹈義而敦廉讓之風爲文者順理成章以復純雅之則一舉舊染而滌之不受變於俗者必有一定之見也諸士其昌言之勿讓

杏東先生文集卷之十

終

刻杏東先生文集後序

明甲奉大夫河南左布政使長治趙希夔撰

大中丞白石蔡公蓋儀封故學士郭
先生所舉士也公來拊循中土未數
月既已求先生之墓而銘之矣乃又
購其所遺詩文彙爲若干卷授夔梓
而序其後夔受而讀之有深慨焉夫
先生崛起中土侍從

兩朝嘉言善行流照士林郁郁乎稱經
笥學府矣古人仕賢者之鄉則式閭
封墓以示敦異今先生下世垂三十
年閭墓蕭然著述亦多散逸先生之
門人故吏豈不坐布雲錯於宇內哉
顧表章有待而至於今則信乎斯文
之未喪非偶然也惟是中丞公懷古
人之風急師門之義固將報先生

幽冥而使鄙薄之俗一變夔是
深慨焉夫銘勒其行則潛德彌光
載其言則遺音益遠嗚呼郭先生
是不朽矣今觀集所載先生詠諸
郊壇陵廟者其詩莊和發於旅寓酬贈
者其詩悲以感吞吐川岳鼓吹六經
並得風人之微非貞觀以後詞家及
也至於紀時叙事之文則又遵三易

之選軌黜百氏之類習茹今涵古揮
翰成風蓋蔚然一家言矣以是而
傳傳而不自中丞公斯文其奚賴耶
昔桓譚語嚴尤 揚子書必傳顧丑
與譚不及見也况先生學爲儒宗以
正事

明主音節發於性靈而議論不詭於聖
其人與書已非揚子所望而又得

子如中丞公表章之其視桓譚
是遠甚有不親見其傳者乎刻成
嘉靖壬戌年之五月五日